

Aningaasarsianit akileraarutit pillugit Inatsisartut inatsisaat

Kapitali 1

Akileraartussaaneq

§ 1. Tamakkiisumik akileraartussaasut makkuupput:

- 1) Inuit Kalaallit Nunaanni najugaqartut,
- 2) inuit Kalaallit Nunaanni najugaqavinnatik minnerpaamik qaammatini 6-ini tassaniittut, tamatumani ilanngullugit naatsorsuussaallutik feeriamik assigisaanilluunniit pissuteqarluni Kalaallit Nunaata avataaniillatsiernerit,
- 3) aktieselskabit anpartsselskabillu Kalaallit Nunaanniittutut nalunaarsorneqarsimasut,
- 4) selskabit allat Kalaallit Nunaanniittutut nalunaarsorsimasut selskabit pisussaaffiunut pigisatik tamaasa atorlugit akisussaatinneqarsinnaasunik ilaasortaqanngitsut aamma iluanaarutininik agguaassisartut ilaasortat selskabinut aningaasaliissutitut ilanngussaasa qanoq amerlatigineri tunngavigalugit,
- 5) sparekasset Kalaallit Nunaanniittutut nalunaarsorneqarsimasut,
- 6) brugsforeningit Kalaallit Nunaanniittutut nalunaarsorneqarsimasut, tamatumani pineqarlutik peqatigiiffiit nioqqutissanik pisiortornermik pissarsiornermik imaluunniit nioqqutissiornermik imaluunniit ilaasortat nammineerlutik atuinerannut sullissinermik tamakkiisumik ilaannakortumilluunniit pilersuinissamik siunertaqartut aammalu – aningaasaatit ilaasortat akiliutigisimasaasa pisarnertut erniortitaanerisa saniatigut – iluanaarutininik ilaasortanut qanoq nioqquteqartiginermik tunngaveqartumik agguaassisartut,
- 7) sulliviit suleqatigiiffusut Kalaallit Nunaanniittutut nalunaarsorneqarsimasut allat,
- 8) sillimmaseeqatigiiffiit Kalaallit Nunaanniittutut nalunaarsorneqarsimasut sillimmasiisunik akisussaaqatigiinnermut pinngitsooratik ilaasussaataitaanngitsunik aamma tiguisartut,
- 9) soraarnerussutisiaqartitsinermi aningaasaateqarfiit Kalaallit Nunaanni angerlarsimaffillit,
- 10) peqatigiiffiit allat Kalaallit Nunaanniittutut ilaasortaniit akiliutininik tiguisarnissaminnik taakkuninngalu akiliutininik pappiaranik nalilinnik aningaasaliinissaminnik siunertaqartut,
- 11) kreditforeningit Kalaallit Nunaanniittutut nalunaarsorneqarsimasut,
- 12) peqatigiiffiit, suleqatigiiffiit, iluaqutissiuiffiit, aningaasaatit aalajangersimasunut atugassanngortitat aamma suliffeqarfiit imminnut pigisut Kalaallit Nunaanni angerlarsimaffeqartut, aammalu akunnittarfeqarnermik imaluunniit neriniartarfeqarnermik ingerlataqartut. Akileraartussaataitaanermi taamaallaat pineqarput akunnittarfeqarnermik imaluunniit neriniartarfeqarnermik ingerlataqarnikkut aningaasarsiat kiisalu pigisanik nalilinnik, akunnittarfeqarnermik imaluunniit neriniartarfeqarnermik ingerlatami atasunik atasimasunilluunniit tunisaqarnermi, tunniussinermi imaluunniit taamaatitsinermi

iluanaarutit annaasaqaatillunniit.

13) aningaasaateqarfiit, iluaqutissiuiiffiit (stiftelser), aningaasaatit aalajangersimasunut atugassanngortitat (legatit) suliffeqarfillu imminnut ingerlattut Kalaallit Nunaanniittutut nalunaarsorneqarsimasut, aammalu

14) peqatigiiffiit suleqatigiillunilu iluanaarniaqatigiiffiit allat Kalaallit Nunaanniittutut

nalunaarsorneqarsimasut inuutissarsiummillu ingerlassaqarnermikkut isertitaqartartut,

Imm. 2. Peqatigiiffilli il.il. imm. 1, nr. 14-imi taaneqartut akileraartussaanerannut taamallaat

inuussutissarsiorlutik sulinerimikkut aningaasarsiarisimasaat ilaapput. Taamatut isigineqarput

inuussutissarsiummik ingerlatsinikkut allatullunniit iluanaarniarluni ingerlatsinikkut aningaasarsiat,

tamatumanilu ilaapput pigisanik aalaakkaasunik (illu nunaallunniit) ingerlatsinikkut, attartortitsinikkut

imalunniit ukiuni aalajangersimasuni akilimmik attartortitsinikkut aningaasarsiat. Peqatigiiffiit il.il.

inuussutissarsiornermi ingerlassap peqatigiiffimmit pineqartumit namminermit ingerlanneqanngitsup

iluanaarutaanik pisinnaatitaappat aningaasarsiat tamatumuuna pineqartut aamma inuussutissarsiornermi

aningaasarsiatut isigineqassapput. Iluanaarutit peqatigiiffiup il.il. ilaasortaminut pilersuinermit

pissarsiarisai inuussutissarsiummik ingerlatsinikkut aningaasarsiarineqartutut isigineqassanngillat.

§ 2. Killilimmik akileraartussaataitaapput inuit, selskabit, aningaasaateqarfiit, peqatigiiffiit il.il. § 1, imm. 1, nr. 3-miit 14-imut, taaneqartutut ittut aammalu toqusut pigisaat Kalaallit Nunaanniunngitsaq isumagineqartut patsisissaatanik § 1, imm. 1-imiittunit angusisimanatik:

1) Sulisussarsiarineqarsimallutik Kalaallit Nunaanni umiarsuarniluunniit silaannakkoortaatilunniillu

Kalaallit Nunaanni angerlarsimaffeqartuni nammineq sulillutik qanorluunniit ittunik akissarsiaqartut -

taamaassanngilarli suliaq ataannartumik ullut 60-t inorlugit Kalaallit Nunaanniinnermi

suliarineqarsimappat aammalu inuk pineqartoq sulisitsisumini Kalaallit Nunaamiuunngitsumi

atorfeqartuaannarpat,

2) sulisussarsiarineqarlutik Kalaallit Nunaanni sulereerlutik qanorluunniit ittunik akissarsiaqartut,

matumani unammillertigisanut paasissutissiinnnginnissamik piumasaqaatinik isumaqatigiissuteqarnermi

akissarsiat ilanngullugit. Tassani apeqqutaanngilaq pisinnaatitaalerneq aamma-/imalunniit akissarsiat

pineqartut amerlassusii eqqartuussinikkut, eqqartuussivimmi isumaqatigiissuteqarnikkut,

saqitsaattoqarnerani isumaqatigiissitsiniartarfikkut taakkuluunniit assigisaasigut

pissarsiarineqarsimanersut,

3) Kalaallit Nunaanni sulisitsisumit aningaasarsiaqartinneqartut, akissarsiaqartinneqartut taakkuluunniit

assigisaannik pisartut, Kalaallit Nunaannut nuunnermi pisattat nuunneqarnerini, angallannermi pissutsit

assigisaallunniit pissutigalugit sivikitsuinnarmik kinguarsarneqarpat,

4) Kalaallit Nunaanni pisortat sulisitsisuannit aningaasarsiaqartinneqartut, akissarsiaqartinneqartut

taakkuluunniit assigisaannik pisartut, Kalaallit Nunaannut nuunnermi pikkorissartitsinermit sivikitsumik

peqataaneq pissutigalugu kinguarsarneqarpat,

5) Kalaallit Nunaannit aningaasalersorneqartunik ilinniagaqarnersiutisiaqartut, akissarsiaqartut

assigisaannillunniit ilinniagaqarnerup il.il. nalaani tapiissutisisartut,

6) inuussutissarsiutigalugu eqqumiitsuliortut, timersortartut assigisaallunniit Kalaallit Nunaanni

sulinermi aningaasarsisartut, tamatumunngalu ilaallutik aningaasarsiat eqqumiitsuliortumit

timersortartumillunniit tiguneqaratik inunnulli il.il. allanut pisassanngortinneqartut,

7) aningaasarsianik § 75, imm. 1, nr. 2-mi taaneqartutut ittunik siulersuisunut, udvalginut, kommissioninut, rådinut assigisaannullu Kalaallit Nunaanni angerlarsimaffeqartunut ilaasortaanermit ikiortaanermiluunniit

pissarsisartut,

8) aningaasarsianik Kalaallit Nunaanneersunik § 75, imm. 2, nr. 1 naapertorlugu aningaasarsianut A-nut naasorsuunneqartussanik pissarsisartut,

9) aktie-, anparts- imaluunniit andelselskabimit il.il. Kalaallit Nunaanni angerlarsimaffeqartutut nalunaarsorneqarsimasumit iluanaarutisianik pissarsisartut,

10) Kalaallit Nunaanni aalajangersimasumik ingerlatsiveqartumik inuussutissarsiuteqarlutilluunniit ingerlatseqataasut imaluunniit ingerlatap taamaattup isertitai, sinneqartoorutaasa taakkualuunniit assigisaasa ilaannik pisassaqaartitaasut,

11) Kalaallit Nunaanni aalajangersimasumik sumiiffeqarluni namminersorluni inuussutissarsiummik ingerlataqartut imaluunniit taamaattumik ingerlataqarniarneq pissutigalugu ataannartumik minnerpaamik ullut 90-it Kalaallit Nunaanniittut imaluunniit ingerlatamik taamaattumik ingerlatseqataasut imaluunniit ingerlatap taamaattup isertitaasa, sinneqartoorutaasa taakkualuunniit assigisaasa ilaannik pisassaqaartitaasut,

12) umiartornermik timmisartornermillu Kalaallit Nunaata imartaani nunataaniluunniit (territorium) ingerlanneqartumik imaluunniit kalaallit Nunaata ilaanit avataanut aalajangersimasumik pisartumik ingerlanneqartumik inuussutissarsiuteqartut imaluunniit inuussutissarsiummik taamaaattumik ingerlatseqataasut imaluunniit ingerlatap taamaattup isertitaasa, sinneqartoorutaasa taakkualuunniit assigisaasa ilaannik pisassaqaartitaasut,

13) pigisanik (atuisinnaatitaanermut akileraarutaasartunik (royalties)) Kalaallit Nunaanneersunik pisartagaqartut, 14) Kalaallit Nunaanni inuussutissarsiummik (ingerlatamik) attartortitsinikkut isertitaqartartut,

15) pigisamik aalaakkaasumik Kalaallit Nunaanni pigisaqartut imaluunniit tassannga isertitaqartartut, imaluunniit

16) toqukkut qimaguttup pigisaannit Kalaallit Nunaanni aaqqissuussinikkut suliarineqarsimasunit pisassaqaarnikkut isertitaqartut.

Imm. 2. Imm. 1, naapertorlugu akileraartussaataitaaneq taamaallaat isertitanut isertitallu tunngaviinut taaneqartunut atuuppoq, aammalu akissaaajaatit taamaallaat ilanngaatigineqarsinnaapput isertitanut isertitalluunniit tunngaviinut tunngassuteqarnermissut annertutigisumik. Inunnut imm. 1, nr. 1, naapertorlugu akileraartussaataitaasunut aningaasarsiat akileraaruteqaataasussat naatsorsornerini akissarsiat 10 procentiinik, annerpaamillu ukiumut Inatsisartunit aalajangerneqarsimasumik, ilanngaateqarsinnaatitaapput. Ukiumut ilanngaatigineqartussat oqaaseqatigiit aappaanni taaneqartut qaammatisiutit malillugit ukioq atortuuffissaat sioqqullugu ukiup affaani siullermi Inatsisartut ataatsimiinneranni aalajangerneqartassapput.

§ 3. Akileraartussaataitaanngillat:

1) Kunngi taassumalu aappaa aammalu kunngikkormiunut ilaasut, danskit kunngiisa qitornarisaat imaluunniit inatsisini tunngaviusuni § 11 naapertorlugu ukiumoortumik aningaasarsiassaqaartitaasut taakkualu aapparisaat. Aamma tassani pineqartut toqunerminni qimataannut atuupput.

2) Namminersornerullutik Oqartussat, kommunit, naalagaaffik taakkulu suliffiutaat atorfeqarfutaallu.

3) Naalagaaffinni takornartani naalakkersuisut maani aallartitaat, aallartitaqarfinni atorfillit, inuit taakkua ilaqutaannut ilaasut kiisalu kiffartortut atorfillit aammalu kiffat akileraaruserneqassapput naalagaaffiit aallartitaat pillugit Wien-imi naalagaaffiit isumaqatigiissutaanni maleruagassat naapertorlugit.

- 4) Naalagaaffiit takornartat maani konsulii, konsuleqarfinni atorfillit, inuit taakkua ilaqutaannut ilaasut kiisalu kiffartortut atorfillit akileraaruserneqassapput konsuleqarfiit pillugit Wien-imi naalagaaffiit isumaqatigiissutaanni maleruagassat naapertorlugit.
- 5) Uppeqatigiit akuersaarneqarsimasut ilagiinnilu atorfeqarfiit taakkununga folkekirkemulluunniit atasumik pilersinneqarsimasut.
- 6) Atorfeqarfiit ilinniartitsinermut, inunnik isumaginninnermut kultureqarnermullu tunngasut, tassaagunik atorfeqarfiit imminnut ingerlattut aammalu aningaasarsiaat tamarmik taamaallaat atorfeqarfiup pineqartup siunertaanut atorneqarsinnaappata.
- 7) Inuit, sullivii il.il. kunngeqarfiup Danmarkip Amerikamilu naalagaaffeqatigiit naalakkersuisuisa Kalaallit Nunaata illersorneqarnissaa pillugu isumaqatigiissutaanni allaaserisami VII-imi ilanngunneqarsimasut.
- 8) Peqatigiiffiit, suleqatigiiffiit, iluaqutissiuiffiit, aningaasaatit aalajangersimasunut atugassanngortitat aamma suliffeqarfiit imminnut pigisut Kalaallit Nunaanni angerlarsimaffeqartutut, aammalu timersortarfinni neriniartarfeqarnermik ingerlataqartut.

Imm. 2. Aningaasaateqarfiit, peqatigiiffiit il.il. § 1, imm. 1-imi nr. 13 aamma 14 naapertorlugit akileraartussaataasut tamakkiisumik ilaannakuusumilluunniit akileraartussaajunnaarsitaasinnaapput, aningaasaateqarfiup, peqatigiiffiup il.il. malittarisassamikkut anguniagarippassuk tamanut ajunngitsuliorniartuunissaq allatulluunniit iluaquusiiniartuunissaq. Tamatumunnga Naalakkersuisut aalajangiisuussapput.

Imm. 3. Selskabinik suliffeqarfinnillu, Kalaallit Nunaanni atortussiassat aatsitassanit pisut il.il. pillugit inatsit naapertorlugu aatsitassanik iluaqutigininniarsinnaanermut akuersissuteqarfigineqarsimasunik akileraarusersuineq, aatsitassarsiornissamut pisinnaatitaaffeqalersup akuersissutaani aalajangersakkat malillugit, atorunnaassaaq.

§ 4. Aappariit isertitaminnik ataatsimut akileraarusigaassapputukiup aningaasarsiorfiup naanerani tamarmik tamakkiisumik akileraartussaataitaallutillu piffissamilu inooqatigiikkunik imaluunniit ukiup aningaasarsiorfusup ingerlanerani averusersimaqqaarnatik inooqatigiinnertik taamaatissimagunikku.

Imm. 2. Aappaq qaammatisiutit malillugit ukiup ingerlanerani akileraartussaataitaalerpat akileraartussaataajunnaarpalluunniit tamaallaat imm. 1 naapertorlugu ataatsimut akileraarusigaassapput piffissami tamarmik tamakkiisumik akileraartussaaffimmini.

§ 5. Meeqqat immikkut akileraartussaapput.

Imm. 2. Meeraq angajoqqaaminit, ataatassaminit/anaanassaminit, angajoqqaarsiaminit imaluunniit aataminit aanaminilluunniit aningaasanik pisuussummilluunniit tunissutitut pisimappat aningaasanik tunissutit pisuussummilluunniit iluanaarutisat tunisisumi akileraarusigaassapput, tunisisoq tamakkiisumik akileraartussaataitaappat. Tamannali taamaallaat atuuppoq qaammatisiutit malillugit ukiup meeqqap 18-inik ukioqalerfiata naanerata tungaanut imaluunniit meeqqap katinnerata tungaanut.

Imm. 3. Meeraq ukiup aningaasarsiorfusup aallartinneqarfiup 15-inik ukioqalersimanngitsoq inuussutissarsiorluni sullivimmi angajoqqaaminit, ataatassaminit/anaanassaminit, angajoqqaarsiaminit, aataminit aanaminilluunniit ingerlanneqartumi suliffeqarpat taakkua aningaasarsiamik akileraaruteqaataasussat naatsorsorneranni meeqqap akissarsiai ilanngaatisinnaanngilaat aammalu meeqqap aningaasarsianik akileraaruteqaataasussanik naatsorsuinermini akissarsiat taakku ilanngutissangilai.

Imm. 4. Angajoqqaat, ataatassap/anaanassap, angjoqqaarsiat, aatap aanalluunniit meeqqamut inuussutissaqartitsissutitut tamakkiisumik ilaannakortumilluunniit akilersuutigisimasaat meeqqap aningaasarsiaanut ilanngullugit naatsorsuunneqassanngillat tassaanngikkunik pilersuutitut akilersuutit imaluunniit akilersuisup inuussutissarsiorluni sulliviutaani sulinermi akissarsiat aammalu akilersuisup aningaasarsiaanit akileraaruteqaataasussanit ilanngaatineqarsinnaasut.

Kapitali 2

Akileraartussaataitaanerup annertussusia, atulernera atorunnaarneralu

§ 6. Akileraartussaataitaaneq matuma kinguliini aalajangersakkat tunngavigalugit allannguutaasut (immikoorutaasut) eqqaassanngikkaanni atuutissaaq akileraartussaataitaanermut patsisissaatitat § 1-imiittut § 2-miittulluunniit equussimatillugit.

§ 7. Inuk Kalaallit Nunaanni najugassarsisoq tamatumunngali peqatigitillugu tassani najugaqalersimanngitsoq § 1, imm. 1, nr. 1, malillugu akileraartussaataitalissaaq aatsaat Kalaallit Nunaanni najugaqaleruni, tamatumunnga taamaattutut isigineqanngilaq feeriarnermi assigisaanilluunniit pissuteqarluni Kalaallit Nunaanniillatsiarneq.

§ 8. Inunnut § 1, imm. 1, nr. 2-mi taagorneqartunut akileraartussaataitaaneq Kalaallit Nunaanniinnerup akileraartussaataitaanermut pissutaasup aallaqqaataanit atuutilissaaq.

Imm. 2. Inunnut takornariaallutik ilinniarnarlunniit pissutigalugu Kalaallit Nunaanniittunut, Kalaallit Nunaanniinnerminnillu namminersorlutik inuussutissarsiummik ingerlatsinngitsut aammalu Danmarkimut, Savalimmiunut nunagisaminnulluunniit aningaasarsiaminnit nunaminni malittarisassat tunngavigalugit akileraartussaataitaajuaannartut, § 1, imm. 1, nr. 2 malillugu akileraartussaataitaaneq atuutilissaaq aatsaat atasuinnarmik kipeqattaartumilluunniit Kalaallit Nunaanniinneq ukiut marluk ingerlaneranni katilluni ullunik 365-inik amerlanerusunik sivilissuseqarpat.

§ 9. Inuk Kalaallit Nunaanni akileraartussaataitaq toquppat akileraartussaataitaaneq toqukkut qimagunnermi atorunnaassaaq.

§ 10. Aapparisaq toquneranutatillugu aappaasup qimagaasup aappariinnermi ataatsimut pigisat kingornussisussanut agguassinertaqanngitsumik piginnagassarilerpagit sivilissusequmik inuusup ukiumi aningaasarsiorfimmi toqqiusumi aappariit isertitarisimasaat tamaasa akileraartussaataitaaffigilissavai. Aappariinnit toqukkut qimagaasup toqukkut qimaguttup akileraartarnermut tunngatillugu pisussaaffi tamakkiisumik pisussaaffigilissavai.

Imm. 2. Aapparisaq qimagaasup Kalaallit Nunaanni kingornussisarneq pillugu inatsit naapertorlugu immikkut pisinnaatitaaffini atoriigai, kingornussarsiasanik agguassinertaqanngitsumik pigisanik qimatat qimagaasumut tunniunneqarpata, maleruagassat imm. 1-imiittut taamatuttaaq atuutissapput.

§ 11. Kalaallit Nunaanni akileraartussaataitaq toquneranut atatiinnarlugu pigisat qimatat kingornussarsiatut agguanneqarpata toqusup ukiumi aningaasarsiorfimmi toqqigisaani aningaasarsiaanit akileraarutissai aningaasarsianit akileraarutaagallartut toqunerup siornatigut

akiligassanngorsimasut imaluunniit aningaasarsianit tamatuma siornagut pisassarineqalersimasunit akileraarutit unerartinneqartussat akilernerisigut inaarutaasumik akilernerqarsimasutut isigineqassapput.

Imm. 2. Taamaakkaluartuq akileraaruseriffimmit toqukkullu qimaguttup pigisanik qimataanik suliaqarnermi piumasaqaatigineqarsinnaavoq ukiup aningaasarsiorfiup aallartinneranit ulloq toqqiik tikillugu toqukkut qimaguttup aningaasarsiai inaarutaasumik annertussusilerneqassasut. Ukiup aningaasarsiorfiusup aallartinneranit ulloq toqqiik tikillugu akileraarutissatut inaarutaasumik naatsorsorneqartut akileraarutaagallartunit ulloq toqqiup siornatigut akilernerqartussanngorsimasunit imaluunniit tamatuma siornagut aningaasarsianit akileraarutit unerartinneqartussanit minnerpaamik 4.000 koruuninik amerlaneruppata, akileraarutissat amigaataasut pigisanik qimatanit akilernerqassapput. Akileraarutaagallarsimasut tamatumani pineqartut akileraarutissatut inaarutaasumik naatsorsukkanit minnerpaamik 500 koruuninik sinnersimappatigit, aningaasat akilernerqarsimasut amerlavallaarutaasa utertillugit akilernerqarnissaat pigisanik qimatanik suliami piumasaqaatigineqarsinnaavoq.

Imm. 3. Inaarutaasumik annertussusiliinissamik imm. 2 malillugu akileraaruseriffiup piumasaqaataa kingusinnerpaamik pissaaq ulloq toqqimmit qaamatit pingasut qaangiutinginneranni. Ulloq toqqimmit qaammat qaangiutereersoq § 108, imm. 9 malillugu paasissutissat pissarsiarineqarpata annertussusiliinissamik piumasaqarnissaq paasissutissat pissarsiarineqarnerannit qaammatit marluk qaangiunnissaata tungaanut pisinnaavoq.

Imm. 4. Toqukkut qimaguttup pigisaanik suliaqarnermi piumasarineqarpat imm. 2, naapertorlugu annertussusiliineqassasoq tamanna akileraaruseriffimmut kingusinnerpaamik ulloq toqqimmit qaammatit pingasut qaangiutinnginneranni pissaaq.

Imm. 5. Imm. 3-mi 4-milu eqqartorneqartutut pisoqartillugu toqukkut qimaguttup pigisaanik suliaqarnermi nammineerluni nalunaarsuut nalinginnaasoq kingusinnerpaamik qaammatit tallimat qaangiutinnginneranni nassiunneqassaaq. Imm. 3-mi oqaaseqatigiit aappaat najoqqutaralugit piumasaqarneq ulloq toqqimmit qaammatit pingasut qaangiutereersut pippat nammineerluni nalunaarsuummik nassitsinissamut piffissarititaasoq kinguartinneqassaaq inaarutaasumik annertussusiliinissamik piumasaqaatip kingorna kingusinnerpaamik qaammatit marluk qaanngiunnerannut.

Imm. 6. Imm. 2 najoqqutaralugu inaarutaasumik annertussusiliinermi pigisat akileraartarnermi malittarisassat malillugit akileraarutitigut nalikillilerneqarsinnaasut akileraartarnermi nalikilliliinermut malittarisassat malillugit suliarineqassapput.

Imm. 7. Inuussutissarsiutigalugu iluanaapallaniutigalugillu pigisat imm. 2 malillugu inaarutaasumik annertussusiliinermi ullormi toqqimmi tunineqarsimasutut isigineqassapput. Tunineqarnermi naligitinneqartutut isigineqassaaq ullormi toqqimmi nalinginnaasumik tunineqartuugunik akigisinnaasaat (nalingat).

Imm. 8. Toqukkut qimaguttup pigisanik qimatai naleqanngingajappata agguaassineqanngippallu maleruagassat imm. 1-imiittut taamaallaat atuutsinneqassapput.

Kapitali 3

Aningaasarsiat akileraaruteqaataasussat

§ 12. Aningaasarsiat akileraaruteqaataasussat ukiumi aningaasarsiorfimmi aningaasarsiat tunngavigalugit naatsorsorneqassapput. Ukioq aningaasarsiorfik tassaavoq qaammatisiutit malillugit ukiup

akileraarutissiiviusup siulia. Ukiup ilaannaani akileraartussaaneqarpat ukioq aningaasarsiorfik tassaavoq piffissaq aningaasarsiorfiusoq taaneqartoq. Aningaasarsiat annertussusiligaanerat piffissamut ukiumit sivikinnerusumut tunngasuuppat annertussusiliinermilu akileraartussaasoq ilanngaatisaqqartinneqarpat, tamatumani aamma ukiumoortumik annertussusiligaasumik inummoortumik ilanngaammik, taakkua ukiumut ilanngaatisaatitap ilaanik piffissamut naapertuuttumik annertussuseqartitaallutik ilanngaatisaatitaassapput.

Imm. 2. Akileraaruseriffiup selskabit, peqatigiiffiit il.il. qinnuteqarnerisigut akuerisinnaavaa ukiumut aningaasarsiorfiusumut piffissaliussap allap qaammatisiutit malillugit ukiumit allaanerusup atornissaa. Taamatut ukiumut aningaasarsiorfiusumut piffissaliussaq toqqarneqarsimasoq akileraaruseriffimmit akuersissuteqartoqartinagu allanngortinneqarsinnaanngilaq. Ukiumut aningaasarsiorfiusumut piffissaliussap qaammatisiutit malillugit ukiumit allaanerusup akuerineqarnissaanut piumasaqaataavoq aallartiffia qaammatip aallaqqaataaniussasoq. Taamatut akuersissuteqarnermut atatillugu akileraaruseriffiup nammineeirluni nalunaarusiap nassiunnissaanut akileraarutillu akiligassat akilerneqarnissaannut immikkut piffissarititat aalajangersinnaavai.

§ 13. Aningaasarsiat akileraaruteqaataasussanut ilaapput, Inatsisartut inatsisaat manna malillugu ilaasussaatitaangitsut killiliinerillu kisiisa pinnagit, akileraartussaataitaasup ukiumut aningaasarsiai tamarmiusut, Kalaallit Nunaannit pisuuneri pisuunnginneriluunniit, aammalu aningaasaanersut imaluunniit pisuussutaagunik aningaasanik naliliunersut apeqqutaatinngit.

Imm. 2. Inuup sulisussarsiarineqarsimalluni nammineq sulinermini akissarsiai ukiumi tunniunneqarfianni akileraaruteqaatigineqassapput. Aningaasarsisussaq aningaasarsiassaminik tigusitinnani akileraartussaajunnaarpat aningaasarsiassat akileraaruteqaatigineqassapput kingusinnerpaamik piffissami akileraartussaataitanerup atorunnaarfiani.

§ 14. Aningaasarsiat akileraaruteqaataasussat soorlu makkuupput:

- 1) Inuussutissarsiutitut ingerlassamit sumilluunniit aningaasarsiat, s.i.: niuernermit, suliffissuaqarnermit, assassorluni sulinermit, umiartornermit, aalisarnermut, piniarnermit, aallaaniarnermit savaateqarnermillu aningaasarsiat, aamma aningaasarsiat ingerlatseqatigiiffinni (interessentskab), umiarsuaatileqatigiinni, peqatigiinni assigiinngitsunik akisussaassuseqartunik ilaasortalinni (kommanditselskab) imaluunniit aktieselskabini assigiinngitsunik akisussaassuseqartunik peqataasoqarfusuni peqataanikkut pinertut, imaluunniit aningaasarsiat toqukkut qimaguttup pigisanik qimataasa pisortatigoortumik imaluunniit inuinnartigoortumik agguanneqartut pisassaqaqtitsinerisigut pineqartut, ilisimatusarnermi, eqqumiitsuliornermi imaluunniit atuakkiornermi sulinermit akissarsiat, imaluunniit suliaq, kiffartuussineq imaluunniit ikiuineq sunaluunniit aqputigalugu akissarsiat tamat,
- 2) akiliisitsilluni attartortitsinikkut aningaasarsiat, soraarnerussutisiat, soraarnerussutisiatut aamma sillimmasiinertigoortumik pisartakkat, ikiorsiussutitigut inuuniarnermullu atugassatut akilersuutitigut aningaasarsiat, akiliinani allat pigisaannik atuinertigut tunissutisiatigullu aningaasarsiat, taamaattoq tak. § 34, imm. 1, nr. 3, obligationinit allanillu pisassanit erniatigut aningaasarsiat,
- 3) aktianit anpartinillu, taamaattoq tak. § 86, piginneqataanermit uppernarsaatinit (andelsbevis) pappiaranillu aningaasanik nalilinnit iluanaarutisiatigut aningaasarsiat, taamaattoq tak. § 34, imm. 1, nr. 7. Andelsbevisinit iluanaarutisiatut isigineqarput suulluunniit peqatigiinnit sullivimmilluunniit piginneqataasunut ukiumi aningaasarsiorfimmi kingullermi imaluunniit siusinnerusumi iluanaarutinit

pisassaqaatitut tunniunneqartut tamarmik, tunniussat iluanaarutinit agguagarsiatut (dividende)

imaluunniit peqatigiiffiup ingerlatsiunnaarneratigut agguagarsiatut pineqarsimappata assigiimmik, aammalu

4) nammineq illumi inigisap aningaasatigut nalinga, taamaattoq tak. § 34, imm. 1, nr. 5. Illumi nammineq pigisami inigisap nalinga aalajangerneqassaaq Kalaallit Nunaanni ineqarnermut akiliutitut maleruagassiat il.il. atuuttut naapertorlugit.

§ 15. Erniat isertitatut akileraaruserneqassapput ilanngaatineqassallutilluunniit ukiumi aningaasarsiorfusumi erniat akilerneqartussaalferianni. Ernianulli aningaasartuutit siumoortumik akiligassaalersut ukiumi aningaasarsiorfusumi attuumassuteqarfigisaanni ilanngaatineqassapput, § 12, imm. 1 naapertorlugu. Akiligassaqartorli erniat akiligassanngortut akilernissaannut akissaqanngippat, erniat ilanngaatineqassapput isertitatulluunniit akileraaruserneqassapput ukiumi aningaasarsiorfusumi erniat akilerneqarfigisaanni. Akileraaruseriffiup suliffeqarfiit aningaasalersuinerimik ingerlataqartunut suliffeqarfinnullu allanut, taamatut naatsorsueriaaseqarnermik atuisussatut isigisariaqartunut, akuersissuteqarsinnaapput, erniat isertitatut akileraaruserneqassasut ilanngaatineqarlutilluunniit ukiumi aningaasarsiorfusumi ernianut attuumassuteqarfigusumi. Taamatut periuseqarnissamik toqqagaasoq kingusinnerusukkut allanngortinneqarsinnaanngilaq.

Imm. 2. Akileraartussaanerup aallartinnerani toqumik patsiseqanngitsumik allamik patseqartumik akileraartussajunnaarnermi erniatigut isertitat aningaasartuutilluunniit il.il., piffissamut inuup pineqartup akileraartussaanerata nalaanut attuumassuteqartut, akileraarutaasussanik isertitat naatsorsorneqarneranni ilanngunneqassapput ilanngaatineqassallutilluunniit. Ernianik isertitat ilanngaatisalluunniit il.il. piffissamut attuumassuteqarfigisaannut agguanneqassapput. Agguaassinermi piffissaq akileraartussaanerup aallartinnerani akileraartussajunnarfimmiluunniit erniat kisimik pineqarput.

Imm. 3. Ernianut atasunut ilanngunneqartunulluunniit akiliutit, pisassarisanik erniaqartitanik allamut tunniussinerimik, isertitat naatsorsorneqarneranni akiliutinik pisassaqaartumi ilanngunneqassapput. Akiliutit ilanngaatineqassapput akiliutinik akiliisussaasup isertitaanik naatsorsuinerimik. Akiliutit ilanngunneqassapput ilanngaatineqarlutilluunniit ukiumi aningaasarsiorfusumi niueqatigiinnerup piffigisaani. Ernianut atasunut ilanngunneqartunulluunniit akiliutit ukiumi aningaasarsiorfusumi akiligassanngorfigisaanni erniat akileraarutaasussat naatsorsorneqarneranni ilanngunneqassapput. Immikkoortumi tassani maleruagassat akileraartussasunut ernianut aningaasartuutitik ernianillu isertitanik § 15, imm. 1, oqaaseqatigiit sisamaanni taaneqartutut agguataarisunut atuutinngillat.

Imm. 4. Illu Kalaallit Nunaata avataani inissisimappat tassunga tunngasunik isertitat aningaasartuutillu, soorlu illu qularnaveeqqusiullugu atukkat erniaannut aningaasartuutit, illumik pigisaqartup akileraarutaasussatut isertitanut ilanngussinnaanngilai. Naalakkersuisut pissutissat immikkorluinnaq ittut ilalersorpasuk, Kalaallit Nunaata avataani illuutigisamut atatillugu amigartoorutit tamakkiisumik ilaannakortumilluunniit ilanngaatineqarsinnaanerata akuersissutigisinnaavaat.

§ 16. Immikkoortumi uani obligationit pillugit maleruagqusat inuinnarnit qularnaveeqqusikkanik taarsigassarsinerimut allagartanut pisassarisanullu aamma taamatuttaaq atuupput.

1) Selskabit, aningaasaateqarfiit, peqatigiiffiit il.il. § 1, imm. 1, nr. 3-mit – 13-imut taagorneqartutut ittut obligationinik tunisaqarnermi, nalinginik tigusaqarnermi imaluunniit obligationiutigisap makinneqarnerani

iluanaarutit annaasaqaatilluunniit akileraarutaasussanik isertitat naatsorsorneqarneranni ilanngutissavaat.

2) Obligationinik tunisaqarnermi, nalinginik tigusinermi imaluunniit makinneqarnerini iluanaarutit annaasaqaatilluunniit naatsorsorneqassapput tunineqarneranni pisarineqarnerannilu akiisa assigiinngissutaattut.

3) Obligationit nalinginik tigusineq naafferartumik akilersuinikkut pippat, iluanaarutit annaasaqaatilluunniit naatsorsorneqassapput, naafferartumik tigusaqarnerit tamarmik procentii imatut annertussusilerlugit, pisarinerani naligitamik procentinik qassinik qaangiisimaneri inorsarneriluunniit najoqqutaralugit.

4) Akileraaruseriffiup allatut naatsorsueriaaseqarnissaq akuersissutigisinnaavaa. Akuersissut taamaattoq tunniunneqarsimappat, tamatumani naatsorsueriaaseq akuerineqartoq taamaallaat allangortinneqarsinnaavoq akileraaruseriffiup akuersineratigut, taamaallaallu pisimasunit immikkorluinnaq ittunit tamanna tapersorsorneqarpat.

Imm. 2. Immikkoortumi uani aktiat pillugit maleruaqqusat taamatuttaaq anpartsselskabini piginneqataanernut, piginneqatigiiffinni piginneqataanermut allagartanut pappiaqqanullu aningaasanik nalilinnut assingusunut atuuttuupput.

1) Selskabit, aningaasaateqarfiit, peqatigiiffiit il.il. § 1, imm. 1, nr. 3-mit – 13-imut taagorneqartutut ittut, aktianik tunisaqarnermi iluanaarutit annaasaqaatilluunniit akileraarutaasussanik isertitat naatsorsorneqarnerannut ilanngutissavaat. Tamannattaq atuuppoq aktianik pisinissamut salliutitaasinnaanerup aammalu aktiasisinnaanermik periarfissaqarnerup tuninerani iluanaarutinit annaasaqaatinulluunniit. Aktianilli tunisaqarnermi annaasaqaatit taamaallaat ilanngaatigineqarsinnaapput aktianit taakkunannga § 34, nr. 11 malillugu akileraaruserneqartussaannngitsunik, aammalu § 27, imm. 4 naapertorlugu pissarsianut ilanngaataasinnaasunut milliliissutaasimanngitsunik, iluanaarutinit annaasaqaatit annertuneruppata.

2) Ingerlatseqatigiiffiup atorunnaarsinnerani pigisanik agguagarsinermi iluanaarutit ajunaarutilluunniit akileraaruserneqassapput ukiumi aningaasarsiorfusumi ingerlatseqatigiiffiup atorunnaarsivinneqarfani.

3) Tunisaqarnermi iluanaarutit annaasaqaatilluunniit naatsorsorneqassapput tunisaqarnermi akigititap pisinermilu akiusup nikingassutaattut. Fondsaktianik (ingerlatseqatigiiffiup sillimmataanik tunngaveqartunik) aktianillu pissarsinissamut pisinissamullu pisinnaatitaaffiit qaqugukkut pissarsiarinerinut pissarsiarinerinilu akigisinnaasaannut Naalakkersuisut sukumiinerusumik maleruagassiussapput.

4) Akileraaruseriffiup allatut naatsorsueriaaseqarnissaq akuersissutigisinnaavaa. Akuersissut taamaattoq tunniunneqarsimappat, tamatumani naatsorsueriaaseq akuerineqartoq taamaallaat allangortinneqarsinnaavoq akileraaruseriffiup akuersineratigut, taamaallaallu pisimasunit immikkorluinnaq ittunit ilalersorneqarpat.

Imm. 3. Selskabit, aningaasaateqarfiit, peqatigiiffiit il.il. § 1, imm. 1, nr. 3-mit – 13-imut taagorneqartutut ittut, illuutininik § 24, imm. 1, nr. 1 naapertorlugu nalikilliliivigineqarsinnaannngitsunik tunisaqarnermi iluanaarutit annaasaqaatilluunniit akileraarutaasussanik isertitat naatsorsorneqarnerannut ilanngutissavaat.

1) Iluanaarutit ajunaarutilluunniit naatsorsorneqassapput tunisinermi akigititap pisinermilu akiusup nikingassutaattut.

2) Tunisinermi akigititap pisinermilu akiusup naatsorsorneqarnissaannut Naalakkersuisut sukumiinerusunik maleruagassiussapput.

§ 17. Aningaasanut tunngasunut isumaqatigiissutitigut iluanaarutit isertitat akileraaruteqaataasussat naatsorsorneqarnerini ilanngunneqassapput, takuulli imm. 2 aamma 3. Ukiumi aningaasarsiorfusumi annaasat ukiumi tassani iluanaarutinit ilanngaatineqarsinnaapput, aammalu § 30, imm. 1-imi, 3-mi aamma 4-mi malittareqqusat naapertorlugit ilanngaattissat peereerlugit annaasat ukiuni kingusinnerusuni ilanngaattissat peereerlugit aningaasanut tunngasunut isumaqatigiissutitigut iluanaarutinit ilanngaattissanngorlugit nuunneqarsinnaapput.

Imm. 2. Imm. 1 makkununga atorineqassanngilaq:

1) Aktianik il.il. pisinissamut pininnaatitaaffinnut.

2) Pigisat aalaakkaasut pillugit isumaqatigiissutinit.

3) Realkreditimit, realkreditimulluunniit assingusumit attartornissami atukkalluunniit tamakkerlugit taarsiinissami akiusut nalinginik allanngutsaaliinermut atatillugu piffissami isumaqatigiissutaareersumi imaluunniit siunissami piffissamut aalajangersimasumut isumaqatigiissut malillugu obligationinik tunisinermut pisinermullu.

4) Obligationit, qularnaveeqqusiinermut uppersarsaatit, akiitsunut uppersarsaatit aningaasanillu pisassanut allanut atatillugu uppersarsaatit allanik taarsersinnaaneritut pininnaatitaaffinnut.

Imm. 3. Inuussutissarsiornermut inuussutissarsiornermiluunniit ingerlatsivimmut atatillugu isumaqatigiissutaasimasunut inatsisartut inatsisaanni aalajangersakkat nalinginnaasut naapertorlugit atuutissapput.

Imm. 4. Iluanaarutit annaasalluunniit imm. 1-imi taaneqartut naatsorsorneqartassapput tuniniaanermi periaaseq naapertorlugu tuninerani akiusup pisiarineqarneranilu akiusup assigiinngissutaattut.

Imm. 5. Immikkut pissutissaqartoqartillugu isumaqatigiissutit imm. 1-imi pineqartut Inatsisartut inatsisaanni maleruagassat nalinginnaasut naapertorlugit akileraaruserneqarnissaat Naalakkersuisunit, taakkunangaluunniit taamaaliornissamut piginnaatinneqartumit akuersissutigineqarsinnaavoq.

§ 18. § 1, imm. 1, nr. 1-imi 2-milu inuit pineqartut aningaasarsiaminnik akileraarutaasussanik naatsorsuinerminni iluanaarutinit pisassarisanik tunisinikkut, tamakkiisumik ilaannakuusumilluunniit akiliinikkut imaluunniit makitsinikkut pissarsiarineqartutigut iluanaarutit ilanngullugit naatsorsussavaat, pisassarisat imm. 2-mi taaneqartut eqqarsaatigalugit, pissarsiarineqartut imm. 3-mi aalajangersarneqarsimasutut erniat ikinnerpaaffissaattut amerlatigisunik taakkuninngaluunniit amerlanerusunik ernialersorneqanngikkunik.

Imm. 2. Pisassarisanik oqarnermi pineqartut tassaapput aningaasanik pisassarisat sulluunniit, tamatumani aamma obligationit, qularnaveeqqusiinermut uppersarsaatit, pappiaqqat aningaasanik nalillit (statsgældsbeviser), pappiaqqat aningaasanik nalillit (skatkammerbeviser) aamma suliffeqarfiit akuerineqarneritut uppersarsaatit (virksomhedscertifikater).

Imm. 3. Erniat ikinnerpaaffiat akileraaruseriffimmiit nalinginnaasunik ukiup affaanut marlunnut, januarimiit junimut aamma julimiit decemberimut aalajangersarneqartassapput.

Imm. 4. Pisassarisat tunineqarnerisigut utertillugilluunniit akilerneqarnerisigut iluanaarutit naatsorsorneqartassapput tassaatillugit pisiarinerini akiliutigineqartut aamma tunisinermi utertillugilluunniit akiliinermi akigineqartut nikingassutaat. Utertillugit akiliineq naafferartumik

akilersuinikkut pippat iluanaarutit naatsorsorneqassapput naafferartumik akiliutigineqartunit tamanit procentiinik pappiaaqat naleqassusiisa pisinermit akiliutigineqartunit qaangiinerup procentiisa amerlaqataannik.

Imm. 5. Pisassarisanit imm. 1-mi taaneqartunit iluanaarutit annaasalluunniit § 34, imm. 1, nr. 2-mi ilaatinneqarsinnaanngillat.

§ 19. Aningaasarsiat akileraaruteqaataasussat naatsorsorneranni biilip, akileraartartup sulisitsisuminit atorfinitsitaanerminut allatulluunniit ikiuulluni sulinissaminik isumaqatigiissuteqarnerminut atatillugu privatimik atorsinnaasaata nalinga ilanngunneqassaaq, tak. Imm. 2-miit 8-mut. Tamanna aamma atuuppoq inunnut siulersuisuni, ataatsimiititaliani, kommissionini, siunnersuisooqatigiinni, immikkut qinikkani allatulluunniit ataatsimoorfusuni, tamatumani ilanngullugit Naalakkersuisunut, Inatsisartunut kommunalbestyrelsinullu ilaasortatut qinerneqarsimasunut tamakkununngaluunniit ikiortaasunut.

Imm. 2. Illoqarfik biilip privatimik atorneqarfia 75.000 kvadratmeterisut annertutigisumik annertunerusumulluunniit aqqusineqarpat, biilip imm. 1-mi pineqartup akileraarutitigut nalinga ukiumut 40.000 koruuninik annertussusilerneqassaaq.

Imm. 3. Illoqarfik biilip privatimik atorneqarfia 25.000 kvadratmeterinit 75.000 kvadratmeterillu akornanni annertutigisumik aqqusineqarpat, annertussusiliussaq imm. 2-mi taaneqartoq 20.000 koruuninut appartinneqassaaq.

Imm. 4. Illoqarfik biilip privatimik atorneqarfia 25.000 kvadratmeterit inorlugit annertutigisumik aqqusineqarpat, annertussusiliussaq imm. 2-mi taaneqartoq 10.000 koruuninut appartinneqassaaq.

Imm. 5. Biilit sulliviittut aqqissukkat biilinillu immikkut sanaajusunik allanik privatimik atuineq angissusiliussat imm. 2-miit 4-mut taaneqartut affaannut annertussusilerneqassaaq. Biilit tamaattut sulisitsisup allaganngorlugu peqqussuteqarneratigut angerlarsimaffiup suliffiullu akornanniinnaq atorneqartarpata annertussusiliussat imm. 2-miit 4-mut taaneqartut sisamararterutaannut annertussusilerneqassapput.

Imm. 6. Lastbiilinik 4 tonsit sinnerlugit oqimaassusilinnik kiisalu biilinik tankiminni usisartunik, kraninik kivitissutinik aammalu eqqaasut biiliinik privatimik atuineq akileraaruserneqartussaannngilaq.

Imm. 7. Biilit ukiup ilaannaani atugassaritinneqarpata nalingat akileraaruteqaataassussaq ullunik biilinik atuiffiunngitsunik ilanngarlugu appartinneqassaaq. Akileraartussaataasooq biilit atorsinnaanerinit akiliuteqarpat, nalinga akileraaruteqaataasussaq aningaasanik akiliutigineqarsimasunik ilanngarlugu appartinneqassaaq.

Imm. 8. Sulisitsisup allaganngorlugu peqqussutigisimappagu akileraartussaataasooq suliartoqquneqarnermini biilinik atuissasooq, akileraartussaataasup angerlarsimaffimmi suliffimmilu akornanni biilimik atuinera privatimik atuineranut isigineqassanngilaq, aatsaalli akileraartussaataasup suliartoqquneqarsinnaanermit nalaani biilit privatimik atugassarinnngippagit.

§ 20. Inunnut tamakkiisumik akileraartussaasunut aningaasarsiat B-t, takuuk § 74, aningaasarsiallu § 75, imm. 2, nr. 2-mi taaneqartut, tamatumani ilaallutik namminersorluni inuussutissarsiornermit aningaasarsiat tamarmiusut, taamaallaat akileraaruserneqassapput aningaasarsiat taakkua katillugit imm. 2-mi aalajangersarneqarsimasut qaangersimappatigit. Appariinnut aningaasarsiat akileraaruteqaataasussaannngitsunut inummut ilanngaati aalajangerneqartarneranut malittarisassat najoqqutaralugit aalajangerneqartassapput, takuuk § 67, imm. 2.

Imm. 2. Aningaasarsiat akileraaruteqaataasusnaanngitsut annertussusiat Inatsisartunit qaammatisiutit malillugit ukiup pineqartup siornagut ukiup affaani siullermi Inatsisartut ataatsimiinneranni aalajangerneqartassapput.

§ 21. Inuit tamakkiisumik akileraartussaataitaasut aningaasarsiaasa akileraaruteqaataasussat naatsorsorneranni ilanngaas aalajangersimasooq (standardfradrag) ilanngaatigineqartassaaq. Aappariinnut ilanngaas aalajangersimasooq inummot ilanngaatip aalajangerneqartarneranut malittarisassat najoqqutaralugit aalajangerneqartassaaq, takuuk § 67, imm. 2.

Imm. 2. Ilanngaatip aalajangersimasup annertussusia Inatsisartunit qaammatisiutit malillugit ukiup pineqartup siuliani ukiup affaani siullermi Inatsisartut ataatsimiinneranni aalajangiunneqartassaaq.

Imm. 3. Akileraartussaataitaasup aningaasarsiaasa naatsorsorneranni ilanngaatigisinnaasani ukiumut aningaasarsiorfusumut pineqartumut ilanngaatissatut annertussusiliisimanermit annertunerunerat uppersarsimappagu, aningaasartuutit amerlanerusut ilanngaatigitinneqarsinnaapput.

§ 22. Selskabit il.il. nalikillilerneqarsinnaasutut taasanut attuumassuteqartumut nalikilliliisinnaanermut nalunaarummi § 24, imm. 1, nr. 1 naapertorlugu, pigisat nalilinnik taaneqartunit annerpaamik akileraarutitigut nalikilliliisinnaapput tassani imm. 2-mi nalikillilerneqarsinnaasut angeqqataannik, aammalu ingerlatseqatigiiffup naatsorsuutimini akileraarutit ilanngaatiginagit sinneqartoorutaata affaanut naapertuuttumik ilasamik, akileraarutitigulli nalikilliliisoqareerneranut naapertuuttunik, takuuk imm. 2 aamma 5.

Imm. 2. Ukiunut ataasiakkaanut akileraarutitigut nalikilliliissutit annertunerpaamik nalinut ukununga naapertuutissapput:

- 1) Illuutit atortullu ikkussorneqarsimasut pissarsiarineranni nalingisa ukiumut 5 procentii angullugit nalikillilerneqarsinnaapput.
 - 2) Umiarsuit timmisartullu pissarsiarineranni nalingisa ukiumut 10 procentii angullugit nalikillilerneqarsinnaapput.
 - 3) Nalikillilerneqarsinnaasunut allanut aningaasartuutit il.il. aammalu ingerlatsinermut atortut, pequtit pissarsiarineranni nalingi aammalu pigisanut piffissami killilimmi pisinnaatitaaffinnut akiliutitut il.il. 30 procentii angullugit nalikillilerneqarsinnaapput, ukiup aningaasarsiorfusup naanerani pigisap nalikillilerneqarsinnaasup nalinganit tunngaveqartumik.
 - 4) Pigisanut nr. 3-mi taaneqartunut aningaasartuutit imaluunniit pissarsiarineranni nali 100.000 koruuniuppata taakkualuunniit ataallugit naleqarpata 100 procentii angullugit nalikillilerneqarsinnaapput.
- Imm. 3.* Selskabit nr. 3-mi aamma 4-mi taaneqartunik pigisallit, nalikillilerneqarsinnaasunut aningaasartuutit aammalu pigisanut nalilinnut il.il. kontomik ataatsimut naatsorsuiffusussamik naatsorsuuteqassapput. Ukiumi nalikilliliissutit ukiup aningaasarsiorfusup naanerani nalikillilerneqarsinnaasup nalinga tunngavigalugu nalikilliliissutigineqartassapput. Naliusooq taanna ukiup aallartinnerani naliusup nakilliliissutaasinnaasutut aningaasartuutit imaluunniit ingerlatsinermut atortut il.il. pissarsiarineranni nalinginik ilallugit naatsorsorneqartassapput, taakkua ukiumi aningaasarsiorfusumi pissarsiarineqarsimappata, aammalu ukiumi ingerlatsinermut atortut il.il. ukiumi aningaasarsiorfusumi tuninerini nalinginik kiisalu nr. 4 naapertorlugu nalikilliliissutaasunik ilanngaateqartillugit. Pitsanngorsaatitut aningaasartuutit pissarsineri naliusutut suliarineqartassapput. Ukiup aallartinnerani naliusooq tassaavoq ingerlatsinermut atortut il.il. ukiuni siusinnerusuni

pissarsiarinerisa nalingi aammalu aningaasartuutit nalikilliliissutit ilanngareerlugit nalingat.

Imm. 4. Nr. 3-mi aamma 4-mi pigisanik taaneqartunik tunisinikkut naliusut nalikilliliissutigineqarsinnaasup sinnera qimmussimappassuk nikingassut, ukiumi aningaasarsiorfiusumi tassani isertitatut ilanngunneqassaaq. *Imm. 5.* Imm. 2-mi maleruagassaq naatsorsuutiginaq selskabit il.il. akileraarutitigut nalikilliliisinaapput, pigisap nalikillilerneqarsinnaasup nr. 1-mi aamma 2-mi pineqartup tuninerani akileraarutitigut iluanaarutigineqarnerata naleqqataanik. Selskabit il.il. tamatuma kingorna aningaasarsiai akileraaruteqaataasussat amigartooruteqartumik angusaqarfiuppata taava akileraarutitigut nalikilliliinerit amigartoorutaasup nalinganut naapertuuttumik annikillilerneqassapput.

§ 23. Inuup § 1, imm. 1, nr. 1 aamma 2 naapertorlugit akileraartussaataasup, imaluunniit § 2 malillugu killilimmik akileraartussaataasup akileraarutitigut nalikilliliissutigisinaasaasa annertunerpaaffigisinaavaat namminersorluni inuussutissarsiuteqarnikkut aningaasarsiaasa amerlaqataat, akileraartarnermi nalikilliliinerit pillugit Namminersornerullutik Oqartussat nalunaarutaanni malittarisassanut naapertuuttumik, takuuk § 24, imm. 1, oqaaseqatigiit aappaat.

§ 24. Aningaasarsiat akileraaruteqaataasussat naatsorsorneranni ilanngaaticigineqarsinnaapput:

- 1) Ingerlatsinermi aningaasartuutit, tassa imaappoq aningaasarsiat piniarnerannut, isumannaalliniarnerannut allanngutsaaliorniarnannullu ukiup ingerlanerani akissaajaataasimasut, taakkununga ilanngullugit akileraartarnermi nalikilliliinerit. Akileraartarnermi nalikilliliinernut maleruagassiat aammalu pigisat nalikillilerneqarsinnaasut allamut tunineranni il.il. iluanaarutit annaasaqaatilluunniit akileraartarnermut tunngasumik suliarineranni maleruagassat naalakkersuisut aalajangissavaat,
- 2) aningaasat akileraartussaataapigisaanik, iluanaarutitaat aningaasarsiatut isigineqartunik, allanngutsaaliuinnermut sillimmasiinnermulluunniit atorneqarsimasut, aammalu
- 3) akiitsut erniaat, taakkunungalut atatillugu sullissinnermut matusissutissatut ingerlaavartumik ernialiuttakkat (løbende provision).

Imm. 2. Eqqugassat, eqquiniutissatut ileqqaakkat pillugit inatsit naapertorlugu eqquiniutissatut kontolinnut aningaaserivinnit eqqugassiissutigineqartartut, aningaaserviup aningaasarsiaasa akileraaruteqaataasussat naatsorsornerini ilanngaaticigineqarsinnaanngillat.

§ 25. Akileraartartumut, Kalaallit Nunaanni aatsitassanik, iluaqutiginninniarluni ingerlatsinermi pineqartumi nalinginnaasumit annertunerusumik suliareqqiinermik ingerlataqartumik suliffiuteqartumut, iluaqutiginninniarluni ingerlatsiviup pilersitaanik tunisassiassanik suliareqqiinnermut atortunik pigisanut toqqaannartumik aningaasaliissutinit ukiumoortumik 10 procent angullugu immikkut ilanngaaticissat pillugit Naalakkersuisut maleruqqusaliorsinnaapput.

§ 26. Akilersuisup aningaasarsiaanit akileraaruteqaataasussanit ilanngaaticigineqarsinnaapput akilersuutit, piffissami akileraartussaaffimmi akiligassanngorlutillu akilernerqarsimasut ataani taagorneqartut:

- 1) Inuuniarnermut atugassatut akilersuutit avinnerup averusernerulluunniit kinguneranik aappaasumit aapparisaq qitornanulluunniit akilersuutigineqartut, aatsaat aapparisaq qitornanulluunniit akilersuuteqartumi najugaqanngippata.
- 2) Aappaasup aappaminut qitornanulluunniit akilersuuteqartumi najugaqanngitsunut

inooqatigiinnigivinnertik pissutigalugu akilersuutigisai.

3) Inuuniarnermut atugassatut akilersuutit uersakkanut akilersuuteqartumi najugaqanngitsunut tunniunneqartartut.

Imm. 2. Qitornat inuuniarnerannut akilersuutit ilanngaatigineqarsinnaatitaanerannut patsisissaatitaatinneqarpoq akilersuuteqartussaaitap pisortanut akisussaassuseqarluni meeqqamik pilersuisussaallunuunniit inuuniarnermut akilersuuteqartussaaitaanera.

Imm. 3. Inuuniarnermut atugassatut akilersuutit imm. 1, nr. 1-mi taaneqartut ulloq aviffik averuserfilluunniit aallarnerfigalugu sunniuteqartumik ilanngaatigineqarsinnaapput. Inuuniarnermut atugassatut akilersuutit imm. 1, nr. 2-mi taaneqartut ulloq inooqatigiinnigivilerfik aallarnerfigalugu ilanngaatigineqarsinnaatitaapput.

Imm. 4. Inuuniarnermut akilersuutit aappaasup akilersuutininik pisartup imaluunniit qitornap akilersuutininik pisartup piffissat imm. 3-mi taaneqartut aallartiffigalugit aningaasarsiaannut akileraaaruteqaataasussanut naatsorsuunneqassapput.

Imm. 5. Akileraaruseriffiup inuuniarnermut akilersuutit aappaasumut qitornanullu agguanneqarnerannut isumaqatigiissut imaluunniit aalajangiineq naatsorsuutiginnitsoorsinnaavaat. Inuuniarnermut atugassatut akilersuutit isumaqatigiissutaasimasut naammaginangivissutut isigineqartariaqarpata aammalu immikkut pissuteqarluni isumaqatigiissut pilersuinissamik siunertaqarani isumaqatigiissutigineqarsimasutut takussutissiippat, taava isumaqatigiissut akileraaruseriffimmit sumiginnarneqarsinnaavoq.

§ 27. Selskabit, brugsforeningit, suliffeqarfilla suleqatigiinnikkut ingerlassat § 1, imm. 1, nr. 3, 4, 6 aamma 7-mi pineqartut aningaasarsiat akileraaaruteqaataasussat naatsorsorneranni iluanaarutit peqatigiit imaluunniit sulliviup ukiumi aningaasarsiorfimmi kingullermi imaluunniit siusinnerusumi iluanaarutigisimasaanit piginneqataasunut ilaasortanulluunniit tunniunneqarsimasut ilanngaatisinnaavaat. Taamatuttaaq § 1, imm. 1, nr. 10-mi taaneqartut peqatigiiffiit erniatigut iluanaarutiminnik pissarsiaminnillu ilaasortaminnut ukiumi kingullermi siusinnerusukkulluunniit ukiumi aningaasatigut isertitaqarfimmit sinneqartoorutiminnik pissarsisitsippata.

Imm. 2. Taamaattorli iluanaarutit § 87 naapertorlugu iluanaarutisianit akileraarutininik unerartitsiffigineqarsimasut aningaasarsiat akileraaaruteqaataasussat naatsorsorneqarneranni ilanngaatigineqarsinnaanngillat.

Imm. 3. Iluanaarutisiat ukiumi aningaasarsiorfusumi kingullermi siusinnerusumiluunniit sinneqartoorutit ilaannit agguagarsiatut aktiaatilinnut, anpartiutilinnut, piginneqataassutilinnut ilaasortanulluunniit tunniunneqartut ukiup aningaasarsiorfiup siuliani aningaasarsianit akileraaaruteqaataasussanit ilanngaatigineqarsinnaanerat akileraaruseriffimmut qinnuteqaateqarnikkut akuersissutigineqarsinnaavoq. Akileraaruseriffimmut qinnuteqaat nammineerluni nalunaarsuiffiup tunniunneqarneranut ilutigitillugu tunniunneqassaaq.

Imm. 4. Selskabit il.il. imm. 1-mi taaneqartut iluanaarutisianik § 34, nr. 11 naapertorlugu akileraarusigassaasimanngitsunik pissarsisimappata, iluanaarutisiarititat il.il. imm. 1 aamma 3-miittut ilanngaatigineqarsinnaasut iluanaarutisiatut akileraaaruteqaataanngitsumik pissarsiarineqarsimasunik millilerneqassapput. Milliliineq ukiumi aningaasarsiorfusumi tassani tamakkiisumik pisinnaanngippat, ukiumilu siusinnerusumi iluanaarutisiatut agguaassanit ilanngaatigineqarsinnaanngippat ukiumut aningaasarsiorfusumut kingusinnerusumut nuunneqassaaq.

Imm. 5. Selskabit il.il. imm. 1-mi taaneqartut iluanaarutisianik § 34, nr. 11 naapertorlugu akileraarusigassaasimanngitsunik pissarsisimasut, iluanaarutisiat annertussusiat kiisalu iluanaarutisiat takkua ilaat qanoq annertutigisut iluanaarutisiarititanut il.il. imm. 1 aamma 2-miittunut ilanngaatigineqarsinnaasunut milliliissutitut atorineqarsimaneri, imaluunniit aktianik tunisaqarnermi annaasanut, § 16, imm. 2, nr. 1 naapertorlugu, ikilisaatitut atorineqarsimaneri pillugit naatsorsuiffimmik nammineerluni nalunaarsuiffimmut ilanngussissapput.

Imm. 6. Imm. 4 aamma § 16, imm. 2, nr. 1 naapertorlugit milliliineq tamakkiisumik pisimanngippat selskabimit pigisamit iluanaarutisiat sippuutaat ukiumi aningaasarsiorfusumi, selskabip piginnittuusup atorunnaarsivinneqarfiani, imaluunniit kingusinnerpaamik piffissami selskabip piginnittuusup § 1 naapertorlugu akileraartussaataitanerata kipinerani, imaluunniit § 3, imm. 1 naapertorlugu akileraartussanngorfiani, imaluunniit § 3, imm. 2 imaluunniit 3 naapertorlugit akileraartussaaajunnaarfiani selskabip piginnittuusup aningaasarsiaanut akileraaruteqaataasussanut ilanngunneqassapput.

§ 28. Sillimmasiisarfiit aningaasat sillimaserneqartut tungaasigut pisussaaffigilikkanut atugassatut toqqorneqartut (akiliutitut sillimmatit aammalu ajunaarutaasinnaasunut sillimmatit) imaluunniit aningaasaateqarfimmut iluanaarutisisitsisartunut atugassatut toqqorneqartut aningaasarsiat akileraaruteqaataasussat naatsorsorneqarneranni ilanngaatigisinnaavaat. Aamma sillimmasiisarfinnit taakkunanga ilanngaatigineqarsinnaapput aningaasat aningaasaateqarfimmut isumannaallisaataasunut toqqorneqartut, piginneqatigiit malittarisassaanni aalajangerneqarsimappat aningaasaateqarfiup isumannaallisaataasup aningaasaatai taamaallaat atorineqarsinnaasut akiliutitut sillimmatit isumannaallisagaanerannut imaluunniit allatut iliorluni sillimateqartitaasumik iluaqusiiniarnermut.

Imm. 2. Kreditforeningit, § 1, imm. 1, nr. 11-mi taaneqartut Kalaallit Nunaanni kreditforeningit pillugit inatsisiliornissami minnerpaamik sillimmatissatut piumasarineqartut naammassinissaannut immikkoortitativit aningaasarsiat akileraaruteqaataasussat naatsorsornerini ilanngaatigisinnaavaat.

Imm. 3. Soraarnerussutisiaqartitsinermi aningaasaateqarfiit § 1, imm. 1, nr. 9-mi taaneqarsimasut aningaasarsiamik akileraaruteqaataasussat naatsorsorneqarnerini ilaasortanut pisussaaffeqarfimmut matussutissatut illuartitativit ilanngaatigisinnaavaat.

§ 29. Selskabit suliffeqarfillu, Kalaallit Nunaanni atortussiassat aatsitassanit pisut il.il. pillugit inatsit naapertorlugu iluaqutiginninniarsinnaanermut akuersissuteqarfigineqarsimasut, aningaasarsianik akileraaruteqaataasussat naatsorsorneqarneranni aningaasat, akuersissut malillugu piiiaajunnaanermut atatillugu salinissaq aningaasatigut qulakkeerniarlugu immikkoortinneqarsimasut ilanngaatigisinnaavaat.

Imm. 2. Ilanngaateqarsinnaanermut piumasaqaataavoq qularnaveeqqusiinermut il.il. atugassarititaasut akuersissummi aalajangersarneqarsimasut naammassineqarsimanissaat.

Imm. 3. Kingusinnerusukkut paasineqarpat salinissamut aningaasartuutit ilanngaatigineqarsimasut angivallaartut, taava ilanngaatigivallaarsimasat ukiumi ilanngaataavallaarsimasutut paasineqarfimmini akileraaruserneqassapput.

Imm. 4. Aatsitassarsiornissamut pisinnaatitaaffeqartup akileraartussaanera kipippat ilanngaataavallaarsimasut imm. 3-mi taaneqartut kingusinnerpaamik akileraaruserneqassapput piffissami akileraartussaanerup kipinerani.

§ 30. Aningaasarsiat akileraaruteqaataasussat ukiumi aningaasarsiorfimmi naatsorsorneqartut amigartoorpata, amigaartoorutit taakkua ukiuni aningaasarsiorfinni tullerni qaninnerpaani tallimani aningaasarsiat akileraaruteqaataasussat naatsorsorneqarneranni ilanngaatineqarsinnaapput. Piffissami tassani ilanngaatisaqq taamaattoq ukiumut aningaasarsiorfimmut kingusinnerusumut aatsaat nuunneqarsinnaavoq ukiumi aningaasarsiorfimmi siusinnerusumi aningaasarsiat akileraaruteqaataasussat naatsorsorneranni tamakkerluni atorineqarsinnaangippat.

Imm. 2. Amigartoorutit ukiunut aningaasarsiorfinnut tullernut imm. 1 malillugu nuunneqarsinnaanerati atuutiingilaq akiliisinnajunnaarnermut atatillugu ingerlassamik unitsitsinerimi, akileraarnermik unitsitsinerimi allatulluunniit taakkununga eqqaanartumik amigaartooruteqarnermi ilimagineqarsinnaappat akileraartartup akiitsut amigartoorutinit naapertuuttut akilersinnaangikkai. Akiitsut taakkualuunniit ilaat kingusinnerusukkut akilerneqarpata akiitsut ilaat akilerneqartunut naapertuuttut amigartoorutit ilaattut ilanngaatineqarsinnaapput ukiumi akilerneqarfianni.

Imm. 3. Akiitsoqarfii akiligassat ilaannik isumakkeerinninnerisigut, akiligassat isumakkeerneqarnerisigut, akiligassat nungutinneqarnerisigut assigisaattulluunniit akiligassat isumakkeerneqartut tamarmik imm. 1 naapertorlugu amigartoorutinit ukiunut tuliuttunut ingerlateqqinneqarsinnaasunit ilanngaatineqassapput, aningaasat isumakkeerneqartut akileraaruteqaataasusnaanngipata.

Imm. 4. Selskabit § 1, imm. 1, nr. 3-mi taaneqartut amigartoorutaat imm. 1 naapertorlugu ukiunut tuliuttunut ingerlateqqinneqarsinnaangillat, piginnittut annertuumik allannguuteqarpata, piginneqatigiit ataasiakkaat aktiaataat taasisinnaaneralluunniit annertuumik allannguuteqarpata, imaluunniit selskabip ingerlatsinera piffissamut amigartooruteqarfimmut sanilliullugu annertuumik allannguuteqarpat. Kinaluunniit, selskabip amigartoorutaasa ukiunut tullernut nuunneqarsinnaanerannik ilisimasariaqartutut isigineqarsinnaasoq taamaaliorsinnaaneq pillugu siumut akuersissummik allanngortinneqarsinnaangitsumik akileraaruseriffimmut qinnuteqarsinnaavoq.

Imm. 5. Naalakkersuisut imaluunniit Naalakkersuisut tamatumunnga pisinnaatitaat immikkut ittunik pissutissaqartillugu imm. 4-mi aalajangersakkamik tamakkiisumik ilaannakortumilluunniit immikkut akuersissuteqarsinnaapput.

Imm. 6. Ukiumi aningaasarsiorfiusumi amigaartoorutit imm. 1-mi taaneqartutut ukiuni tallimani tuliuttuni atorineqarsinnaangipata akileraaruseriffiup akuersissutigisinnavaa, tamatumunngalu immikkut piumasaqaatinik aalajangersaasinnalluni, amigartoorutit atorineqanngitsut taamaattut aningaasarsianit akileraaruteqaataasussanit ukiuni aningaasarsiorfinni tallimani siulianeersuni ilanngaatineqarsinnaasut. Piffissap taassuma iluani ilanngaat taamaattoq taamaallaat ukiumut aningaasarsiorfimmut siusinnerusumut nuunneqarsinnaavoq aningaasarsianut akileraaruteqaataasussanut ukiumi kingusinnerusumi atorineqarsinnaangippat. Oqaaseqatigiinni siullerni aappaannilu taaneqartut atuupputtaaq akileraartartup uppersarsarsinnaappagu amigartoorutit imm. 1-mi maleruagassat naapertorlugit atorineqarsinnaangitsut. Imm. 2-miit 5-imut piumasaasut atuupputtaaq amigartoorutit ukiunut aningaasarsiorfiusunut siuliinut nuunneqartillugit. Annertunaarlugit akileraarutinit akiliutit utertinneqarneranni ajunngitsorsiassaqartinneqassanngillat erniaqartinneqassanatillu, takukkit akileraaruserinermik ingerlatsineq pillugu Inatsisartut inatsisaanni §§-it 25 aamma 27.

Imm. 7. Imm. 3-miit 6-imut aalajangersakkat atuupputtaaq selskabinut il.il., § 1, imm. 1, nr. 4-miit 13-imut taaneqartutut ittunut.

Imm. 8. Akileraartartumut, Kalaallit Nunaanni atortussiat aatsitassanit pisut il.il. pillugit inatsit naapertorlugu ujarlernissamut imaluunniit iluaqutiginninniarsinnaanermut

akuersissuteqarfigineqarsimasumut, imm. 1-imi oqaaseqatigiit siulliat, amigartoorutit ilanngaatineqarsinnaanerisa ukiunut tallimanut killilerneqarnerannik imaqartoq, atuutinnigilaq.

§ 31. Inuit, peqatigiinni assigiinngitsunik akisussaassuseqartunik ilaasortalinni (Kommanditselskab) ilaasortat, umiarsuaatileqatigiiffinni assigisaanniluunniit umiarsuaateqaqataasutut Kalaallit Nunaata avataani ingerlatsivinni ingerlataqartuni peqataanerminni amigartoorutaat allatigut aningaasarsiaannit ilanngaatineqarsinnaangillat. Tamanna aamma atuuppoq ingerlatseqatigiiffinni (interessentskab) qulit sinnerlugit peqataaffigineqartuni piginneqataasunut, akileraartussaataasorlu ingerlatsinermi annertuumik peqataanngippat.

Imm. 2. Amigartoorutilli imm. 1-imi pineqartut, § 30, imm. 1, 3 aamma 6-imi maleruagassat naapertorlugit, ukiumut aningaasarsiorfusumut kingusinnerusumut ingerlatsivimmi tassanerpiaq aningaasarsianit sinneqartoorutaasunit ilanngatissanngorlugit nuunneqarsinnaapput.

Imm. 3. Immikkut pissutissaqartoqartillugu amigartoorutit imm. 1-imi pineqartut tamakkiisumik ilaannakortumilluunniit ilanngaatineqarsinnaanerit Naalakkersuisunit, taakkunanngaluunniit taamaaliornissamut piginnaatinneqartumit akuersissutigineqarsinnaapput.

§ 32. Inuup, selskabip il.il. § 2, imm. 1-imi aalajangersakkat arlallit malillugit ukiumut aningaasarsiorfusumut akileraartussaataasup, tamatumani aamma pineqarlutik aalajangersimasumik ingerlatsiviit arlallit, akileraarutaasussanik aningaasarsiat ataatsimoortillugit naatsorsorneqarsinnaanngillat, isertitanulli ataasiakkaanut, sumiiffimmut ataatsimut, suliffeqarfimmut il.il. ataatsimut, akileraartussaannermut tunngavigisaasunut ataasiakkaarlugit naatsorsorneqassallutik.

Imm. 2. Inuunnut allanullu imm. 1-imi pineqartunut amigartoorutini § 30 naapertorlugu ukiup naatsorsuusiorfusup kinguliinut siuliinulluunniit nuussineq taamaallaat pisinnaavoq isertitanik akileraarutaasussanik sumiiffimmi, suliffeqarfimmi il.il. amigartooruteqarfusumi.

Imm. 3. Akileraartussaataitamut, Kalaallit Nunaanni atortussiat aatsitassanit il.il. pillugit inatsit naapertorlugu misissuinissaminut imaluunniit atuisinnaanissaminut akuersissuteqartut, akuersissumilu pineqartunik toqqaannartunik ingerlatalimmut imm. 1-imi aamma 2-imi aalajangersakkat pineqartut atuutsinneqassanngillat.

§ 33. Akileraaruserinermik ingerlatsineq pillugu Inatsisartut inatsisaanni §§-ini 24-mi aamma 27-mi pineqartut akileraarutit sinnerinuttapiliussat aamma akileraarutit, aningaasarsiat akileraaruteqaataasussat naatsorsorneqarneranni ilanngaatineqarsinnaanngillat. Akileraarutinit akilerpallaarsimasanut taarsiissutit akileraaruserinermik ingerlatsineq pillugu Inatsisartut inatsisaanni § 25-imi taaneqartut aammalu akileraaruserinermik ingerlatsineq pillugu Inatsisartut inatsisaanni § 27-imi taaneqartut akileraarutit akileraarutaagallartutut annertuallaamik akiliutaareersimasut aningaasarsiat akileraaruteqaataasussat naatsorsorneqarnerinut ilanngunneqassanngillat.

§ 34. Aningaasarsiat akileraaruteqaataasussat naatsorsorneqarneranni ilanngunneqassanngillat:

- 1) Akileraartussaataitap pigisaasa nalingisa allanngornerisigut pisuussutit allissutaat millissu-taalluunniit,
- 2) iluanaarutit annaasalluunniit akileraartussaataitap pigisaanik tunisinermit pisut. Tamannali atuutinnigilaq pigisanik nalikillilerneqarsinnaasunik tunisaqarnermi kiisalu pigisanut akileraar-tussaasup inuutissarsiornermigut imaluunniit iluanaarniarluni pissarsiaanut,

3) tunisisumut akileraartussaaqataasumut aapparisaanut tunissutit, tunisisup qitornaanut, qitornassaanut taakkualu qitornaannut, qitornap qitornassalluunniit toqusimasup aapparisaanut (averusersimannngisaanut avissimannngisaanulluunniit) kiisalu angajoqqaavinut, angajoqqaassaanut aataakkuinut aanakkuinullu tunissutit,

4) pisuussutit amerlissutaat kingornussarsianit imaluunniit kingornussarsiansanit siumuuk-kanit imaluunniit aappariilernermit pisut,

5) nammineq pigisat nammineerluni atugaanerisa nalingat, aamma nammineq illumi inigisap nalinga illuut ataasiinnarmik piginnittup inigisaatut atugassaasumik inissartaqarpat, kisianni aatsaat illuutip ilangaallussua tamatuma saniatigut piginnittup inuutissarsiorluni sulineranut atugaanngippat,

6) piliat akileraartussaatitap aallaaniarnermik, piniarnermik aalisarnermillu ingerlatsineranit pisut privatimik atugaanerminni nalingat,

7) iluanaarutit agguagarsiat brugsforeninnginit § 1, imm. 1, nr. 6-mi eqqartorneqartunit pisut,

8) ullormusiat (dagpenge) angalanermullu taartisiat angallataasunut aamma angalanermi ineqarnermut nerisaqarnermullu (angerlarsimaffiup avataani najugaqarallarnermi) aningaa-sartuutit allissutaannut matusissutissat Kalaallit Nunaanni pisortatigut isumagisassaatanik isumaginninnermit pisut imaluunniit Kalaallit Nunaanni tjenestemandinut malittarisassat malillugit tunniunneqartartut,

9) piginneqatigiit § 1, imm. 1, nr. 3-mi 4-miluunniit pineqartut piginneqataanermut allagartanik tunisaqarnermikkut imaluunniit piginneqataasut aningaasaataannik amerlisitsinikkut akit sippuutaagoortumik pisaat,

10) pisortanit ikiuutisiat akuersissutigineqartut:

a) pisuni ataasiakkaani naliliineq tunngavigalugu pisortanit pensionisianut tapiliussatut, matumani aamma meeqqanut tapiliussatut tunniunneqartut,

b) ataasiartumik ikiorsiissutitut, nuunnermi ikiuutisiatut, ilisinermi ikiuutisiatut, angerlarsimaffimmi ikiorteqarnermut aamma angerlarluni angalanermut ikiuutisiatut tunniunneqartut,

c) ineqarnermut tapiissutitut tunniunneqartut,

d) meeqqanut inuusuttunullu ikiorsiissutitut tunniunneqartut,

e) inunnut annertuumik innarluuteqartunut ikiorsiissutitut tunniunneqartut,

f) piginnaanngorsaqqinneqarnermut atatillugu ataasiartumik ikiorsiissutitut immikkut ittumik tapiissutitut tunniunneqartut.

11) Selskabinit nunani allani, matumani aamma Danmarkimi Savalimmiunilu, angerlarsimaf-feqartuni aktiaatinit anpartiutinilluunniit iluanaarutisiat, selskabinit il.il. § 1, imm. 1, nr. 3, 4, 6, 7 aamma 9-mi taaneqartunit pissarsiarineqartut. Tamannali taamaallaat atuuppoq selskabip iluanaarutisianik pissarsisup, selskabip piginnittuusup, selskabimi iluanaarutisianik tunnius-saqartumi, selskabimi pigineqartumi, aktiatigut anpartitigulluunniit aningaasaatit minnerpaa-mik 25 procentii piffissami ataannartumi sivikinnerpaamik ukiumi ataatsimi, piffissallu taassuma iluani iluanaarutisianik agguaaassiffiusimasussami pigisimappagit,

12) meeqqanut tapiissuteqarnek pillugu inatsit malillugu meeqqanut tapiissutisiat, ilinniagaqarnermi tapiissutit pillugu inatsisartut peqqussutaat malillugu meeqqanut tapiissutisiat, atuarfinni klassini qullerni atuartut atuarnermut tapiiffigineqartarnerat pillugu peqqussut naapertorlugu tapisiaat, aammalu meeqqanut ilinniarnermi tapiissutit Kalaallit Nunaanni tjenestemandinut malittarisassat malillugit tunniunneqartartut,

13) nalliuttorsiornermi suliffimmit tunissutisiat namminersortuni pisortaniluunniit atorfilinnut Kalaallit

Nunaanni tjenestemandinut malittarisassat malillugit tunniunneqartartut,

14) nuunnermi aningaasartuutitut matussutissat namminersortuni pisortaniluunniit atorfilin-nut Kalaallit Nunaanni tjenestemandinut malittarisassat malillugit tunniunneqartartut,

15) akeqanngitsumik angerlarsimaffittut najukkamut angalanerup nalinga namminersortuni pisortaniluunniit atorfilinnut Kalaallit Nunaanni tjenestemandinut maleruagassat atuuttut malillugit tunniunneqartartoq. Akeqanngitsumik angalasarneq akileraaruserneqarneq ajortoq, aalajangersagaq una malillugu ukiumut angalanermut ataatsimut taamaallaat atuuppoq, aammalu

16) præmieobligationinit, eqquiniaanernit, tipsernertit il.il. eqquinikkut pissarsuat danskit naalagaaffiannut akileraaruserneqartartut.

§ 35. Ikisisut qularnaveeqqusiinermut aningaasaateqarfiata aningaasaatit pigisallu aningaa-sanik nalillit aningaaserivimmit ataatsimut aningaaserivimmut allamut nuunneqarnerannut atatillugu naatsorsuutitigut amigartoorutit tamakkiisumik ilaannakortumilluunniit nalimmassaatissaattut aningaasat akiligai aningaasarsianut akileraaruteqaataasussanut ilanngullugit naatsorsorneqassanngillat. Amigartoorutit ilaat ikisisut qularnaveeqqusiinermut aningaasaateqarfiannit tapiissutitigut qularnaveeqqutitigulluunniit matuneqarsimasasut tamatuma kingorna aningaaseriviup tigusisup pigisanik aningaasanik nalilinnik tigusinerani akiliutigineqartut ilaattut isigineqarsinnaajunnaassapput.

Imm. 2. Ikisisut qularnaveeqqusiinermut aningaasaateqarfiata aningaasat imm. 1-imi ilaatinneqartut qularnaveeqqutilluunniit aningaasanik imm. 1-imi ilaatinneqartunik tunniussinermik kinguneqartumik tunniussimappagit, ingerlatseqatigiiffiullu imm. 1-imi ilaatinneqartup ingerlatat nutaat aallartippagit, ukiumi aningaasarsiorfusumi siusinnerusumi amigartoorutit ukiumi aningaasarsiorfusumi pineqartumi ukiuniluunniit aningaasarsiorfusuni kingusinnerusuni aningaasarsianut akileraaruteqaataasussanut ilanngaaticigineqarsinnaanngillat, taamatuttaarlu ukiumi aningaasarsiorfusumi pineqartumi amigartoorutit ukiumi aningaasarsiorfusumi kingusinnerusumi ilanngaaticigineqarsinnaanatik.

§ 36. Sullivik Kalaallit Nunaanniittoq aamma aalajangersimasumik inissisimasumik inger-lassaqarneq, namminersorluni inuussutissarsiorneq aamma Kalaallit Nunaanni umiarsuartigut timmisartukkullu angallannermik ingerlassaqarneq, tak. § 2, imm. 1, nr. 10-imiit 12-mut, sullivimmit Kalaallit Nunaata avataaniittumit aquunneqartoq niuernikkut aningaasaateqarnikkullu taassumunnga atassuteqarnermigut atugassaaticinik sullivimmut imminut naalakkersortumut atuuttussaagaluaniit allaasumik atugassaartitaappat, Kalaallit Nunaanni sulinikkut iluanaarutitut ilanngunneqassaaq iluanaarut sulliviup taassuma namminersortuusimasuuguni taamalu killilersugaanngitsumik atugassaartitaalluni sullivimmik takornartamik pineqartumik iluanaarniarnerup tungaatigut isumaqatiginninniarsimasuuguni angusimasassaralua.

Imm. 2. Inuit, selskabillu § 2, imm. 1, nr. 10-imiit 12-mut malillugit akileraartussaaticitaasut aningaasartuutit aalajangersimasumik ingerlatsivimmut tunngasut, saniaticigut ilanngaaticigin-naavaat ataatsimut aningaasartuutaasimasinnaasut siulersorneqarnermut aamma allaffeqarner-mut tunngasut ilaannut naapertuuttut Kalaallit Nunaanni imaluunniit avataani aningaasartuutaappata assigiimmik.

Imm. 3. Aningaasarsiat § 2, imm. 1, nr. 10-imiit 12-mut malillugit inunnut imaluunniit selskabinut akileraartussaaticitaasunut tunngasut toqqaannartumik naatsorsorneqarsinnaanngippata, aningaasarsiat missangersuusiornikkut sullivimmit assingusumit isertitat najoqqutaralugit angissusilerneqassapput sulliviup ataatsimut isertitaasa assigisaasaluunniit immikkoortitereernerisigut. Taamatut aamma atuuppoq

anigaasarsiat toqqaannartumik naatsorsorneqarsimasut imm. 2 malillugu ilanngaataasinnaasut ilanngaatigereernerisigut aalajangersimasumik ingerlatsivimmu isertitatut naammattutut isigineqarsinnaangikkaangata.

Imm. 4. Nunat allat sillimmasiisarfii Kalaallit Nunaanni sillimmasiisarfinnik ingerlatsisut Kalaallit Nunaanni anigaasarsiaat aalajangerneqassapput tassaattillugit piginneqatigiit anigaasarsiaasa tamarmiusut ilaat akileraartarnermi maleruagassiat nalinginnaasut malillugit naatsorsorneqarsimasut Kalaallit Nunaanni anigaasarsiaasa akissaajaatinik ilanngarneqan-ngitsut, anigaasarsiallu tamarmiusut akissaajaatinik ilanngarneqarsimanngitsut imminnut naleqqiullugit Kalaallit Nunaanni isertitanut akissaajaatinik ilanngarsimanngitsunut tutut. Immikkut ittumik pissutissaqartillugu naatsorsueriaatsip allap atorineqarnissaa akileraaruseriffup akuersissutigisinnavaa.

Imm. 5. Kreditforeninngit nunanit allaneersut Kalaallit Nunaanni taarsigassarsisitsiniartartut Kalaallit Nunaanni anigaasarsiaat aalajangerneqassapput tassaattillugit selskabip anigaasar-siaasa tamarmiusut ilaat, akileraartarnermi inatsimmi maleruagassiat nalinginnaasut naapertorlugit naatsorsorneqarsimasut, Kalaallit Nunaanni taarsigassarsiarititaasa taarsigassarsiarititaasalu tamarmiusut imminnut naleqqiunneranni Kalaallit Nunaanni taarsigassarsiarititanut tutut. Pissutsit immikkut ittut atuutsillugit akileraaruseriffup akuersissutigisinnavaa naatsorsueriaatsip allap atorineqarnissaa.

§ 37. Inuussutissarsiornermi pigisanut pigisanullu nalinginnaasunut § 34, nr. 2-mi oqaaseqatigiit aappaanni taaneqartuni iluanaarutit ajunaarutilluunniit naatsorsorneqarnerini ilanngaateqartoqassanngilaq, tunisinnermi akigititaq ataatsikkut tamarmi akilernerqarsimanngippat.

Imm. 2. Tamannattaq atuuppoq § 16, imm. 2-miit 4-mut aalajangersakkat naapertorlugit iluanaarutitut ajunaarutitnullu akileraaruteqaataasussanut.

Imm. 3. Tamanna § 17 aamma § 18-mi iluanaarutitut akileraaruteqaataasussatut taaneqartunut aamma atuuppoq.

§ 38. Pappiaqqat nalillit § 16, imm. 1-mi 2-milu taaneqartut pigisallu, akileraartussaasup inuussutissarsiummigut imaluunniit iluanaarniarnermigut pissarsiarisimasai, takuuk § 34, nr. 2, kingusinnerpaamik tunineqarsimasutut isigineqassapput § 1 imaluunniit § 2, imm. 1 naapertorlugu akileraartussaannerup taamaatinnerani.

Imm. 2. Anigaasaliinnermut isumaqatigiissutit § 17, imm. 1-mi pineqartunut ilaasut, kingusinnerpaamik § 1, imm. 1. nr. 1 aamma 2 malillugit akileraartussaannerup atorunnaarnerata nalaani tunineqarsimasutut isigineqassapput.

Imm. 3. Pisassarisat § 18, imm. 1-mi ilaatinneqartut kingusinnerpaamik tunineqarsimasutut isigineqassapput § 1, imm. 1, nr. 1 aamma 2 naapertorlugit akileraartussaannerup atorunnaarnerani.

Imm. 4. Immikkoortuni 1-miit 3-mut taaneqartunik anigaasaliinnermut isumaqatigiissutit pigisat tunineqarneranni akusutut isigineqassaaq akileraartussaannerup atorunnaarnerani nalinginnaasumik niuernermi nalingat.

Imm. 5. Immikkoortuni 1-miit 3-mut taaneqartunik anigaasaliinnermut isumaqatigiissutit pigineqartut akileraartussaannerup atorunnaarnerani nalinginnaasumik niuernermi nalingat pisiarineranni akusutut isigineqassaaq.

Kapitali 4

Soraarnerussutisiatigut aaqqissuussinerit

§ 39. Soraarnerussutisiatigut inuunermullu sillimmasiissutitigut aaqqissuussinernut ingerlaavartumik inuuneq tamaat, toqunikkut unittussanik, pisartagaqarfigineqartartussanut akilersuutit, tamakkununnga ilanngullugit apparisap imaluunniit inooqatigisap qitornallu soraarnerussutisiassanit pisartagaqartinnissaannut kiisalu innarluutilittut ingerlaavartumik soraarnerussutisiassanut akilersuutit aningaasarsiat akileraaruteqaataasussat naatsorsorneranni ilanngaatineqarsinnaapput. Taamaattorli piumasarsiat makku naammasineqarsimassapput:

1) Aaqqissuussinerit pilersinneqarsimassapput soraarnerussutisiaqalernissamut aningaasaate-qarfimmi sillimmasiisarneq pillugu inatsimmi ilaatinneqartumi. Aamma aaqqissuussinerit pilersinneqarsinnaapput selskabimi inuunermut soraarnerussutisiaqalernissamullu sillimmasii-sarfimmi ingerlatsinissamut Finanstilsynimit akuerisaasumi.

2) Utoqqalineq pissutigalugu soraarnerussutisiani inuuneq naallugu pisartagassanik aammalu naammaataasunik inuuneq naallugu pisartagassaanngitsunik aningaasartaqartuni, utoqqalineq pissutigalugu soraarnerussutisiat ilaannit naammaataasunit, inuuneq naallugu pisartagaasunit tunniunneqartut 50 procentiinit amerlanerussanngillat.

3) Utoqqalineq pissutigalugu soraarnerussutisiat siusinnerpaamik tunniunneqartalersinnaapput 60-inik ukioqalernermi, taakkuninnga ukiukinnerunissaq akileraaruseriffimmit akuerineqarsimanngippat.

4) Apparisamut imaluunniit inooqatigisamut soraarnerussutisiatut pisartakkat appariinnermi toqukkut qimagaasunut, appariinnermi avissimasamut imaluunniit inooqatigisimasamut pisassanngortinneqarsinnaapput. Inooqatigisaq tassaavoq inuk aterorlugu taasaq akilersuilernermi toqusup najugaqatigisimasaa, imaluunniit inuk toqusup katissimasinnaasaralua imaluunniit pisortatigut nalunaarsukkamik inooqatigisimasinnaasaa, kingornussassat nalunaarsorneqarfia toqusup toqunissani qaammatinik pingasunik sioqqullugu pilersissimasaa tunngavigalugu kingornutassaqalersimasooq kingornussisarneq pillugu inatsit naapertorlugu apparisap katissimasap pinngitsoorani kingornutassarissaraluaata minnerpaamik angeqqataanik, aammalu toqusup toqunissaa sioqqullugu ukiuni marlunni najugaqatigisimasaa imaluunniit siusinnerusukkut toqukkut qimaguttumik najugaqateqarsimasooq sivikinnerpaamik atasuinnarmik ukiuni marlunni, ineqarfik najugaqatigiiffigisaq taamaallaat najugaqatigiiffigineqarunnaarsimappat paaqqinniffimmut inissinneqarneq pissutigalugu, tamatumani ilanngullugu utoqqalisut inigisartagaannut nuunneq.

5) Apparisap katissimasap, apparisap avissimasap imaluunniit inooqatigisap qimataasup soraarnerussutisiat pisartagarisinnaavai sivikinnerpaamik ukiuni qulini.

6) Taamaattorli qitornanut toqukkut qimagaasunut, aamma qitornarsianut, soraarnerussutisiarititat pisartagaritinneqassapput sivisunerpaamik qitornaasut 24-nik ukioqalernerat tikillugu.

7) Soraarnerussutisiatigut inuunermullu sillimmasiissutitigut aaqqissuussinerit danskit soraarnerussutisiaqalernissamut inuunermullu sillimmasiissutitigut danskit selskabiini pilersinneqarsimasut soraarnerussutisiaqalernissamut ileqqaakkat il.il. akileraaruserneqartarnerat pillugit inatsimmi § 53 A-mi taaneqartunut ilaatinneqarsimassanngillat.

Imm. 2. Inuunermut sillimmasiisoqarpat sillimmasiisoq sillimmasersimassaaq sillimmasiu-tinullu piginnittuussalluni.

Imm. 3. Taamaattorli ingerlaavartumik inuuneq tamaat tunniunneqartartussanut ukiumut 6.000 koruunit

sinnermanngippatigit soraarnerussutisiaqartitsinermi aaqqissuussanit, imm. 1-imi taaneqarsimasunit, atorfinitsitaanermullu atasumik pilersinneqarsimasunit, tunniunneqartussat aningaasanngorlugit ataasiaannartumik tunniunneqarsinnaapput.

Imm. 4. Taamaattorli aningaasat soraarnerussutisiaqalernissamut aaqqissuussinernit soraarnerussutisiaqalernissamut aningaasaateqarfinni imaluunniit inuunermut soraarnerussutisiaqalernissamullu selskabini Kalaallit Nunaanni angerlarsimaffeqartuni pilersinneqarsimasut ukiuni tulleriinni marlunni tunniuttagassat nalingi, aammalu atorfeqarnermut tunngatillugu pilersinneqarsimasut, aningaasanngorlugit ataasiaannartumik tunniunneqarsinnaapput.

§ 40. Soraarnerussutisiaqalernissaq siunertaralugu naafferartumik akilersuilluni sillimmasiutitut akiliutit aningaasarsiat akileraaruteqaataasussat naatsorsorneranni ilanngaatineqarsinnaapput, aalajangersagaqarpat aningaasat sillimmasiutit sivikinnerpaamik ukiuni qulini amerlaqatigiiaarlugit tunniunneqartassasut aammalu sillimmasersimasooq inuutillugu tunniunneqartut sillimmasersimasumullu tunniunneqartarpata. Taamaattorli piumasaqaatit makkua naammassineqarsimassapput:

- 1) Isumaqatigiissut pilersinneqarsimassaaq inuunermut soraarnerussutisiaqalernissamullu sillimmasiisarneq pillugu selskabimi Kalaallit Nunaanni angerlarsimaffeqartumi aammalu inuunermut sillimmasiisarfimmik ingerlatsinissamut Finanstilsynimit akuerineqarsimasumi.
- 2) Sillimmasersimasup 60-inik ukioqalereernerani isumaqatigiissut taamaallaat pilersinneqarsinnaavoq isumaqatigiissummut taamatut ukioqalerneq sioqqullugu pilersinneqarsimasumut ilassutitut, aammalu isumaqatigiissut siulleq eqqarsaatigalugu piffissanut tunniussivissanut tunngatillugu tunniuttakkat sillimmasiutit amerlassusissaata siusinnerusukkut isumaqaatigiissutaasimasup affaa sinnerlugu amerlassuseqassanatik.
- 3) Sillimmasiutinik pisartooq sillimmasersimassaaq sillimmasiutinillu piginnittuulluni. Sillimmasiutit pilersinneqarsimappata sulisuusup sulisitsisuatalu isumaqatigiissuteqarneratigit aki-liutillu sulisitsisup akilertarpagit sulisuusooq sillimmasersimassaaq sillimmasiutinillu piginnittuulluni.
- 4) Sillimmasersimasup 80-inik ukioqalereernerani piffissamik tunniussivissamik isumaqatigiissutit siulluup ulluanit kingusinnerusumik tunniussisarnissamik isumaqatigiissuteqartoqarsinnaanngilaq. Naafferarlugu tunniussuineq aallartissinnaavoq siusinnerpaamik sillimmasersimasup 60-iliineraniit, ukiukinnerunissaq akileraaruseriffimmit akuerineqarsimanngippat. Taamaattorli isumaqatigiissutigineqarsinnaavoq tunniussuineq aallartissinnaasoq sillimmasersimasooq 60-illuunniit angunagit innarluuteqalersimappat imaluunniit toqusimappat.

Imm. 2. Isumaqatigiissummi salliutinneqarsinnaasutuaapput sillimmasersimasup, takuuk sillimmasiutit isumaqatigiissutigineqartarnerat pillugu inatsimmi § 105, imm. 5, "qaniginerpaasai" imaluunniit sillimmasersimasup aapparisa katissimasaa, avissimasaa, inuk aterorlugu taasaq sillimmasersimasup sillimmasermermi nalaani najugaqatigisimasaa, sillimmasersimasup inuuneq tamaat kingornussisussai, qitornarsiai imaluunniit qitornarsiat inuuneq tamaat kingornussisussai.

§ 41. Aaqqissuussinernut §§-ini 39-mi aamma 40-mi taaneqartunut akilersuutit pillugit ilanngaat piffissamut akilersuiffusumut tunngatinneqassaaq, aammalu ilanngaat ukiup aningaasarsiorfiup ilaani akiliuteqarfiusumi akissarsiat tamarmiusut 15 procentiannit annerusinnaanngilaq. Aappariinnut ataatsimut akileraarusigaasunut imaluunniit inooqatigiittut nalunaarsugaasunut tunngatillugu ilanngaat taaneqartut akissarsiaasa tamarmiusut 15 procentiannit annerusinnaanngilaq. Namminersorlutik

inuussutissarsiummik ingerlatsisunut tunngatillugu naatsorsuinermit tunngaviussaaq pissuseqataanik atorfillip akissarsiaasa missingersorneqarnerat.

Imm. 2. Sulisuusup akissarsiaasa akileraaruteqaataasussat naatsorsorneranni ilaassanngillat aningaasat §§-ini 39-mi aamma 40-mi aaqqissuussinernut taaneqartunut sulisitsisup akilersimasai.

Imm. 3. Ukiup aningaasarsiorfiusup ingerlanerani soraarnerussutisiaqalernissamut aaqqissuussinermut ingerlaavartumik tunniussisartussamut, takuuk § 39, imaluunniit naafferartumik akilersuilluni sillimmasiivimmut, takuuk § 40, akiliuit imm. 1 naapertorlugu akissarsiat tamarmiusut 15 procentiat sinnerlugu akiliisoqarsimappat, akileraaruseriffiup akuerisinnaavaa taanna qaangerlugu akiliutit utertinneqarnissaat pillugu tamatumunnga immikkut ittunik patsisissaqarsimappat.

§ 42. Aningaasarsianut akileraaruteqaataasussanut ilanngunneqassapput:

1) Soraarnerussutisiaqalernissamut aaqqissuussinermut ingerlaavartumik tunniussisartussamut soraarnerussutisiat, takuuk § 39, imm. 1, kiisalu § 39, imm. 3 aamma 4 malillugit aningaasat tunniunneqartartut piginnittumut namminermut, apparisaanut katissimasaanut inooqatigisaanulluunniit, tamatumani ilanngullugit apparisimasamut avissimasamut kiisalu inuuneq naal-lugu kingornussisussanut, qitornarsianut imaluunniit qitornarsianit inuuneq naallugu kingornussisussanut,

2) soraarnerussutisiaqalernissaq siunertaralugu naafferartumik sillimmasiutinit tigusartakkat, takuuk § 40, aaqqissuussinermi atugassarititat naapertorlugit naafferartumik tunniunneqartartut sillimmasersimasumut kiisalu sillimmasersimasup toqoreerneratigut naafferartumik tunniuttakkat, tassa kikkut salliutinneqarnissaat pillugu malittarisassat malillugit tunniunneqartarpata pineqartup apparisaanut katissimasaanut imaluunniit inooqatigisaanut, tamatumani ilanngullugit apparisimasamut avissimasamut imaluunniit inuuneq naallugu kingornussisussanut, qitornarsianut imaluunniit qitornarsiat inuuneq naallugu kingornussisussaannut, aamma

3) soraarnerussutisiaqalernissamut aaqqissuussinermut ingerlaavartumik tunniussisartussamut soraarnerussutisiat § 39, imm. 1 kiisalu § 39, imm. 3 aamma 4 malillugit tunniuttakkat aammalu soraarnerussutisiaqalernissaq siunertaralugu naafferartumik sillimmasiutinit tunniuttakkat, § 40 malillugu piginnittup katissimallugu apparisaanut avissimasaanut averusersima-saanulluunniit tunniunneqarpata, tassa najugaqatigiinnermi pigisat agguarneqarnerata kinguneranik pisassanngortinneqarsimappata.

Imm. 2. Naafferartumik tigusartakkat sillimmasiinermit § 40-mi pineqartumit pisut aningaasarsiatut akileraaruteqaataasussaapput, tigusartakkat inunnut imm. 1, nr. 2-mi taaneqarsimanngitsunut tunniunneqartaraluarpataluunniit.

Imm. 3. Soraarnerussutisiaqalernissamut aaqqissuussinermut ingerlaavartumik tunniussisar-tussamut soraarnerussutisiassat maanaannakkut unitsitat tunniunneqartut, soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamullu selskabimi Kalaallit Nunaanni angerlarsimaffeqanngitsumi pilersinneqarsimasuneersut, aningaasarsiatut akileraaruteqaataasussaapput, taamaattorli takuuk § 43, imm. 5.

Imm. 4. Naafferartumik sillimmasiutinit inuunermut soraarnerussutisiaqalernissamulluunniit selskabimi pilersinneqarsimasumit sillimmasiinerit maanaannarlu unitsitsinikkut tunniunneqartut, Kalaallit Nunaannilu angerlarsimaffeqanngitsuneersut, aningaasarsiatut akileraaruserneqassapput, taamaattorli takuuk § 43, imm. 5.

§ 43. Aningaasarsiat akileraaruteqaataasussat naatsorsorneqarneranni ilanngunneqartassanngillat tjenestemanditut soraarnerutissanut aamma Arbejdsmarkedets Tillægspensionimut nammineq akilersuutit aamma/imaluunniit sulisitsisup akilersuutai.

Imm. 2. Aningaasat aaqqissuussinernit imm. 1-imi taaneqartunit ingerlaavartumik tunniunneqartartut aningaasarsiat akileraaruteqaataasussat naatsorsorneqarneranni ilanngunneqartassapput.

Imm. 3. Aningaasarsiat akileraaruteqaataasussat naatsorsorneqarneranni danskit aningaaseriviini assigisaannilu soraarnerussutisiassanik katersiniarluni aaqqissuussinernit, soraarnerussutisiaqalernissamut ileqqaakkat pillugit aaqqissuussinernut akileraaruserneqartarnerat pillugu inatsimmi kapitali 1-imi pineqartunut ilaatinneqartunit, kiisalu Lønmodtagernes Dyrtidsfondimi uninngasuutinit erniasiat ilanngunneqartassanngillat.

Imm. 4. Aningaasarsiat akileraaruteqaataasussat naatsorsorneqarneranni ilanngunneqartassanngillat pisortani atorfillit soraarnerussutisiaqalernissamut ileqqaagaannut sulisitsisup akiliutai, soraarnerussutisiaqalernissamut ileqqaakkat makkunatut iluseqartinneqarpata: naafferartumik akilersuilluni sillimmasiinerit, soraarnerussutisiaqalernissaq siunertaralugu naafferartumik akilersuilluni ileqqaakkat naafferartumik tunniunneqartussat, sillimmasiinerit akit nikerarneri najoqqutaralugit iluarsineqartartut, akit nikerarneri najoqqutaralugit ileqqaakkat, ataatsikkut akiliilluni sillimmasiinerit aammalu soraarnerussutisiaqalernissamut ileqqaakkat ataatsikkut tunniunneqartussat, aaqqissuussineq sulisumut pinngitsoorani ileqqaartitsissutaappat akileraartussaanerullu siornatigut pilersinneqarsimappat. Taamaattorli aaqqissuussineq soraarnerussutisiaqalernissamut ileqqaakkat akileraaruserneqarnissaannut inatsimmi § 50 imaluunniit § 53 A naapertorlugu akileraarusigassanngortinneqarsimappata sulisitsisup akiliutai aningaasarsiat akileraaruteqaataasussat naatsorsorneqarneranni ilangunneqartassapput.

Imm. 5. Aningaasarsiat akileraaruteqaataasussat naatsorsorneqarneranni soraarnerussutisiaqalernissamut aaqqissuussinernit maanaannaq atorunnaarsinneqartut nalingat ilanngunneqartassanngilaq, aaqqissuussinernit tamakku soraarnerussutisiaqalernissamut ileqqaakkat akileraaruserneqarnissaannut inatsimmi kapitali 1-imi pineqartunut ilaasimappata.

§ 44. Aningaasarsiat akileraaruteqaataasussat naatsorsorneranni inuunermut sillimmasiissutinit soraarnerussutisiatigullu aaqqissuussinernit § 39-mi imaluunniit § 40-mi taaneqanngitsunit iluanaarutit ilanngunneqartassapput. Aningaasarsianit akileraartartussaatitaavoq piginnittoq imaluunniit piginnittup toqunerata kingornagut sillimmasiissutinit pisartagaqartussaatitaasoq. Iluanaarutit naatsorsorneqassapput illuatungaani sillimmasiussat ukiup aningaasarsiorfiup naanerani aningaasanngorlugit nalingata ukiup ingerlanerani sillimmasiisumut tunniunneqarsimasunik tapikkat illuatungaani sillimmasiussat ukiup aningaasarsiorfiup aallartinnerani aningaasanngorlugit nalingata ukiup ingerlanerani sillimmasiisumit akiliutigineqarsimasunik tapikkat assigiinngissutaattut. Sillimmasiissutinit amigartoorutit § 30, imm. 1-imi maleruagassat malillugit taamaallaat ukiuni aningaasarsiorfusuni tallimani tulluittuni sillimmasiissutinit taakkuusunit iluanaarutaasunit ilanngaatisanngorlugit nuunneqarsinnaapput.

Imm. 2. Inuunermut sillimmasiissutinit imm 1-imi pineqartunit, pisassat ingerlaavartumik tunniuttagaanngippata aningaasarsiat akileraaruteqaataasussat naatsorsorneranni ilanngunneqassanngillat.

Imm. 3. Taamaattorli imm. 1-imi 2-milu maleruagassat inuunermut sillimmasiissutinit sillimmasiisooq

piffissap sillimmasiiffiusup isumaqatigiissutaasumik naanissaa nallertinnagu toquppat imaluunniit timimigut innarluuteqalerpat aatsaat tunniunneqarsinnaasunut atussanngillat, isumaqatigiissutaasumik naaffissaq taanna sillimmasiisup 80-inik ukioqalernerata kingornagut sillimmaserneqarnermut allagartami ullormit siullermit kingusinnerunngippat.

Imm. 4. Aningaasarsiat akileraaruteqaataasussat naatsorsorneranni ilanngunneqassanngillat aningaasat sillimmasiisup toqoreerneratigut pisartagaqartitsiniarluni sillimmasiissutinit, matumani ilaallutik timikkut innarluuteqalerneremut taartisiat ataatsikkoortumik inuunermut sillimmasiissutinit imm. 3-mi pineqartunit kiisalu ajunaarnissamut sillimmasiissutinit tunniunneqartut.

Imm. 5. Imm. 1-imi 2-milu maleruagassat taamattaq aamma atussanngillat naafferartumik akilersuilluni sillimmasiinernut soraarnerussutisiaqalernissarluni siunertaralugu naafferartumik akilersuilluni ileqqaakkanut naafferartumik tunniunneqartussanut, sillimmasiinernut akit nikerarneri najoqqutaralugit iluarsineqartartunut, akit nikerarneri najoqqutaralugit ileqqaakkanut, ataatsikkut akiliilluni sillimmasiinernut soraarnerussutisiaqalernissamullu ileqqaakkanut ataatsikkut tunniunneqartussanut, soraarnerussutisiaqalernissamut ileqqaakkat akileraaruserneqartarnerat pillugu inatsimmi kapitali 1-imi il.il. pineqartunut.

Imm. 6. Inuunermut sillimmasiissutit akileraaruseriffiup imm. 1 aamma 2 malillugit akileraarusigassanngortinngissinnaavai inuunermut sillimmasiineq pilersinneqarsimappat sillimmasiisooq Kalaallit Nunaannut akileraartartussanngorsimatinnagu.

§ 45. Soraarnerussutisiaqalernissamik isumaqatigiissutip imaluunniit soraarnerussutisiaqalernissamut aningaasaateqarfiit aamma inuunermut soraarnerussutisiaqalernissamullu selskabiti Kalaallit Nunaanni angerlarsimaffeqartut akornanni tunniussinertut akiliutitulluunniit suliarineqassanngillat nuussinermit pineqarpata:

1) Soraarnerussutisiaqarnermut aqqqissuussinerit ingerlaavartumik tunniussisartut akornanni, takuuk § 39.

2) Naafferartumik sillimmasiutiniit, takuuk § 40, soraarnerussutisiaqalernissamut aqqqissuussineremut ingerlaavartumik tunniussisartussamut, takuuk § 39.

3) Naafferartumik sillimmasiummiit taamaaqataanut nuussinerit, takuuk § 40.

Imm. 2. Akileraaruseriffiup akuerisinnaavaa aningaasat nunani allani sillimmasiisarnermut aqqqissuussineriit nuunneqartut soraarnerussutisiaqalernissaq pillugu aqqqissuussineremut § 39-mi imaluunniit § 40-mi pineqartunut akiliutitut suliarineqassanngitsut.

Imm. 3. Imm. 1-imi aamma 2-mi maleruagassat atortinneqarnissaannut piumasaqaataavoq nuussineq sioqqullugu aningaasat nuutat pillugit aningaasarsianit akileraartussanngortitsisoqarsimassanngitsooq imaluunniit nuunneqartunit akitsuutit akileraartussanngortitsisoqarsimassanngitsooq.

§ 46. Soraarnerussutisiaqalernissamut aqqqissuussinermit ingerlaavartumik tunniussisartussamit aammalu soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamulluunniit selskabimi Kalaallit Nunaanni angerlarsimaffeqartumi pilersitaasumi maanaannakkut unitsitat tunniutassat akileraaruserneqassapput 45 procentimik.

Imm. 2. Naafferartumik sillimmasiutit maanaannakkut unitsitat tunniunneqalerneranni aammalu inuunermut soraarnerussutisiaqalernissamullu sillimmasiineremut selskabimi Kalaallit Nunaanni angerlarsimaffeqartumi pilersinneqarsimasut, akileraaruserneqassapput 45 procentimik.

Imm. 3. Imm. 1 aamma 2 malillugit tunniussinernut naligiissitaapput allamut tunniussineq imaluunniit allamut pigisassanngortitsineq qularnaveeqqutissatulluunniit tunniussineq kiisalu iliuutsit il.il. aaqqissuussinerup ilanngaatigineqarsinnaaneranut piumasaqaatitaanik naammassinnissinnaajunnaarnermik kinguneqartut. 45 procentimik akileraaruserneqassapput aningaasat allamut tunniussinerup iliuuseqarnerulluunniit nalaani aaqqissuussinerup atorunnaarnerani tunniunneqarsinnaagaluartut akeqanngitsumik isumaqatigiissutip assigisaataluunniit naligisinnaasaattut.

Imm. 4. Imm. 1-imiit 3-mut maleruagassat atussanngillat pigeqatigisanik aapparisaamut agguaassinermi. Agguaassinerup kingornatigut aapparisaq nammineerluni akileraartartunngusaaq imaluunniit pissarseqataassutiminit akileraarutinit akitsuutinullu akiliisussanngusaaq, aammalu § 40, imm. 2-mi maleruagassat malillugit salliutitatut inississinnaalluni.

Imm. 5. Akileraarutinit akiliisussaataasup pisussaaffigaa soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamut sillimmasiinermit selskabi iliuutsit imm. 3-mi taaneqartut pillugit piaartumik ilisimatissallugu.

§ 47. Soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu selskabip tunniussisussap § 46 malillugu akileraarut unerartissavaa akileraaruseriffimmullu akilerlugu soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu sillimmasiinermit selskabip akileraarummik akiliisussaataaernermit paasisaqarnerata kingornatigut kingusinnerpaamik qaammatip ataatsip qaangiunnerani.

Imm. 2. Soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamulluunniit sillimmasiinermit selskabi akileraarummik unerartitsisussaanerminik naammassinninngitsoq, imaluunniit aningaasanik ikippallaanik unerartitsisoq aningaasat amigaataasut akilernissaannut toqqaannartumik landskarsimut akisussaasunngusaaq, soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu sillimmasiinermit selskabip uppersarsarsinnaanngippagu inatsimmi matumani aalajangersakkat qarsupissimanagit. Soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamullu sillimmasiinermit selskabip aningaasat unerartitassat landskarsimut akilertussanngussavai. Akiligassat akilersinniarneqarsinnaapput inatsimmi matumani maleruagassat malillugit.

Imm. 3. Akileraarutit akileraaruseriffimmut akilernerneqarnissaanut maleruagassat sukumiinerusut Naalakkersuisut aalajangissavaat.

Kapitali 5

Kattunneq, avissaarneq aamma kinguaariinnut tullernut nikisitsineq il.il.

§ 48. Aktie- imaluunniit anpartsselskabit § 1, imm. 1, nr. 3-mi taaneqartut kattunnerini, kapitalimi uani maleruagassat naapertorlugit selskabit akileraaruserneqarnissaat akileraaruseriffiup akuerisinnaavaa.

Imm. 2. Kattunneq pisarpoq selskabip pigisani tamaasa selskabimut allamut tunippagit imaluunniit tassunga kattuppat.

Imm. 3. Raajartassanik imaluunniit aalisariummik tunniussinermit kapitalimi uani kingoraarsinnaanermit maleruagassat atornerqarsinnaanerit akileraaruseriffiup akuersissutigisinnaavaa, tunniussaqqartoq

aammalu aktie- imaluunniit anpartsselskabi tunniussiffigineqartoq § 1, imm. 1, nr. 1 aamma 3 naapertorlugit tamakkiisumik akileraartussaataaappata. Taamaattorli raajartassanut aalisariummullu akiliutit tamarmiusut selskabimi tunniussiffigineqartumi aktiatut anpartitulluunniit akilerneqassapput.

§ 49. Akuersissummut § 48, imm. 1-imi taaneqartumut immikkut piumasarsianik akileraaruseriffik aalajangersaasinnaavoq.

Imm. 2. Akuersissuteqartoqassappat selskabimi unittumi piginneqataasut taamaallaat akiliuteqarfigineqassapput selskabimi ingerlaqqittumi aktianik imaluunniit anpartinik aammalu aningaasanik naammaqusiutissaqassappat pappiaqqat taakku nalingisa, imaluunniit nalingat allassimanngippat taakku naatsorsuutini nalingisa annerpaamik 10 procentiinik tunineqassallutik.

Imm. 3. Imm. 2-mi aalajangersagaq aktianut imaluunniit anpartinut selskabip ingerlaqqittup selskabimi unittumi piginneqataassutaanut atuutinngillat.

Imm. 4. Aammattaq akuersissuteqartoqassappat ulloq kattuffik tassaassaaq ulloq, selskabip ingerlaqqittup naatsorsuuseriffittut ukiuata killiffia. Akileraarutit tungaasigut ulloq kattuffik tassaatinneqarpoq ulloq kattunnermut atatillugu selskabip ingerlaqqittup aallartiffittut naatsorsuuteqalerfia.

§ 50. Selskabip ingerlaqqittup § 48, imm. 1 naapertorlugu kattunniarnermut qinnuteqaammini ilanngutissavaa, selskabit pillugit inatsisit malillugit piumasaqaataasut kattunnermut atatillugu uppersarsaasiat assilineri.

Imm. 2. Tamatuma saniatigut uppersarsaatit suut qinnuteqaammut ilanngullugit selskabip ingerlaqqittup nassutissanerai akileraaruseriffiup nammineq aalajangissavai.

§ 51. Selskabip unittup piffissami, ukiup aningaasarsiorfusup nalinginnaasup kingulliup naaneraniit ullup kattuffiusup tungaanut aningaasarsiaasa akileraaruteqaataasussat naatsorsornerini, piffissap qanoq siviutiginera apeqqutaatinnagu aningaasarsiat angissusilerneqas-sapput. Kattunnermut atatillugu selskabip atorunnaarsinneqarnera apeqqutaatinnagu angissu-siliineq pissaaq. Qaammatisiutit malillugit ukiumut aningaasarsiorfusumut taarsiullugu selskabip ukioq aningaasarsiorfia nalinginnaasoq ulloq 31. december sioqqullugu naappat, ullorlu kattuffiusoq ukiup nalinginnaasumik aningaasarsiorfusup qaangiutereernerani, taamaattorli qaammatisiutit malillugit ukiup pineqartup naannginnerani pippat, taava ukiup kingulliup aningaasarsiorfusup naatsorsorneqarnera tassaassaaq ukiup aningaasarsiorfusup aallartinneraniit ulloq kattuffik tikillugu.

Imm. 2. Piffissamut imm. 1-imi pineqartumut nammineerluni nalunaarsuutip tunniunneqarnissaa selskabip ingerlaqqittup isumagisassaraa. Inatsimmi matumani aalajangersakkat malillugit selskabimut unittumut akileraarutinut akiligassiissutigineqarsinnaasut aammalu pillaaammik akiliisitsissutit suulluunniit selskabimit ingerlaqqittumit akiligassatut akisussaaffigineqassapput. Selskabip unittup akileraaruseriffimmit tapitigut aammalu akileraarpallaarsimanikkut pissarsiassai selskabimit ingerlaqqittumit pisassarineqassapput, tak. akileraaruserinermik ingerlatsineq pillugu Inatsisartut inatsisaanni § 27, imm. 5.

§ 52. Pigisat akiligassallu kattunnerup nalaani selskabimit unittumit pigineqartut, selskabip ingerlaqqittup aningaasarsiaasa akileraaruteqaataasussat naatsorsorneqarnerini piffissani, selskabip unittup

pissarsiarinniffiini pissarsiarineqartutut isigineqassapput, aammalu akit selskabip unittup pissarsiarimmagit akiusut atorineqassallutik. Selskabip unittup akileraarutitigut nalikilliliissutigisimasinnaasai aammalu nalinginik appaassutigisimasinnaasai selskabip ingerlaqqittup taamatut pisimasaasut isigineqassapput.

Imm. 2. Pigisat akiligassallu selskabip unittup iluanaarniarluni imaluunniit inuussutissarsiornermut atatillugu pissarsiarisimasai selskabip ingerlaqqittup aningaasarsiaasa akileraaruteqaataasussat naatsorsorneqarnerini, selskabip taassuma iluanaarniarluni imaluunniit inuussutissarsiornermut atatillugu pissarsiarisimasaasut isigineqassapput. Pigisap imaluunniit akiligassap kattunnermut atatillugu selskabimit unittumit selskabimut ingerlaqqittumut nuunneqarsimanera, selskabip ingerlaqqittup aningaasarsiaasa akileraaruteqaataasussat naatsorsorneqarnissaanni iluanaarniarluni imaluunniit inuussutissarsiornermut atatillugu pissarsiarisimasaatut isigissallugu akornutissaqanngilaq.

Imm. 3. Aningaasarsiat akileraaruteqaataasussat naatsorsornerini selskabip unittup, pappiaqqanit nalilinnit iluanaarutigiumaagassani annaajumaagassanilu ilanngussimappagit, taava pappiaqqat nalillit selskabip ingerlaqqittup aningaasarsiaasa akileraaruteqaataasussat naatsorsorneqarneranni, selskabimit ingerlaqqittumit iluanaarutitut annaasatullu ilanngunneqarsimasutut isigineqassapput.

Imm. 4. Pigisat akiligassallu selskabip ingerlaqqittup selskabimit unittumit pissarsiarinnigisaasa akileraarutitigut pineqartarneri kattunnikkut allannguuteqassanngillat, pigisat akiligassallu pineqartut taassumanga pissarsiaasimaneri uppersaattissaqarpata, tassa selskabip ingerlaqqittup naatsorsuutaani aammalu akileraarutissaasa naatsorsorneranni immikkut erser-sillugit allassimappata. Taamaattoqanngippat akileraaruseriffiup aalajangissavaa maleruagassat suut pigisat akiligassallu pineqartut pillugit selskabimut ingerlaqqittumut imaluunniit unittumut atorineqassanersut.

Imm. 5. Kattunnerup nalaani selskabi unittoq ukiunut siuliinut tunngasunik amigartooruteqarsimappat amigartoorutit taakku, selskabip ingerlaqqittup aningaasarsiaasa naatsorsorneqarneranni ilanngaatineqarsinnaanngillat. Tamannattaq aningaasaliinnermut isumaqatigiissutinit annaasanut atuuppoq. Kattunnerup nalaani selskabi ingerlaqqittoq amigartooruteqarsimappat, amigartoorutit taakku § 30-imi maleruagassat malillugit pineqassapput.

Imm. 6. Selskabip piginnittuusup ingerlatseqatigiiffiullu 100 procentimik pigineqartup, imaluunniit 100 procentimik pigineqarlutik ingerlatseqatigiiffutigisat akornanni kattunnerni, ingerlatseqatigiiffimmi unittumi ingerlatseqatigiiffimmilu ingerlaqqittumi amigartoorutit § 30-mi maleruagassat malillugit pineqassapput.

Imm. 7. Kattunnerup nalaani Selskabit arlaat ukiup kattuffiusup siuliini amigartooruteqarsimappat amigartoorutit taakku, selskabimi unittumi imaluunniit ingerlaqqittumi isertitat akileraaruteqaataasussanit ukiunut siuliinut qaninnernut tallimanut uterluni ilanngaatineqarsinnaanngillat, tassa § 30, imm. 6-imi aalajangersagaq apeqqutaatinnagu.

§ 53. Selskabimi unittumi aktiaatit imaluunniit anpartit selskabip ingerlaqqittumut aktianik imaluunniit anpartinik taarsernagit allatut akilersillugit tunineqarpata, allamut tunisinertut isigineqassapput. Tunisineq ullormi kattuffiusumi § 49, imm. 4-mi taaneqartumi nalinginut tunisinertut isigineqassaaq.

Imm. 2. Selskabimi unittumi aktianik imaluunniit anpartinik tunisinermi imm. 1-imi taaneqartumi iluanaarutit annaasalluunniit § 16, imm. 2-mi aamma § 34, imm. 1, nr. 2-mi maleruagassat malillugit pineqassapput.

Imm. 3. Selskabimi piginneqataassutilik, aktiat imaluunniit anpartit tunineqartutut isigineqartut saniatigut

selskabimi unittumi suligineqataassuteqarpat, taakkulu piffissani assigiinngitsuni pissarsiarineqarsimappata, taava aktiat anpartilluunniit siullerpaatut pissarsiarineqarsimasut tunineqartut isigineqassapput. Aktiat anpartilluunniit ataatsikkut pissarsiaasimasut, assigiinngitsunillu pisinnaatitsissutillit, ilaalluunniit selskabimit pigineqataasumit inuussutissarsiornermut atatillugu imaluunniit iluanaarniutitut pissarsiarineqarsimasut, ullormi kattuffiusumi § 49, imm. 4-mi taaneqartumi aktiat anpartilluunniit nalingat naapertorlugu tunineqartut isigineqassapput.

§ 54. Aktiat anpartilluunniit kattunnermut atatillugu selskabimit ingerlaqqittumit atorunnaarsinneqartut selskabip aningaasarsiaasa akileraaruteqaataasussat angissusilerneqarneranni ilanngunneqassanngillat, tassa iluanaarutaagaluarpata annaasaqaataagaluarpataluunniit.

Imm. 2. Selskabip ingerlaqqittup selskabimit selskabinilluunniit unittunit pigisanik akiligassanillu tigusernermut atatillugu nammineq aktiaatini anpartiutiniluunniit pissarsiarippagit, atorunnaarsitsinermut atatillugu iluanaarutit imaluunniit annaasat selskabip aningaasarsiaasa akileraaruteqaataasussat angissusilerneqarnerini ilanngunneqassanngillat.

§ 55. Selskabimi ingerlaqqittumi aktiat anpartilluunniit selskabimi pigineqataasut selskab-imi unittumi aktiaatiminnut anpartiutiminnuunniit taarsiullugit pissarsiaat aningaasarsiat akileraaruteqaataasussat naatsorsorneqarnerini piffissami, aktiat anpartilluunniit taarserneqartut pissarsiarineqarfigisimasaanni, taakkulu akigisimasaat naapertorlugit pissarsiarineqarsimasutut pineqassapput. Selskabimi ingerlaqqittumi aktiat anpartilluunniit pissarsiarineqartut selskabimi piginnittunit inuussutissarsiornermut atatillugu imaluunniit iluanaarniarluni pissarsiarineqarsimasutut isigineqassapput, aktiat anpartilluunniit taarserneqarsimasut taamatut siunertaqarluni pissarsiaasimappata.

Imm. 2. Aktiat anpartilluunniit taarserneqartut piffissani assigiinngitsuni pissarsiarineqarsimappata imaluunniit ilaat selskabimi pigineqataasut inuussutissarsiornerminnut atatillugu imaluunniit iluanaarniarlutik pissarsiarisimappatigit, taava aktianik anpartinilluunniit pissarsinerit ataasiakkaat selskabimi ingerlaqqittumi aktianik anpartinilluunniit taakku naleqqataannik taarserneqartutut isigineqassapput. Angissusiat aktiat anpartilluunniit ullormi kattuffimmi, § 49, imm. 4-mi taaneqartumi nalingat malillugu naatsorsorneqassaaq. Aktiat anpartilluunniit pissarsiarineqartut assigiinngitsunik pisinnaatitsissutitaqarpat, taava aktiat anpartilluunniit pissarsiarineqartut ataasiakkaat tamarmik immikkut naatsorsorneqassapput.

§ 56. Sulliviit suleqatigiiffiusut § 1, imm. 1, nr. 4, 6 aamma 7-imi taaneqartut kattunneranni kapitalimi matumani periaatsit taaneqartut atorneqarsinnaanerat, matumani ilanngullugit tamatumunnga piumasaqaatinik aalajangersaaneq, akileraaruseriffimmit akuerineqarsinnaavoq.

Imm. 2. Aktie- imaluunniit anpartsselskabip Kalaallit Nunaanni angerlarsimaffeqartup selskabillu nunami allami angerlarsimaffeqartup, imaluunniit selskabit tamarmik nunani allani angerlarsimaffeqartut kattunneranni kapitalimi matumani periaatsit taaneqartut atorneqarsinnaanerat, matumani ilanngullugit tamatumunnga piumasaqaatinik aalajangersaaneq, akileraaruseriffimmit akuerineqarsinnaavoq.

Imm. 3. Aktie- imaluunniit anpartsselskabip aggulunneqarnerani kapitalimi matumani periaatsit taaneqartut atorneqarsinnaanerat, matumani ilanngullugit tamatumunnga piumasaqaatinik aalajangersaaneq, akileraaruseriffimmit akuerineqarsinnaavoq.

Imm. 4. Pigisanik nalilinnik aktie- imaluunniit anpartsselskabimut nuussinermi kapitalimi matumani periaatsit taaneqartut atorneqarsinnaanerata, matumani ilanngullugit tamatumunnga piumasaqaatinik aalajangersaaneq, akileraaruseriffimmit akuerineqarsinnaavoq.

§ 57. Naalakkersuisut, Naalakkersuisulluunniit tamatumunnga piginnaatitaata akuersissutigisinnaavaat sulisup akissarsiaasa ilaasa, selskabimi aktianik anpartinilluunniit pisinerminut atugaasa aatsaat ukiumi aningaasarsiorfusumi, pineqartup aktiaatinik anpartiutiminilluunniit taaneqartunik tunisiffigisaani aningaasarsianut akileraaruteqaataasussanut ilanngunneqarnissaat, taamaattorli kingusinnerpaamik piffissami pineqartup tamakkiisumik akileraartussaanerata naanerani. Tamanna aamma atuuppoq aktiat anpartilluunniit nalikinnerutillugit pisiarinerisa nalingannut, sulisup aktianik anpartinilluunniit pisinermini akiliutikinnerussutaanut.

Imm. 2. Imm. 1 malillugu akuersissuteqarnissamut piumasaavoq sulisup aamma selskabimi aktianik amerlanernik peqartup imaluunniit anpartinik amerlanernik peqartup akunneranni kinguaariinnut tullernut nikinnissaq pillugu allaganngorlugu isumaqatigiissuteqarsimanissaq kiisalu aamma sulisup selskabillu Kalaallit Nunaannut tamakkiisumik akileraartussaannissaat.

Imm. 3. Imm. 1 naaportorlugu aningaasat annertussusaat kisimiitsillugit akuerineqarsinnaasut ukiumi aningaasarsiorfimmi ataatsimi 50.000 koruuninit annerusinnaanngillat.

Imm. 4. Kinguaariinnut tullernut nikinnissamik isumaqatigiissut eqqortinneqanngippat, imm. 1-imi aalajangersagaq apeqqutaatinnagu sulisup ukiumi aningaasarsiorfusumi kinguaariinnut tullernut nikinnissamik eqquutsitsiunnaarfusumi aningaasat ilanngutissavai.

§ 58. Akileraaruseriffiup akuerisinnaavaa imm. 2-miit 4-mut maleruagassat atorneqassasut suli inuutilluni suliffeqarfiup ilaataluunniit qitornanut, ernuttanut, qatanngutitut, qatanngutit meeraannut imaluunniit qatanngutit ernutaannut tunniunneqarnissaat, tunniussisoq piginnittunngortorlu § 1, imm. 1, nr. 1 naaportorlugu Kalaallit Nunaanni tamakkiisumik akileraartussaataappata. Qitornavissiartaarisimasat qitornarsiallu ilaqtavittut isigineqarput.

Imm. 2. Suliffeqarfiup pigisai nalillit tunniunneqarpata akileraarutitigut nalingannik annerusumilluunniit nalilerlugit, kisiannili nalinginnaasumik nioqqutigissagaanni nalissaraluannit appasinnerusumik, piginnittunngortoq aningaasarsiat akileraaruteqaataasussat naatsorsorneranni akileraarutitigut nalikilliliissutitut kiisalu iluanaarutit akileraaruserneqarnerannut aamma tunisinermi ajunaarutit ilanngaatineqarsinnaanerannut tunngatillugu piginnittoq inissisimassaaq soorlulusooq pigisat nalillit piginnittunngortumit pissarsiarineqarsimasut piginnittuusimasup nalimini akiligaatut akeqartillugit. Tunniussisup akileraarutitigut nalikilliliissutigisimasinnaasai piginnittunngortup nalikilliliissutigisimasaatut isigineqassapput. Tunniussisup pigisat nalillit inuuniutiminut iluanaarniarnerminulluunniit atatillugu pissarsiarisimappagit iluanaarutit annaasalluunniit pigisat nalillit tunineranni pilersut piginnittuulersumit suliaasut, taassuma aningaasarsiaasa akileraaruteqaataasussat naatsorsorneqarnerannut ilanngunneqassapput imaassimappat iluanaarutit annaasalluunniit tunniussisup aningaasarsiaasa akileraaruteqaataasussat naatsorsorneqarneranni ilanngunneqartussaasimagaluartut taassuma pineqartut tunisarimisappagit.

Imm. 3. Akileraarutitigut kingornussinermut, takuuk imm. 2, taarsiullugu tunniussisup piginnittunngortullu toqqarsinnaavaat suliffeqarfiup allamut tunniunneqarnerani iluanaarutit ajunaarutillu naatsorsussallugit suliffeqarfiit allamut pigisassanngortitaaneranni malittarisassat nalinginnaasut malillugit, suliffeqarfiup

pigisai nalillit nalit imm. 2-mi taaneqartut sinnernagit tunniunneqarsimagaluarpataluunniit.

Imm. 4. Ukiumi pigilernerata siulianiittumi amigartoorutit piginnittuulersup suliffeqarfiup tigunerani iluanaarutinit ilanngaatisinnaangilai.

Kapitali 6

Akilaraarutit naatsorsorneqarnissaat

§ 59. Kapitalimi uani maleruagassiat naapertorlugit inuit selskabillu il.il. tamakkiisumik ilaannakortumillu akileraartussaasut nuna tamakkerlugu akileraarummik, kommuninut ataatsimut akileraarummik, kommunimut akileraarummik, nuna tamakkerlugu akileraarummik immikkut ittumik, iluanaarutisianit akileraarummik ingerlatseqatigiiffillu akileraarutaannik akiliisartussaapput.

§ 60. Selskabit tamakkiisumik ilaannakortumillu akileraartussaasut isertitamik akileraarusigassat 30 procentiinik selskabit akileraarutaannik akiliisassapput.

Imm. 2. Selskabit, Kalaallit Nunaanni atortussiasat aatsitassanit il.il. pisut pillugit inatsit naapertorlugu misissuinissaminnut imaluunniit iluaqutiginninniarnissaminnut akuersisummik peqartut, imaluunniit sermip erngullu avammut nioqqutissat atorneqarnissaat pillugu Inatsisartut inatsisaat naapertorlugu akuersisummik peqartut, isertitanik akileraarusigassat 30 procentiinik selskabit akileraarutaannik akiliisassapput.

§ 61. Nunamut tamarmut akilaraarutissaq akilertussanngortinneqassaaq aningaasarsianit akilaraarutissat procentiannik Inatsisartunit aalajangerneqartumik, takuuk § 66.

Imm. 2. Nunamut tamarmut akilaraarutitut procenti atugassaaq qaammatsiutit malillugit ukioq akilaraarfusoq sioqqullugu 15. november tikitsinnagu Inatsisartut aalajangertassavaat.

§ 62. Kommunimut akilaraarutissaq akilertussanngortinneqassaaq aningaasarsianit akilaraarutissat procentiannik kommunimit akilararfissamit aalajangerneqarsimasumik, takuuk § 66.

Imm. 2. Procenti kommunimut akilaraarutissaq qaammatsiutit malillugit ukioq akilaraarfissaq sioqqullugu 1. december tikitsinnagu kommunalbestyrelsip aalajangissavaa. Procenti akilaraaruteqaataasussaq annerpaamik 30 procentimut minnerpaamillu 20 procentimut aalajangerneqarsinnaavoq.

Imm. 3. Akilaraartussaaitat Akilaraartarnermut Pisortaqarfimmik akilaraarfittut kommunil-lit, § 68, imm. 2 naapertorlugu kommunimut akilaraarutitik akilaraassanngillat.

§ 63. Kommuninut ataatsimut akilaraarutissaq akilerneqartussanngortinneqassaaq Inatsisartut procentimik aalajangiutaanik annertussuseqartumik, takuuk § 66.

Imm. 2. Kommuninut ataatsimut akilaraarummut procenti akilaraarutissaq Inatsisartunit, Kalaallit Nunaanni Kommuneqarfiit Kattuffiannik isumaqatiginninniareermermi, aalajangerneqassaaq qaammatsiutit malillugit ukioq akilaraarutip atuutilerfissaa sioqqullugu ukiup affaani siullermi Inatsartut ataatsimiinneranni.

Imm. 3. Akilaraartussaaitat Akilaraartarnermut Pisortaqarfimmik akilaraarfittut kommunil-lit, § 68, imm. 2 naapertorlugu kommuninut ataatsimut akilaraarutitik akilaraassanngillat.

§ 64. Nunamut tamarmut immikkut akileraarutissaq akilerneqartussanngortinneqassaaq Inatsisartut procentimik aalajangiutaanik annertussuseqartumik, takuuk § 66.

Imm. 2. Nunamut tamarmut immikkut akileraarutit procentia qaammatisiutit malillugit ukioq akileraarfissaq sioqqullugu 15. novemberiutinnagu Inatsisartut aalajangissavaat.

Imm. 3. Akileraartussaataasunit § 68, imm. 2 naapertorlugu Akileraartarnermut Pisorta qarfimmik akileraarfittut kommunillit nunamut tamarmut immikkut akileraarutit taamaallaat akilerneqartassapput.

§ 65. Iluanaarutisianit akileraarutit atuisinnaatitaanermillu akileraarutit unerartinneqassapput §§-ini 86-imiit 92-imut aalajangersakkat malillugit.

§ 66. Inunnut § 1, imm. 1, nr. 1 aamma 2 kiisalu § 2, imm. 1, nr. 1, 3, 4, 5 aamma 6-mi akileraartussaataasutut taaneqartunut isertitat akileraarusigassat taassaapput isertitat akileraaruteqaataasussat inummut ilanngaammik ilanngarneqarsimasut, tak. § 67, isertitat 100-mik agguarneqarsinnaasunut ammut akunnaallineqarsimasut. Tamatuma pissuteqataanik inunnut § 2, imm. 1, nr. 2-mi akileraartussaataasutut taaneqarsimasunut isertitat akileraarusigassat ikilineqassapput, piffissap soraarniarfiup nalaani aningaasarsiaqarsimanerat naapertorlugu.

Imm. 2. Selskabit il.il. akileraartussaasut inuillu killilimmik akileraartussasut imm. 1-imi pineqanngitsut, isertitaat akileraarusigassat tassaapput isertitat akileraaruteqaataasussat koruuninut 100-mik agguarneqarsinnaasunut qaninnermut ammut akunnaallisat.

Imm. 3. Taamaakkaluartoq akileraartussaatanut inunnut § 2, imm. 1, nr. 8-mi taaneqartunut aningasarsianit akileraarusigassat malittarisassat imm 1-imiittut malillugit naatsorsorneqarnissaannut Naalakkersuisut aalajangiinnaapput, tassa imaappoq inummut ilanngaammik akuersissuteqarsinnaapput.

§ 67. Inummut ilanngaatiq annertussusissaa qaammatisiutit malillugit ukioq akileraarfiusussaq sioqqullugu ukiup affaani siullermi Inatsisartut ataatsimiineranni aalajangerneqartassaaq.

Imm. 2. Aappariit ataatsimut akileraarusigaasut marlunnik inummut ilanngaateqartitaassapput. Ukiumi aningaasarsiorfiusumi aappaasup toqukkut qimagunnera pissutigalugu aappariinneq atorunnaarpat toqukkut qimagaasuusoq ukiumi tassani marlunnik inummut ilanngaateqartitaassaaq.

§ 68. Kommune akileraarfissaq tassaavoq Kalaallit Nunaanni kommune akileraartussaatiq ukiup aningaasarsiorfiusup siornagut septemberip aallaqqaataani § 1 imaluunniit § 2 malillugu akileraartussaanermut patsisaasumik atassuteqarfigisaa. Akileraartussaataaneq piffissap tamatuma kingorna aatsaat atulernat kommuni akileraarfissaq tassaassaaq kommune akileraartussaatiq akileraartussaataanerup atulernerani oqaaseqatigiinni siullerni taaneqartutut ittumik atassuteqarfigisaa.

Imm. 2. Imm. 1-imi taaneqartutut atassuteqarfik kommunit aggornerisa avataanniippat, imaluunniit akileraartartoq Kalaallit Nunaanni atorussiassat aatsitassanit pisut il.il. pillugit inatsit naapertorlugu aatsitassanik iluaqutiginninniarsinnaanermut akuersissuteqarfigineqarsimappat, taava Akileraartarnermut Pisorta qarfik kommunit akileraarfissatut isigineqassaaq. Taamatuttaaq akileraartartunut, Kalaallit Nunaanni atorussiassat aatsitassanit pisut il.il. pillugit inatsit naapertorlugu ujarlersinnaanermut sulliviuteqarsinnaanermullu akuersissuteqarfigineqarsimasunut kiisalu akileraartartut § 32, imm. 3-mi taaneqartut Akileraartarnermut Pisorta qarfik kommunit akileraarfissaattut isigineqassaaq.

Imm. 3. Kommunalbestyrelsi akileraartussaaitarlunniit isumaqarpata kommune akileraartussaaitamut akileraarfissatut tikkuarneqarsimasooq eqqortuunngitsoq ukiup aningaasarsiorfiup pineqartup naannginnerani kommunimi akileraarfigisassanngukkami kommunalbestyrelsimut akerriliissuteqartoqarsinnaavoq. Kommunitut akileraarfissatut Akileraartarnermut Pisortaqarfik tikkuarneqarsimapput, tak. imm. 2, Akileraartarnermut Pisortaqarfimmut akerriliissuteqartoqassaaq. Nalornisoorneqartillugu Akileraartarnermut Pisortaqarfiup aalajangertassavaa sorleq kommunitut akileraarfissatut isigisariaqarnersoq. Taamaattoq Akileraartarnermut Pisortaqarfik kommunitut akileraarfiutillugu nalornissuteqarnermi Naalakkersuisut aalajangiisassapput.

Imm. 4. Aapparit ataatsimut akileraaruserneqartussat kommuninik assigiinngitsunik akileraarfissaqarpata uiusup kommuniani maleruagassiat najoqqutaralugit akileraarutit naatsorsorneqassapput. Immikkut ittumik pissutissaqartillugu nuliaasup kommuniani malittarisassat najoqqutaralugit akileraarutit naatsorsorneqarnissaat akileraaruseriffimmit taamaattoq akuerineqarsinnaavoq. Tamatuminnaga qinnuteqarneq kingusinnerpaamik ukiumi aningaasarsiorfiusumi aningaasarsiat akileraaruteqaataasussat pillugit nammineerluni nalunaarsuutip nassiunneqarnera peqatigalugu nassiunneqassaaq.

§ 69. Akileraarutit naalagaaffimmut takornartamut, Danmarkimut Savalimmiunulluunniit akilerneqarsimasut aammalu aningaasarsianit taakkunannga aallaaveqartunit toqqaannartumik akileraarusiinnikkut unerartitsinikkulluunniit tiguniarneqarsimasut aningaasarsianit taakkunannga Kalaallit Nunaannut aningaasarsianit akileraarutinit akilerneqartussanit ilanngaatigineqarsinnaapput. Taamaattorli ilanngaatigineqartut akimorsinnaanngilaat Kalaallit Nunaanni akileraarutigineqartut tamarmiusut ilaat aningaasarsiat ilaasa naalagaaffimmi takornartami, Danmarkimi Savalimmiuniluunniit akileraaruserneqarsimasut aammalu aningaasarsiat Kalaallit Nunaanni akileraaruteqaataasut tamarmiusut imminnut sanilliullugit qanoq amerlatiginerat malillugu aningaasarsianut siulliullugit taaneqartunut tuttussaasut.

Imm. 2. Naalagaaffik takornartaq, Danmarki Savalimmiulluunniit marloriaammik akileraaruteqartitaanissaq pinngitsoorniarlugu isumaqatigiissuteqarfigineqarsimappata taamaattoq naalagaaffiup taassuma, Danmarkip Savalimmiulluunniit isumaqatigiissut malillugu pinngitsoorlat pisassarisaanit amerlanerusunik ilanngaatisaqqartitsineqassanngilaq.

§ 70. Inuk § 1 naapertorlugu akileraartussaaitaasooq umiarsuarimi Dansk Internationalt Skibsregisterimi nalunaarsorsimasumi Kalaallit Nunaatalu imartaani angalasuunngitsumi sulisimanermigut akissarsiaqarsimappat, akileraarutissat tamarmiusut akissaarsiat taakkua akileraarutitaannut naapertuuttumik annertussusilinnik appartinneqassapput.

Imm. 2. Maleruagassamut imm. 1-imiittumut ilaavortaaq inuk § 1 naapertorlugu akileraartussaaitaasooq umiarsuarimi usinik angallassissummi Dansk Internationalt Skibsregisterimi nalunaarsugaasumi sulinermigut akissarsisimasooq, aammalu Kalaallit Nunaata nunallu allat, tamatumani ilanngullugit Danmarki Savalimmiullu, akornanni aalajangersimasumik usinik angallassinermi inuttaasooq.

Imm. 3. Imm. 1-imi maleruagassamut ilaavortaaq inuk § 1 naapertorlugu akileraartussaaitaasooq umiarsuarimi usinik angallassissummi 1.100 bruttotonnage taannalluunniit qaangerlugu usitussusilimmi Dansk Internationalt Skibsregisterimi nalunaarsugaasumi aammalu umiarsuarni usinik angallassissutini imm. 2-mi taaneqartuni Kalaallit Nunaanni umiarsualivimmiit umiarsualivimmut usinik

aalajangersimasumik angallassinermi inuttaanermigut akissarsiaqartoq kiisalu uuliamik assartuutini 450 bruttotonnage taannaluunniit qaangerlugu usitussusilinni.

§ 71. Kalaallit umiarsuaataat ilaasartaatit 1.100 taannaluunniit sinnerlugu bruttotonageqartut, takornarianik akuleriisitsineqarnermilluunniit angallassisut, akileraaruseriffiup umiarsuarni inuttat akissarsiaasa akileraarutitaat pillugit aaqqissuussinermut nalunaarsuiffiani ilanngunneqarsinnaapput, umiarsuarni nalunaarsorsimaffimmi tassani nalunaarsorsimasuni inuttaasut akissarsiaat sulinermilu atugassarisaat pillugit isumaqatigiissutini erseqqissumik allassimappat, taamatut sulinermuinnaq atuuttuusut. Naalakkersuisut nalunaarsorsimaffimmut nalunaarnissamut ilaajunnaarniarlunilu nalunaarnissamut erseqqinnerusunik malittarisassanik aalajangersaasinnaapput.

Imm. 2. Akuleriisitsilluni angallassineq tassaavoq ilaasunik timmisartumut umiarsuarmullu ataqatigiissillugit, Danmarkimiit, Savalimmiuniit imaluunniit nunanit allanit angalatitsinermut atatillugu billitsisimasunik angallassineq, aammalu inissaqartillugu ilaasunut Kalaallit Nunaata iluani angallanneqartussanut billitsinik tuniniaaneqarfusoq.

Imm. 3. Kalaallit umiarsuaat ilaasartaat tassaavoq umiarsuaq Kalaallit Nunaanni nalunaarsugaasoq inuussutissarsiutitut ilaasunik angallassinermut taamaallaat atorineqartoq. Umiarsuaq ilaasartaat Kalaallit Nunaanni nalunaarsugaasoq umiarsuarmut ilaasartaammut Danmarkimi, Savalimmiuni nunani allaniluunniit nalunaarsugaasunut, inuttaqartinnagu ilaasunik angallassissutitut kalaallit umiarsuaateqarfiannit attartorneqarpat, assigittinneqarpoq. Umiarsuup ilaasartaatip Kalaallit Nunaanni nalunaarsugaasup ilaasunik angallassinera, inuttaqartinnaguli qallunaat, savalimmiormiut, nunani allamiulluunniit umiarsuaateqarfiannit ilaasunik angallassinera ingerlanneqalerpat, kalaallit ilaasunik angallassissutaattut isigineqassanngilaq.

Imm. 4. Inuk ilaasunik angallassissummi, akileraaruseriffiup umiarsuarni inuttat akissarsiaasa akileraarutitaat pillugit aaqqissuussinermut nalunaarsuiffiani ilaasumi, sulisimanermigut akissarsiaqarsimappat, akileraarutissat tamarmiusut akissarsiat taakkua akileraarutitaannut naapertuuttumik annertussusilinnik appartinneqassapput.

Imm. 5. Sulinikkut akissarsiat, umiarsuup sananeqarnermini nunamiinnerani, iluarsaanneqarnerani imaluunniit unitsinneqarallannerani nunamiinnerata nalaani, imm. 4-mi pineqartunut ilaatinneqarput.

§ 72. Inuk § 1 naapertorlugu akileraartussaataitaasoq pisariaqavissuinnarnut ikiorsiissutininik imaluunniit pisariaqartitsineq naapertorlugu annertusisanik ikiorsiissutininik § 34, nr. 10 malillugu akileraaruteqaataasussaannigitsutut isigineqanngitsunik pissarsisimappat, akileraarutissat tamarmiusut aningaasarsiat taakkua akileraarutitaannut naapertuuttumik annertussusilinnik appaartinneqassapput.

Kapitali 7

Akileraarutininik akiliisitsiniaaneq

§ 73. Nunamut tamarmut akileraarutit, kommuninut ataatsimut akileraarut, kommunimut akileraarutit nunamullu tamarmut akileraarutit immikkut ittut kapitalimi uani maleruagassat najoqqutaralugit akilersinniarneqassapput. Iluanaarutisianit akileraarutit aamma atuisinnaanermut akileraarutit akilersinniarneqartassapput maleruagassat kapitali 8-miittut najoqqutaralugit.

Imm. 2. Inuit akileraartussaataitat ukiup aningaasarsiorfusup ingerlanerani akileraarutaagal-lartunik

akiliinikkut akileraarutit akilertassavaat, taamaattoq takukkit § 76, imm. 2, oqaaseqatigiit pingajui, § 86, imm. 1 aammalu § 91, imm. 1.

Akileraarutit A-t aamma B-t

§ 74. Aningaasat §§-ini 76-imiit 82-imut maleruagassiat najoqqutaralugit unerartitsinikkut akilernerqartartut "akileraarutit A-nik" taagorneqarput. Aningaasarsiat akileraaruteqaataasussat akileraarutininik A-nik imaluunniit kap. 8 malillugu iluanaarutisianit akileraarutininik unerartitsi-nikkut akileraarusiiffigineqassanngitsut "aningaasarsiat B"-nik taagorneqarput. Aningaasarsianit B-nit akileraarutaagallartut, tak. §§ 83 – 84,"akileraarutit B-nik" taagorneqarput.

§ 75. Aningaasarsianut A-nut naatsorsuunneqarput:

1) Sulissarsiarineqarluni nammineerluni sulinermt aningaasanngorlugit akissarsiat suulluunniit, ilaallutik akissarsiat (nalinginnaasut), feeriarnerisutit, honorarit, iluanaarutinit kajumissaatitut tapisiat, kiffartulussinnarnaveeqqutisiat, drikkepengit akiliutillu taakku assigisaat. Aningaasanngornagit akissarsiat taamaallaat aningaasarsiat A-jussapput tamanna pillugu Naalakkersuisut malittarisassaliorsimanerattut annertutigisumik.

2) Siulersuisunut, ataatsimiititalianut, kommissioninut, siunnersuisoqatigiinnut assigisaannullu ilaasortaanermi ikiortaanermiluunniit akissarsiat.

Imm. 2. Malittarisassiat Naalakkersuisunit aalajangersarneqarsimasut najoqqutaralugit aningaasarsianut A-nut naatsorsuunneqarsinnaapputtaaq:

1) Isertitat allat tassaasut inuussutissarsiutillip aningaasarsiai akissajaatinik ilanngariikkat, aamma

2) aalisarnermit, piniarnermit, aallaaniarnermit, savaateqarnermit sanalunnermillu tunisassianik Kalaallit Nunaanni tunisinermi isertitat selskabit, peqatigiiffiit assigisaasaluunniit tunisarinngippatigit.

Imm. 3. Isertitat aningaasarsiatut A-tut isigineqassanngillat tunniussisut tassaappata:

1) Naalagaaaffiit takornartat naalakkersuisuisa allartitaat taakkunungalu ilaasut kiisalu naalagaaffiit takornartat konsulii, imaluunniit

2) Inuit, toqusut pigisaat, selskabit, peqatigiiffiit, atorfeqarfiit il.il. Kalaallit Nunaanni eqqartuussisoqarfimmik najugaqarfeqanngitsut, taamaattoq takuuk § 76, imm. 4.

Imm. 4. Naalakkersuisut immikkut ittumik pissutissaqartillugu malittarisassaliorsinnaapput taakku

najoqqutaralugit isertitat aalajangersimasut imaluunniit isertitat allat imm. 1-imi 2-miluunniit

aalajangersakkanut ilaasut isertitat A-tut isigineqassanngitsunik. Naalakkersuisut

malittarisassaliorsinnaapputtaaq taakkua malillugit isertitat ilaat imm. 1-imi 2-milu aalajangersakkani

pineqartunut ilaasut pissutissaqartillugu isertitat A-tut isigineqassanngitsunik.

Imm. 5. Nalornisoqartillugu Naalakkersuisut aalajangissavaat aningaasarsiaq aningaasarsi-atut A-tut B-tulluunniit isigineqassanersoq.

§ 76. Isertitanik A-nik tunniussinernut tamanut atasumik kinaluunniit tunniussisoqarneratigut

akiligassaqartitaasoq aningaasanit tunniunneqartunit akileraarutaagallartunik ilanngaassaaq. Immikkut

akissarsiaritittakkanit, soorlu feeriarnerisutinit sapaataanngitsunilu nalliuttuni akissarsianit qaqugukkut

akileraarutininik ilanngaansamut ukiumilu aningaasarsiorfimmi sorlermi akissarsiaritittakkat taakkua

akileraarusigaanissaannut immikkut maleruagassat Naalakkersuisut aalajangersarsinnaavaat.

Imm. 2. Akileraarutissanik ilanngaaneq pisassaaq ilanngaasussaaitap aningaasanik akileraarutissanik naatsorsuillunilu taakkuninnga aningaasarsianit A-nit ilanngaaneratigut. Tamakkiisumik akileraartussaaitanut aningaasat taakku tassaapput akileraarutit A-nut akileraarutaagallartut. Killilimmik akileraartussaaitanut akileraarutit A-t ilanngaatineqartut tassaapput inaarutaasumik akileraarutit.

Imm. 3. Akileraarutininik aningaasarsianit A-nit pineqartunit unerartitsinerit, piumasaqaataasunit allanit, tamatumani aamma unerartitsisussaaitaasunit piumasaqaataasunit, salliutinneqartussaapput.

Imm. 4. Aningaasarsianit pineqartunik akiligassaqaartitaasoq Kalaallit Nunaanni eqqartuussisoqarfimmik najugaqarfeqanngippat tunniussinerlu taamaaliornissamut piginnaatitaasumit Kalaallit Nunaanni eqqartuussisoqarfimmik attavigisaqartumit isumagineqarpat piginnaatitaasoq taanna unerartitsisussaavoq.

Imm. 5. Naalakkersuisut malittarisassiorsinnaapput unerartitsisussaaitap akileraarutininik A-nik naatsorsuinermini aningaasat akileraarutit naatsorsorneqarfissaat koruuninut 10-mik agguarneqarsinnaasumut qaninnerpaamut ammut akunnaallissagai.

Imm. 6. Akileraarutit A-t unerartitassat minnerpaamik killissaat Naalakkersuisut aalajangersinnaavaat.

§ 77. Aningaasarsiat A-t Lønmodtagernes garantifondikkut tunniunneqaraangata akileraarutininik unerartitsisussaq pisussaavoq – aningaasat aningaasaateqarfimmit tunniunneqarsimanngippata – akileraarutit A-t akileraaruseriffimmut akilissallugit, takuuk akileraaruserinermik ingerlatsineq pillugu Inatsisartut inatsisaanni § 34, aningaasat tassaasut aningaasaateqarfiup Lønmodtagernes Garantifond pillugu inatsimmi § 2, imm. 1, oqaaseqatigiit pingajui malillugit aningaasat tunniutinnginneranni akileraarutit ilanngaatigissavai. Unerartitsinissamut malittarisassiat imarisamikkut siuliini taaneqartunut kattutsinneqarsinnaanermisut atuutissapput.

Imm. 2. Aningaasarsianik A-nik pissarsisumut aningaasaateqarfiup akileraarutitut ilanngaatigisai aningaasarsianit akileraarutininut A-nut taarsiuttuupput.

§ 78. Naalakkersuisut danskit naalakkersuisui isumaqatigiiffigisinnaavaat inummit, selskabimit il.il. ilanngullugulu piginnaatitaasumit, naalagaaffeqatigiinnerup ilaani eqqartuussisoqarfimmik attavigisaqartumit aningaasarsianit inummut tamakkiisumik ilaannakortumilluunniit naalagaaffeqatigiinnerup ilaanut allamut akileraartussaaitaasunut tunniunneqartunit akileraarutininik unerartitsisoqassasoq. Taama isumaqatigiissuteqarnermut atatillugu akileraarutininik unerartitsinissamut, unerartitat akilernerqarnissaannut il.il. malittarisassat aalajangersarneqarsinnaapput.

Imm. 2. Isertitat imm. 1-imi isumaqatigiissummi pineqartut inummut Kalaallit Nunaanni tamakkiisumik ilaannakortumilluunniit akileraartussaaitamut tunniunneqartut inatsisip matuma tungaatigut aningaasarsiatut A-tut isigineqassapput.

§ 79. Ilmanarpat inuk akileraartussaaitaq ukiumi aningaasarsiorfusumi pineqartumi A-nik aningaasarsissasoq akileraarutininik unerartitsinermut atugassamik akileraaruseriffiup inuk taanna skattekortimik bikortimillu tunissavaa. A-nik aningaasarsiallit unerartitsisussaaitamut skattekorti tunniulluguluunniit bikorti takutissavaat.

Imm. 2. Akileraarutininik unerartitsineqalersinnagu qammammut, ullut 14-inut, sapaatip akunneranut ullormullu aningaasarsianit A-nit ilanngaatineqartussat akileraaruseriffiup skattekortimut allassavai. Inunnut tamakkiisumik akileraartussaaitanut ilanngaatit tassaapput ukiumi pineqartumi aningaasarsiat

akileraarutillu naatsorsorneranni ilanngaataassangatinneqartut tamarmik ilaat piffissanut pineqartunut naleqqussakkat. Inunnut killilimmik akileraartussaataitaasunut ilanngaaitit tassaapput akileraarutit naatsorsorneranni ilanngaatisaatinneqartussat ilaat piffissanut naleqqussakkat, tak. §§-it 2 aamma 66. Bikortimi ilanngaatisanik allassimasoqassanngilaq.

Imm. 3. Immikkut ittunik pissutissaqartillugu ilanngaatisat skattekortimut allanneqannginnissaannut imaluunniit imm 2-mi taaneqartunit allaanerusumik ilanngaatisap tamarmiusup agguataarneqarnissaanut maleruagassianik Naalakkersuisut aalajangiisinnaapput.

Imm. 4. Akileraaruseriffiup procenti suna atorlugu unerartitsineqartassanersoq skattekortimut bikortimullu allassavaa, tak. §§-it 61-imiit 64-imut.

Imm. 5. Ataasiakkaatigut pissutissaqartillugu ilanngaateqanngitsumik aammalu akileraartussaaitap qanoq akissarsiussangatinneqarnera najoqqutaralugu akileraarutininik unerartitsinermi atugassamik procentitalimmik akileraaruseriffik skattekortiliorsinnaavoq.

Imm. 6. Ataasiakkaani pissutissaqartillugu, soorlu qularnanngippat akileraartussaaitap aningaasarsiai ima annertutigilernaviangitsut aningaasarsianit akileraarutininik akiliissalluni, akileraaruseriffik siunissami atuuttussamik aalajangiisinnaavoq akileraartussaaitap aningaasarsiaanit A-nit akileraarutininik unerartitsineqassanngitsoq. Aalajangiineq taanna A-nik aningaasarsiat ilaannut imaluunniit aningaasarsianut killilimmik aalajangikkanut killilernerqarsinnaavoq. Taamatut aalajangiineqarsimappat A-nik aningaasarsiallip allagartaq unerartitsinnginnissamut uppersarsaat frikorti akileraaruseriffimmit suliarineqarsimasoq aningaasarsianik A-nik akiliisussamut takutissavaa. Immikkut ittutigut taamaaliornissamut pissutissaqaraangat Naalakkersuisut aalajangersinnaavaat frikorti atunngikkaluarlugu aningaasarsiat A-t ilaannit aalajangersimasunit akileraarutininik unerartitsisoqartassanngitsoq.

Imm. 7. Akileraaruseriffiup paasissutissat skattekortimi, bikortimi frikortimiluunniit takuneqarsinnaasut unerartitsissussaaitamut nalunaarutigisinnaavaa. Taamaassappat akileraarutininik A-nik unerartitsineq paasissutissat taakku tunngavigalugit pisassaaq.

§ 80. Akileraartussaaitap skattekorti tunniussimanngippagu imaluunniit bikorti imaluunniit frikorti takutissimanngippagu ilanngaateqanngitsumik 45 procentimik akileraarutininik unerartitsineqassaaq, taamaattorli aningaasarsianit § 75, imm. 2, nr. 2-mi pineqartunit 23 procentimik.

Imm. 2. Kiffartuussinermi akileraartussaaitap aningaasanik kiffartuussinermi kinguneranik inummit allamit tigusaminit tigungminniinnarneratigut aningaasarsianik A-nik pissarsisoqarpat akileraartussaaitap sulisitsisuatalu aningaasanik pineqarsimasunik naatsorsuinerit tamaasa aningaasarsiat A-t naatsorsorneqartassapput, taamaattorli minnerpaamik qaammammut ataasi-arluni. Tamatuma peqatigisaanik akileraartussaaitap akileraarutit A-t aningaasarsianut A-nut naleqquttut sulisitsisuminut tunniuttassavai. Akileraartussaaitaq akileraarutininik tunniussin-ngitsoortoq susassaqaqatigiit akornanni siumut ilisimatitsinissaq pillugu isumaqatigiissutaasimasut soqutiginagit erngerluni suliaminit tunuartussatut soraarsitaasinnaavoq.

§ 81. Aningaasat unerartitsissussaaitap qaammatisiutit malillugit qaammammi unerartissimasani qaammatip taassuma tulliani akileraaruseriffimmut akilissavai.

Imm. 2. Unerartitsissussaaitap unerartitassat tungaasigut peqqissaanngitsumik imaluunniit sumiginnaasumik ileqqoqarfigisaani akileraarutit akilernerqartarnissaat pillugu Naalakkersuisut immikkut ittunik maleruagassiorsinnaapput.

Imm. 3. Maleruagassiat Naalakkersuisut aalajangersarsimasaat malillugit unerartitat pillugit unerartitsisussaaitat nassuiaateqarlutik nalunaaruteqartassapput.

Imm. 4. Maleruagassani imm. 3-mi pineqartuni aalajangerneqarsinnaavoq piffissaatitaq eqqorlugu nassuiaateqanngitsoortoq piffissami pineqartumi akiligassat 1 procentiannik tapiissutaasumik akiliuteqartassasoq. Akiliutissaq minnerpaamik 500 koruuniussaaq annerpaamillu 1.000 koruuniusinnaalluni. Akiliut akileraaruseriffiup pissavaa.

Imm. 5. Unerartitsisussaaitat paasissutissanik nassuiaatit imm. 3-mi pineqartut tunniunneqarneranni atugassanik pissarsiortussaanerat, ilaatigut aningaasarsianik A-nik pisartut inuttut normuinik, aqqinik najugaanillu il.il. allattuisussaanerat, pillugu Naalakkersuisut malittarisassiorsinnaapput. Aamma naalakkersuisut maleruagassianik aalajangersaasinnaapput unerartit-sisussaaitat aningaasarsianik A-nik tunniussinnermut akileraarutinillu A-nik unerartitsinnermut naatsorsuusiortarnerannut tunngasunik.

Imm. 6. Nassuiaatit malillugit aningaasat akiliutigineqartussat tapiissutitut akiliutinik ernianillu ilallit, tak. imm. 4 aamma akileraaruserinnermik ingerlatsineq pillugu Inatsisartut inatsisaanni § 33, imm. 1, akiliutigineqartunit nikingassuteqassagualarpata akileeqqinnissamut utertitsivigineqarnissanulluunniit akiliutissat minnerpaaffigisassa Naalakkersuisut aalajangersarsinnaavaat.

§ 82. Unerartitsisussaaitap aningaasarsianik A-nik pisartuq unerartitsinerit pillugit allaganngorlugit ilisimatittassavaa maleruagassiat Naalakkersuisunit aalajangersarneqarsimasut malillugit.

Imm. 2. Unerartitsisussaaitap aningaasarsianik pisartuq taaneqartutut ilisimatittarumangippagu aningaasarsianik pisartuq akileraaruseriffimmut saaffiginnissuteqarluni piumasaqarsinnaavoq ilisimatitsissutit akileraaruseriffiup akunnermiliunneratigut piniarneqartassasut.

§ 83. Inuk akileraartussaaitaq aningaasarsianit A-nit pinnani isertitanik B-nit, akileraarutaagallartunik akilersuissasoq ilimagisariaqarpat, akileraarutissat allagartaatigoortillugit (skat-tebilletikkoorlugit) akileraarutaagallartut akilersinneqassapput. Aningaasarsianit B-nit akileraarutaagallartut naatsorsorneqassapput akileraartussaaitamut ukiumut pineqartumut inaarutaasumik isertitanik akileraarutinillu naatsorsuinnermi akileraaruteqataasussatut B-nit aningaasarsiarineqassangatinneqartunit ilanngaatigineqassangatinneqartunik ilanngarneqarsimasut.

Imm. 2. Akileraarutinik B-nik akiliitsiniarnermi killissat minnerpaafissaaitat Naalakkersuisut aalajangersinnaavaat.

Imm. 3. Akileraarutit B-it akiligassanut qulinut agguataarlugit akiligassanngortussaapput qaammatit januarip, februarip, martsip, aprilip, majip, julip, augustusip, septemberip, okto-berip, novemberillu aallartinneri tamaasa, piffissaagallartillugu akiliiffissaq kingulleq tassaalluni qaammatip akiliiffissap ulluisa 20-at. Piffissaagallartillugu akiliiffissaq kingulleq sapaataallunuunniit nalliuttuuppat imaluunniit arfininngorneruppat piffissaq ulluinnaasumut tullermut sivitsorneqassaaq.

Imm. 4. Akileraarutit akileraaruseriffimmit akilersinniarneqassapput.

§ 84. Akileraartussaaitaq aningaasarsianit A-nit B-nillu akileraarutaagallartunik akiliissasoq ilimagisariaqarpat, qanoq annertutigisumik akileraarutaagallartunik unerartitsinikkut akileraarutissallu allagartaasigut akileraartinneqarnissaannut maleruagassiat Naalakkersuisut aalajangersassavaat.

§ 85. Aningaasarsiat A-nit unerartinneqartut imaluunniit akileraarutissat allagartaasigut akilersinneqarsimasut saniatigut akileraartussaataitaq akileraarutininik allanik akileraaruseriffimmut akiliisinnaavoq. Taamaattoq ukiumi aningaasarsianik akileraaruteqaataasussanik naatsorsuiffiusumi 1. aprilimit kingusinnerunngitsumik. Ukiumut aningaasarsiorffimmut akiliiffiusumut akileraarutininik kinguaattoorutininik ernianik immikkullu tapilinnik akiligassaqarpat akiliutinit taakkua matuniarneqaqaassapput.

Kapitali 8

Iluaaarutisianit aamma atuisinnaanermut akileraarutit

§ 86. Selskabini aktiatigut piginneqatigiiffiusuni tamatumani aamma anpartsselskabimit Kalaallit Nunaanni nalunaarsorsimasumit iluaaarutininik tunniussinissap aammalu pisassanngortinneqarnissai pillugu aalajangiinernut atatillugu tamatigut selskabip kommunimi nalunaarsorsimaaffigisamini § 68 naapertorlugu akileraarutininut procenti tamarmiusoq akileraarutitut ilanngaatigissavaa, takukkit §§-it 61-imiit 63-imut. Aningaasat akileraarutissatut ilanngaatigineqartut, "iluanaarutisianit akileraarutit"-nik taaneqartussat inaarutaasumik akileraarutaapput. Pissutsit taamaattut § 1, imm. 1, nr. 10-mi taaneqartunik peqatigiiffinnut aamma atuuttuupput.

Imm. 2. Suulluunniit aktiaatilinnut iluaaarutitut pisassanngortinneqartut tamarmik iluaaarutisiatut isigineqarput, aktialli akilersinnagit aktiaatilinnut tunniunneqartut aammalu akiliisinnaajunnaarnermi pigisat aningaasanngorlugit naatsorsorneranni iluaaarutit pinnagit. Amerlanerpaanik aktiaateqartup selskabi, selskabimut allamut aamma pineqartup amerlanerpaanik aktiaateqarfigisaanut aktianik tunisisimasumik akiliisinnaajunnaartutut unitsippagu, akiliisinnaajunnaarnermi pigisat aningaasanngorlugit naatsorsorneranni amerlanerpaanik aktiaateqartup iluaaarutai § 16, imm. 2-mi maleruagassiat malillugit, iluaaarutitulli isigalugit, naatsorsorneqassapput. Pissutsit taakku aamma anpartininik piginnittunik iluaaarutisitsinermi atupput.

Imm. 3. Aktiaatilik amerlanerpaanik aktiaateqartutut isigineqassaaq, takuuk imm. 2, pineqartup nammineq imaluunniit aapparisanik, angajoqqaani, aatakkuni/aanakkuni aammalu meeqqani, ernguttani taakkualu aapparisaat peqatigalugit, ukiut kingulliit tallimat ingerlaneranni ingerlatseqatigiiffiup aktiaataasa 25 procentii amerlanerusulluunniit pigisarimappagit, piffissalluunniit tamatuma ingerlanerani taasisinnaassuseqarnerup 50 procentia sinnerlugu taasisinnaassuseqarsimappat. Ernissat/panissat meeravissartaarisimasallu ilaqtavittut isigineqarput.

Imm. 4. Akileraarutit iluaaarutisianit tamarmiusunit ilanngaateqartinnagit naatsorsorneqassapput.

Imm. 5. Akileraarutininik ilanngaassineq iluaaarutisianit piumasarineqartunit allanit, aamma aktiat anpartilluunniit tunngavigalugit ingerlatseqatigiiffiup piumasaqaataanit, salliutinneqartussaavoq.

§ 87. Selskabi sulisorisat aktiaataannik utertitsilluni sulisorisanut allanut tuneqqitassanik pisisoq iluaaarutisianit akileraarutit selskabip akileraarfittut kommuniani, tak. § 68, qaammatisiutit malillugit ukiumi pineqartumi procenti akileraarusiissut tamarmiusoq, tak. §§-it 61-imiit 63-imut, aamma procenti selskabip akileraarutissaata § 60-imi aalajangersarneqartup assigiinngissutaattut annertutigisoq akileraarutininut ilanngaatigissavaa.

Imm. 2. Selskabip aningaasanik niuerffimmi nalunaarsorneqarsimasup nammineq aktiaatini utertillugit pisiarigunigit iluaaarutisianit akileraarutininik imm. 1-imi taaneqartutuulli akileraarutissanut

immikkoortitsissaaq.

Imm. 3. Selskabimi aktianik amerlanerpaanik piginnittuusup akiliisinnaajunnaarluni ingerlajunnaarnermi pissarsiai iluanaarutitut isigineqarpata, § 86, imm. 2, oqaaseqatigiit aappaat naapertorlugit, iluanaarutisianit akileraarutininik imm. 1-imi taaneqartutulli akileraarutininut ilanngaassineqassaaq.

Imm. 4. Kinguaariit nikinnerannut atatillugu aningaasanik agguassineqarpat, selskabip iluanaarutisianit akileraarummik imm. 1-imi taaneqartutulli immikkoortitsissaaq, tamatumani aamma kinguaariit ingerlaavartumik nikittarneranni atsiornikkut isumaqatigiissuteqartoqarsimatillugu. Isumaqatigiissutit malillugit kinguaariit nikingitsoorpata iluanaarutisianik akileraarutininik § 86, imm. 1 naapertorlugu, isumaqatigiissutit atorunnaarneraniit qaammat ataaseq qaangiutsinnagu selskabi akileraareersimassaaq, iluanaarutisianit akileraarut imm. 1 naapertorlugu iluanaarutisiat siusinnerusukkut akilerneqarsimasut ilanngaatigereerlugit.

§ 88. Iluanaarutisianit akileraarutit immikkoortitat selskabip akileraaruseriffimmut akilissavai ullormit pissarsiap tunniunnissaata pisassanngortinneqarnerataluunniit isumaqatigiissutigineqarneranit qaammat ataaseq qaangiutsinnagu. Aningaasaatinik agguassineqarpat iluanaarutisianit akileraarutit immikkoortitat nalunaqqusissummi killiliussamiit qaammat ataaseq qaangiutsinnagu akilerneqareersimassapput. Tunniussinnermut peqatigitillugu selskabi Naalakkersuisut inassutigisaattut iluseqartumik aalajangiineq pillugu paasissutissiisummik nalunaaruteqassaaq. Aalajangerneqarsimappat iluanaarutisiaqartitsineqassanngitsoq aamma tamanna pillugu qaammat ataaseq qaangiutsinnagu paasissutissanik nassiussineqassaaq. Paasissutissanik oqaatigineqartunik nassitsineq akiliutininik ullormoortunik Naalakkersuisut imaluunniit Naalakkersuisut tamatumunnga pisinnaatitaata naalakkiuteqarneratigut. Pissutsit taamaattut aamma peqatigiiffinnut § 1 imm. 1, nr. 10-mi taaneqartunut atuuttuupput.

§ 89. Kinaluunniit iluanaarutininik tigusilluniluunniit pisassaqaartitaasoq naammaginartumik kinaassutsiminik uppersarsaasimaguni piumasaqarsinnaavoq pisassaqaartitsisup Naalakkersui-sut pissusissaatitaattut pissuseqartumik tunniussineq pisassaqaartitsinerluunniit uppersarsaatigineqassasoq. *Imm. 2.* § 82, imm. 2-mi aalajangersakkat akiliuteqarsimanerup pisassaqaartitsinerulluunniit uppersarsarneqarneranut matumani pineqartumut tunngatillugu aamma taamatuttaaq atuutissapput.

§ 90. Kinaluunniit § 3 naapertorlugu akileraartussaataaannngitsoq iluanaarutininik § 86 imaluunniit § 87 malillugu iluanaarutisiat akileraarutitaannik ilanngaassissutaasimasunik pissarsisimappat akileraarutitaat akileraaruseriffiup qinnuteqatoqarneratigut utertissavaa. Peqatigiiffilli piginneqatigiiffillu § 1, imm. 1, nr. 14-imi taaneqartut § 3, imm. 2 naapertorlugu akileraarusiiffigineqartussaannngikkaluarlutik iluanaarutisianit akileraarutininut ilanngaataasimasut utertissinnaanngilaat.

§ 91. Inummot selskabimulluunniit il.il. § 2, imm. 1, nr. 13 malillugu akileraartussaataasumut akiliuteqarnernut pisassanngortitsinernulluunniit atatillugu tamatigut akiliuteqartumut pisassanngortitsisumulluunniit atuisinnaanermut akiliutit tamarmiusut 30 procentiannik akileraartitsineqassaaq. Atuisinnaanermut akileraarutininik ilanngaassiinissamut pisussaaffik akiliinissaq atuuppoq inunnut, toqusup pigisaanik, selskabinut, peqatigiiffinnut, suliffeqarfinnut il.il. Kalaallit Nunaanni eqqartuussiveqarfinnut atasunut. Akiliisoq pisassaqaartitsilersorluunniit Kalaallit Nunaanni

eqqartuussisoqarfimmut atasuunngitsumit pisuuppat, akiliinerlu pisassaqtitsilernerluunniit tamatumunnga pisinnaatitaasumit Kalaallit Nunaanni eqqartuussiveqarfimmut atasuusumit suliarineqarluni, pisinnaatitaasoq ilanngaassinissamut pisussaavoq. § 76, imm. 3-mi aalajangersagaq taamatuttaaq atuuppoq. Aningaasat ilanngaataasut "atuisinnaanermut akileraarutiniq" taaguuteqartinneqarput, inaarutaasumillu akileraarutaallutik.

Imm. 2. Akissarsiat qanorluunniit ittut atuagassiornermi, eqqumiitsuliornermi ilisimatuussutsikkulluunniit sulianik, tamatumani aamma assigiinngitsunik filmiliornernut radiomullu fjernsynimulluunniit aallakaatitassiorluni immiussanik sulianik, suliamik illersuinerlut qanorluunniit ittunut, nioqqutissap meqqianut, allalanut ilusiliinermulluunniit, titartakkamut, male-ruagassiisummut sanariaatsimulluunniit isertuussaasumut, tunissassiornermi, iluanaarniarner-mi, ilisimatuussutsikkulluunniit misilittakkanut piginnittussaanermut pisussaataaenermik atui-niarnermut akissarsiatut tiguneqartut tamarmik atuisinnaatitsinermut akissarsiatut naatsorsuutigineqarput.

§ 92. Atuisinnaanermut akileraarut akilernerqartussanngussaaq atuisinnaanermik tunniussi-nermi pisassarilersitsinermiluunniit akileraaruseriffimmut akilernerqassalluni kingusinnerpaamik qaamammi tulluuttumi akileraarutinit A-nut unerartitsisussaaitap nalunaaruteqarnissaanut killigititaq peqatigalugu. Tunniussinermik pisassarilersitsinermilluunniit suliaqartoq atuisinnaanermut akileraarutip akilernerqarneranut peqatigitillugu Naalakkersuisut ilusissamik aalajangigaattut iluseqartoq atorlugu paasissutissiissussaavoq. Paasissutissanik taaneqartunik nassiussinissaq pinngitsaaliissutigineqarsinnaavoq ullormoortunik akiliutiniq Nalakkersuisunut imaluunniit Nalakkersuisut tamatumunnga piginnaatitaannit aalajangerneqartunik naalakkiuteqarnikkut.

Imm. 2. §§-ini 89-imi, 93-imi aamma 95-imi aalajangersakkat taamatuttaaq atuupput.

Kapitali 9

Akisusnaanermut akiliisitsiniartarnermullu aalajangersakkat

§ 93. Kinaluunniit akileraarutiniq ilanngaassisuunissaminik naammassinninngitsoorluniluunniit minnaakkanik ilanngaassisoq akileraartarnermi pisortanut susassaqtunut, tak. §§-it 81 aamma 88, nammineerluni aningaasat amigaataasut akilernissaannut akisussaavoq, qularnaallisarsinnaanngikkuniuk inatsimmi matumani aalajangersakkanik maleruaaniarnermini sumiginnaasimanani.

Imm. 2. Kinaluunniit inatsit manna malillugu akileraarutiniq ilanngaassuisimasoq aningaasat ilanngaataasimasut akileraaruseriffimmut akilernissaanni akiliisussaataaavoq.

Imm. 3. Ilangaassinissamut piumasaqatit pineqartup atugarisaanik pissuteqartumik eqqortumik naatsorsorneqarsinnaanngippata akileraaruseriffik piumasarineqartunik missingiunikkut angissusiliigallarsinnaavoq.

§ 94. Aningaasarsiat A-t akileraarutiniq ilanngaaffigineqarsimanngippata imaluunniit ilanngaatisat minnaagaasimappata aningaasarsisup piumasaqarnikkut erngerluni aningaasat amigaataasut akileraaruseriffimmut akilissavai.

§ 95. § 2 malillugu akileraartussaaitanut sinniisutut piginnaaneqartitat Kalaallit Nunaanniittut akileraarutit akileraartussaaitanit pineqartunit akiliggassaataasut akilernerqarnissaannut

akisussaaqataapput.

§ 96. Aappariit ataatsimut akileraartitaasut akileraarutit akilernerqarnissaannut assigiimmik akisussaaqatigiipput.

§ 97. Akileraarutit toqukkut qimagussimasumut akiligassaataasut toqunerup kingornatigut aatsaat akileraaruserneqarsimasut pillugit pigisat toqukkut qimaguttup qimataanik suliaq imaluunniit kingornussisussat akisussaapput. Kingornussisussat assigiimmik akisussaaqatigiipput taamaallaalli kingornussarsianik tigusaqarnermissut imaluunniit kingornussarsianik siumoortumik tigusaqarsimanermissut annertutigisumik, aappaasorli tamatuma saniatigut aamma pigisanik qimatanik pisassaqartitaanermisut annertutigisumik akisussaassuseqarpoq. Pisussaassuseq toqukkut qimagussimasup akiligassaqarfinik nalunaarfiginninnermit sunnerneqartussaangilaq.

§ 98. Selskabi peqatigiiffilluunniit il.il. atorunnaarsimappat pigisallu nalingi aktianik anpartinilluunniit piginnittunut ilaasortanulluunniit agguanneqarsimappata selskabip peqatigiiffilluunniit aningaasarsianit akileraarutissanut aningaasanik naammattunik ilanngaasiisimanani taava aktianik anpartinilluunniit piginnittut ilaasortallu aammalu akiligassanik isumannaariniarnermi aaqqissuussisoq, imaluunniit taamaattumik toqqaaneqarsimananiluunniit piginnaatitsisoqarsimanngippat siulersuisut, assigiimmik akisussaassuseqatigiillutik akileraarutit akilernerqarnissaannut akisussaapput. Akiligassanik isumannaariniarnermi aaqqissuussisumut imaluunniit siulersuisunut assigiimmik akisussaaqatigiiffiusumik piumasaqartoqarsinnaangilaq aningaasat aktianik anpartiniluunniit piginnittunut ilaasortanulluunniit agguanneqarsimasut katinnerannit annerusumik, aammalu aktiatillit, anpartinik piginnittut ilaasortalluunniit taamaallaat pisimasamittut annertutigisumik akisussaassuseqarput.

§ 99. Kinaluunniit selskabip aningaasaataasa ilaannik akisunaaraluni tunisisoq tunisinerup nalaani ingerlatseqatigiiffiup akileraarutitut akitsuutinullu akiligassaanik akiligassarisinnaasaanilluunniit akiliinissamut akisussaaavoq. Akiliisussanngortitaaneq taamaallaat atortinneqarsinnaavoq selskabi akiliisinniaraluarlugu tamanna iluatsinngitsoorpat. Tunisisoq selskabiuppat il.il. nunamut maanga tamakkiisumik akileraartussaataaangitsoq, akiliinissamut akisussaatitsineq inunnut selskabinulluunniit nunamut maanga tamakkiisumik akileraartussaataasunut toqqaannartumik tutsinneqarsinnaavoq, taakku selskabimut tunineqartumut aalajangiisinnaassuseqarlutik sunniuteqarnerisa annertussusiat aalajangiisuutillugu. Kinaluunniit tunisinermi inuussutissarsiutitigut siunnersuisuusimasoq aamma tunisisoq kiisalu inuit selskabillu oqaaseqatigiit pingajuanni taaneqartut peqatigalugit akisussaaqataavoq. *Imm. 2.* Tunisisoq inuuppat *imm. 1.* oqaaseqatigiinni siullerni tullerisaannilu aalajangersakkat taamaallaat atorineqarsinnaapput, taassuma piginneqataassutai piginneqataassutitigut aningaasaatit 10 procenterippatigut, taakkunanngaluunniit amerlanerullutik. Tunisisoq selskabiuppat il.il. *imm. 1-*imi oqaaseqatigiit siulliit pingajuanni aalajangersakkat taamaallaat atorineqarsinnaapput, tunisineq selskabinut ingerlatseqatigiiffissuarnut qilersorsimasunut attuumassuteqarpat, taamaattorli selskabini tamani piginneqataassutitigut aningaasaatini piginneqataassutit selskabimi ataatsimi 10 procentiuppata selskabit ingerlatseqatigiiffissuarnut qilersorsimasutut pineqartutut isigineqassapput. *Imm. 3.* *Imm. 1-*imi aalajangersagaq aamma taamaallaat atorineqassaaq tunisineq selskabimut tunisinerup nalaani inuussutissarsiutitigut ingerlatsinerminik unitsitsisimanermigut amerlanertigut

anigaasaqarnermigut ulorianartorsiunngitsutut ingerlasumut attuumassuteqarpat.

Imm. 4. Imm. 1 malillugu akisunaarisoqarsimasutut isigineqassaaq anigaasaatit ilaannut akiliutit selskabip tunineqarnermi nalaani ilanngaatisat ilanngaatigereerlugit nalinganit erseqqissumik amerlaneruppata.

Imm. 5. Selskabip anigaasaataasa ilaannik tunisineq pilersinnagu akileraaruseriffik imm. 1 tunngavigalugu akiliinissamut akisussaatisinnaaneq atorineqassanngitsoq akuersissutigineqassasoq neriorsuuteqarsinnaavoq. Taamatut neriorsuuteqarnermi piumasarineqarsinnaavoq selskabip tunineqarnerata nalaani akileraarutinut akitsuutinullu akiligassaasa akiligassarisinnaasaasalunniit akilernerqarnissaannut tamakkiisumik ilaannakortumillunniit qularnaveeqquisoqassasoq. Imm. 1-imi oqaaseqatigiinni kingullerni taaneqartutut siunnersuisuusimasoq akiliinissamut akisussaassutsiminit tunuarsinnaavoq tunisineq sioqqullugu allakkatigut qinnuteqaruni akuerineqarnissamik neriorsorneqarnissaminik, qinnuteqaatini tunisinissamik pilersaarutigineqartoq pillugu paasissutissanik pisariaqartunik ilaqartillugu. Akuerineqarnissamik neriorsuutaasimasoq tassungalu atatillugu piumasaqaataasinnaasut pillugit akileraaruseriffup aalajangiinera naliliinissamut paasissutissat pisariaqartut tiguneqarneriniit qaammatit pingasut qaangiutsinnagit pereersimassaaq.

Imm. 6. Akuersissuteqarnissamik neriorsuuteqarnermi periusaasartussaq pillugu Naalakkersuisut malittarisassanik erseqqinnerusunik aalajangersaasinnaapput. Naammagittaalliortunit, matumani aalajangiinerit pisortatigoortumik oqartussaasunut allanut ingerlateqqinne-qarsinnaannginneri ilanngullugit, pillugit Naalakkersuisut malittarisassanik aalajangersaasinnaapputaaq.

§ 100. Akileraarutit piffissaagallartillugu akilernerqarsimangippata anigaasat amigaataasut tapiissutit, erniat immikkullu akiliutissat ilanngullugit Kalaallit Nunaanni akilersinniarneqarsinnaapput maleruagassat Naalakkersuisut aalajangigaat malillugit pigisanik arsaarinnilluni akiliisitsiniartartut (pantefoged) piginnaatitaasut ikiortigalugit, taamatullu aamma Kalaallit Nunanni eqqartuussisarnermik inatsimmi aalajangerneqarsimasutut ittunik eqqartuussutit isumaqatigiinnerillunniit anigaasanik akiliinissamut tunngasut assinginik iliorluni.

Imm. 2. Akileraartussaasumit namminermit akiliisitsiniarneqalussinnarsimappat pisariaqarpat akiliisitsiniarneq pisinnaavoq § 5, imm. 2 naapertorlugu pigisat (anigaasaatit) iluanaarutigittataat angajoqqaani akileraaruserneqartarpata meeqqat pigisaasa tiguneqarnerisigut. Tamanna atuutinngilaq akileraarutit unerartitsisussaaitap unerartitaasa taassumanna tiguniarneranni.

§ 101. Akileraarutit piffissaagallartillugu akilernerqarsimanngippata akileraaruseriffup akileraartussaaitap ilanngaassisussaaitaasullunniit Kalaallit Nunaanni sulisitsisua allaffigalugu peqqusinnaavaa atorfeqartup kiffartuussinermi anigaassanngorlugit akissarsiaasa ilaannit anigaasat amigaataasut tapiissutinik, ernianik immikkullu akiliutissanik ilallit matuneqarnissaannut naammattunik ilanngaassilluni ilanngaatigisanik akileraaruseriffimmut akiliuteqaqqullugu. Peqqussut taamaattoq naapertorlugu ilanngaassuisussaaneq aamma akissarsianik il.il. siumoortumik akiliinermut sumullunniit tunngavoq. Kiffartuussinermi anigaasarsiat pineqartup anigaasanik kiffartuussinermi nassataanik inummit allamit tigussaminik tigumminniinnarneratigut pineqarpata § 80, imm. 2-mi maleruagassiat taamaallutik atuuttussaapput paragraffi manna malillugu ilanngaassuinerup tungaatigut.

Imm. 2. Maleruagassiat inatsini allani aalajangersakkat allatut ittut apeqquatainnagit aamma naalagaaffimmi, Kalaallit Nunaanni Namminersornerullutik Oqartussani kommuninilu atorfillit akissarsiaannut il.il. atuupput.

Imm. 3. Ilanngaassuiffigeqqusaaq peqqusinerup nalaani sulisitsisumi pineqartumi suliffeqanngippat sulisitsisoq pisussaavoq ullut tallimat qaangiutsinnagit tamanna pillugu akileraaruseriffimmut nalunaaruteqarnissamut. Sulisorinninnerup taamaatissimanerani sulisitsisoq taamatut nalunaaruteqartussaataagujortaaq tamanna sioqqullugu ilanngaassuinissamut peqqusummik tigusaqarsimaguni aammalu akileraarutitigut akiitsoq tamatumani pineqartoq sulisorinninnerup taamaatinnerani tamakkiisumik akilerneqarsimanngippat. Suliunnaarnerup kingornagut ullut tallimat qaangiutsinnagit tamanna pillugu akileraaruseriffimmut nalunaaruteqassapput.

Imm. 4. Maleruagassiat imm. 1-mi oqaaseqatigiinni siullerniittut taamaallutik atuuttussaapput aningaasarsianut § 75, imm. 1, nr. 2-mi pineqartutut ittunut aammalu utaqqiisaagallartumik aningaasarsiat, soraarnerussutisiat ikiutillu assigisaat allat Kalaallit Nunaanni pineqartartut aammalu naalagaaffiup, landskarsip, kommunit, pisortat allat imaluunniit inuit namminerisamik karsiinit akilerneqartartut pillugit, kiisalu Kalaallit Nunaanni tuniniaanermi aningaasarsianut aalisarnikkut, piniarnikkut, aallaaniarnikkut, savaateqarnikkut sanaluttarnikkullu nioqqutinit pineqartartunut.

Imm. 5. Maleruagassiat imm. 1-miit 4-miittut taamaallutik atuuttussaapput aningaasat ilanngaassisussaaitap imm. 1-miit 4-mut maleruagassiat malillugit akiligassarisaasa tiguneqarnerannut.

Imm. 6. Imm. 1-miit 5-imut malillugit ilanngaassuineq pissaaq akiliuteqarneq inatsit manna malillugu akileraarutini A-nik ilanngaassinertaqaraluarpuunniit. Ilanngaatisat annertunerpaamik tunniunneqartunit akileraarutit A-nik ilanngareerlugit 30 procentiinik annertussuseqarsinnaapput.

Imm. 7. § 76, imm. 3-mi aalajangersakkat taamatuttaaq tassani aalajangersagaq naapertorlugu ilanngaassinerni aamma atuutissapput.

Imm. 8. Naalakkersuisut maleruagassiussapput aningaasat paragraffimi matumani aalajangersakkat malillugit ilanngaataasimasut akilerneqarlutillu pisussanut tunniunneqarnissaannut tunngasunik. § 81, imm. 5, oqaaseqatigiit aappaat, § 82, § 93, § 100, § 105, imm. 1, aalajangersakkat taamaallutik atuutissapput pissutsit paragraffimi matumani eqqartorneqartut tungaasigut.

Kapitali 10

Pineqaatissiissutit il.il.

§ 102. Kinaluunniit pisortanut akileraaruteqanngitsoorumalluni piaaraluneerluni imaluun-niit mianersuaalliorujussuarluni eqqunngitsumik paasinerluutaasinnaasumilluunniit inuup akileraartussaataitaneranut apeqqutip aalajangiiffiginiarneranut atugassanik imaluunniit akileraarusiinissap aalajangiiffigineqarneranut imaluunniit akileraarutit naatsorsornissaannut atugassanik paasissutissiisooq pillaaammik pineqaatissinneqassaaq.

§ 103. Taamatut aamma § 102-mi taaneqartutut pineqaatissinneqassaaq kinaluunniit piaaraluneerluni imaluunniit mianersuaalliorujussuarluni eqqunngitsunik paasinerluutaasinnaasumilluunniit akileraarusiinermik nakkutilliinermi atugassanik paasissutissiisooq.

Imm. 2. Kinaluunniit iliuuseq imm. 1-mi pineqartunut ilaangikkaluartoq, piaaraluni mianersuaalliorujussuarlunuunniit § 86 imaluunniit §§-it 88-miit 98-imut malillugit pisussaaffimminik piffissaagallartillugu naammassinninngitsoq mianersooqqusummik akiliisitaanermilluunniit pineqaatissinneqarsinnaavoq.

§ 104. Kialluunniit suliffik sinnerlugu suliffiup akileraartussaaitaaneramik aalajangiiniarnermut imaluunniit akileraarusiiniarnermik aalajangiiniarnermut imaluunniit suliffiup akileraarutissaanik naatsorsuinermit tunngatillugu § 102 unioqutissimappagu suliffiup piginnittua akiliisitaanissamut akisussaatinneqassaaq, naak piginnittoq unioqutitsinermit piaaraluneersutut mianersuaalliorutulluunniit pisuutinneqarsinnaanngikkaluartoq. Suliffeqarfik aktieselskabiuppat, anpartselsskabiuppat, andelsselskabiuppat, peqatigiiffiuppat, suliffeqarfiuppat imminut pigisoq, aningaasaateqarfiuppat assigisarippaguluunniit taamatut ittunik pissutissaqarpat inuk inatsisitigut akisussaasuusoq taamatut akiliisitaanermit akisussaatinneqarsinnaavoq. Akiliisitaanermit akisussaassuseq pineqaatissiisummut allamut allanngortinneqarsinnaanngilaq.

§ 105. Taamatut § 102-mi oqaatigineqartutut pillarneqassaaq kinaluunniit piaaraluni mianersuaalliorujussuarluniluunniit:

- 1) akileraarutini A-nik imaluunniit iluanaarutisianit atuisinnaanermullu akileraarutini ilanngaassuinissaminik naammassinninngitsoq,
 - 2) piffissaagallartillugu akileraarutini unerartitanik akiliinngitsoortoq,
 - 3) piffissaagallartillugu § 81, imm. 3-mi, § 88-imi aamma § 92-imi taaneqartutut ittunik paasissutissiinngitsoortoq,
 - 4) pissutsit § 81, imm. 3-mi, § 88-imi aamma § 92-imi taaneqartut pillugit eqqunngitsumik imaluunniit paasinerluisitsinnaasunik paasissutissiisoq,
 - 5) § 46, imm. 2 naapertorlugu akileraarutini ilanngaassuinissaminik naammassinninngitsoq, imaluunniit
 - 6) § 46, imm. 1 naapertorlugu akileraarutini unerartitanik piffissagallartillugu akiliinngitsoortoq.
- Imm. 2.* Imm. 1-imi taaneqartut ilaat aktiat tunngavigalugit ingerlatseqatigiiffimmit, anpartit tunngavigalugit ingerlatseqatigiiffimmit, piginneqatigiiffimmit, peqatigiiffimmit, suliffeqarfiimmit imminut pigisumit, aningaasaateqarfiimmit taakkuluunniit assigisaannit unioqutinneqarsimappat pineqartoq inatsiseqartitsinermit attumassuteqartuusoq taamatut akiliisitaanermik pineqaatissinneqarsinnaavoq. Kalaallit Nunaanni Namminersornerullutik Oqartussat, kommuni kommunilluunniit suleqatigiiffiat unioqutitsisuuppat Kalaallit Nunaanni Namminersornerullutik Oqartussat, kommune kommunilluunniit suleqatigiiffiat akiliisitaanermik pineqaatissinneqarsinnaavoq.

Imm. 3. Taamatullu § 102-mi taaneqartutut pineqaatissinneqassaaq kinaluunniit:

- 1) aningaasarsianik A-nik imminut tunniussisitsisoq nalunngikkaluarlugu peqqussutigineqartutut akileraarutini ilanngaattissamik ilanngaavineqarsimanngitsunik,
- 2) piaaraluni mianersuaalliorujussuarluniluunniit § 75, imm. 4 aamma 5, § 79, imm. 6, § 84 malillugit aalajangiinermi atugassamik eqqunngitsunik paasinerluisitsinnaasunilluunniit paasissutissiisoq imaluunniit paasissutissamik qinnuteqaatit aalajangersakkani taakkunani taaneqartut ilaannut atasumik apeqqutip aalajangiiffiniarneranni pingaaruteqarsinnaasunik nipangiussiinnartoq, imaluunniit
- 3) § 46, imm. 5-imi taaneqartutut nalunaaruteqanngitsoortoq.

§ 106. Akileraaruseriffik isumaqarpat unioqutitsineq akilisitaanermit sakkortunerusumik pineqaatissiinertariaqanngitsoq taava Naalakkersuisut taakkualuunniit taamaaliornissamut piginnaatitaata pineqartoq nalunaarfiggissavaa suliassaq eqqartuussivikkoortitsinertaqanngitsumik naammassineqarsinnaasoq pineqartup unioqutitsisimanini nassuerutigippagu aammalu piffissaatitap erseqqinnerusumik aalajangikkap qinnuteqarnikkut sivitsorneqarsinnaasup qaangiutinnginnerani

akiliutissamik nalunaarummi taaneqartumi akiliiumappat.

Imm. 2. Paasisitsissut imm. 1-imi taaneqartoq pillugu eqqartuussisarnermut inatsimmi unnerluussutip allagartaata imarisai pillugit aalajangersakkat taamaallutik atuutissapput.

Imm. 3. Piffissaatillugu akiliisitaassut akilernerqarluniluunniit isumaqatigiissuteqaatigine-qarneratigut tiguniarneqarsimappat qanoq iliuuseqartoqaqqissanngilaq.

§ 107. Inuup kialluunniit § 102 unioqqutissimappagu aammalu Kalaallit Nunaanni pinerluttulerinermut inatsimmi maleruagassiat naapertorlugit pineqaatissinneqarsinnaanera pisoqalisoorisimappat, unioqqutitsinerlu tassaappat taamaallaat inuup allap akileraaruteqanngitsoorniarnernut ikiuisimaneq, aningaasarsianit ilanngutinngitsuukkanit tapiliussatut akileraarutit akilertussanngussavai. Taamatut § 108, imm. 5-imiit 7-imut atuutilissapput.

§ 108. Inuk kinaluunniit toqukkut qimagussimasoq akileraarutininik ikippallaanik akiliisimappat pigisanik qimataanik suliaq imaluunniit kingornussisussat akileraarutininut ikinaarutininik akiliissapput.

Imm. 2. Toqukkut qimagussimasup § 102 unioqqutissimappagu toqukkullu qimagutinnginnerani pineqaatissiissutissap qanoq ittuunissaa aalajangerneqarsimanngippat aningaasarsianit ilanngutinngitsuukkanut akileraarutissap annertoqataanik toqukkut qimaguttup pigisanik qimataanik suliaq imaluunniit kingornussisussat tapiliussanik akileraartussaapputtaaq.

Imm. 3. Pisimasunut imm. 2-mi taaneqartunut pineqatissiissutissaq pineqartoq toqukkut qimagutinnginnerani naammassineqarsimanngippat pineqaatissiissutissamut taarsiullugu maleruagassiat imm. 2-miittut malillugit tapiliussanik akileraaruteqartitsinissaq aalajangerneqassaaq. Pineqaatissiissut akiliisitsinerinnaappat tapiliussanik akileraarutissat akiliisitsissut aalajangeriigaq akimorsinnaanngilaat.

Imm. 4. Pineqaatissiissut imm. 2-mi taaneqartunut tunngasoq pineqartup toqukkut qima-gunnerani ilaannakuusumik naammassineqarsimappat tamatumunnga naleqquttumik tapiliussatut akileraarutissat appartinneqassapput. Pineqaatissiissut taamaallaat akiliisitsineruppat tapiliussatut akileraarutissat toqukkulli qimaguttup akiliisitsinikkut akilersimasaasa katillugit akiliisitsissut aalajangeriigaq akimorsinnaanngilaat.

Imm. 5. Toqukkut qimaguttup pigisanik qimataanik suliaq imaluunniit kingornussarsisussat tapiliussatut akileraarutissaq piumasarineqartut akueriumanngippatigit eqqartuussiveqarnermut inatsimmi kap. 5-imi maleruagassiat naapertorlugit apeqqut tamanna eqqartuussinikkut aalajangiivigineqassaaq.

Akileraaruseriffik isumaqatigiinniarnermut siunnersuuteqarnissamut piffissaatitamik aalajangiisinnaavoq.

Imm. 6. Immikkut pissutissaqartillugu akileraaruseriffik tamakkiisumik ilaannakortumilluunniit tapiliussatut akileraaruteqarnissamut pisussaajunnaarsitsisinnaavoq.

Imm. 7. Kingornussisussat aappaasullu qimagaasup akisussaanerannut aammalu toqukkut qimaguttup akiligassa qarfinik nalunaartoqaqqusinermut maleruagassiat § 97-imiittut taamatut atuutissapput.

Akiliutininut tapiliussat tapiliussatullu akileraarutit imm. 1-imiit 3-mut pineqartut § 100-mi aalajangersakkatut pissuseqartumik tiguniarneqarsinnaapput.

Imm. 8. Eqqartuussivikkoortumik pigisanik qimatat agguanneqarnerannik suliaqarnermi, toqukkut qimaguttup pigisanik qimataanik isumaginnittussanngortoq imaluunniit kingornussisussat namminneq agguaaasisut toqukkut qimaguttup ikinaarlugit akileraaruserneqarsimasin-naaneranik misissuinermi paasisutissanik pingaaruteqartunik tamanik akileraaruseriffimmut qinnuigineqarnermikkut tunniussaqaartussaapput. Kingornussisussanik namminneq agguaaasisunit paasisutissanik tunniussinissaq

pinngitsoortussaajunnaarsinniarneqarsinnaavoq ullormoortunik akiliisussanngortitsineq Naalakkersuisunit imaluunniit taamaaliornissamut piginnaatitanit aalajangerneqartartut atorlugit. Akileraaruseriffik isumaqarpat akileeqqiutininik imaluunniit tapiliussatut akileraarutininik piumasaqartoqarsinnaavoq ulloq toqquvimmiit qaammatit pingasut qaangiutsinnagit toqukkut qimaguttup pigisaanik suliaqartut tamatuminnga nalunaarfigineqassapput. Imm. 9 malillugu naatsorsuineq imaluunniit § 11, imm. 5 malillugu nammineerluni nalunaarsuut ulloq toqquvimmiit qaammatit ataatsip qaangiutereernerani tiguneqarpat taamaattoq tamatuma kingorna qaammatit marluk qaangiutsinnagit nalunaaruteqarnissaq pissaaq. Piffissaq taanna sioqqullugu akileraaruseriffiup eqqartuussisuni pigisat qimatat agguanneqarnerannik suliaqartuni, pigisanik qimatanik isumaginnittussanngortitami imaluunniit kingornussisussani namminnerlutik agguasisuni suliassaq paasiniarsimappagu paasissutissat kissaatigineqartut tигuneranniit qaammatit marluk qaangiutsinnagit pigisat toqukkut qimaguttup qimataanik suliaqartut nalunaarfigineqassapput akileeqqinnissamik imaluunniit tapiliussatut akileraaruteqarnissamik piumasaqartoqartussaasoq. Piffissaritit siuliini taaneqartut qaangiutsinnagit, akileraaruseriffik nalunaaruteqarsimanngippat akileeqqusinermik piumasaqartoqassanngitsoq, pigisat toqukkut qimaguttup pigisaasa suliarineqarnerat inaarneqassanngilaq. Akileraaruseriffik piffissaagallartillugu piumasaqarluni nalunaaruteqarsimanngippat pigisanik qimatanik suliaq kingornussisussallu akiliisussaataitanerat atorunnaassaaq.

Imm. 9. Toqukkut qimaguttup pigisanik qimatai minnerpaamik 50.000 koruuninik naleqarpata kredsrettip akileraaruseriffik kingornussarsisarneq pillugu inatsit malillugu naatsorsukkat imaannik ilisimatissavai.

§ 109. Maleruagassiani inatsit naapertorlugu atulersinneqarsimasuni maleruagassiani aalajangersakkanik unioqqutitsinerit akiliisitaanermi pineqaatissinneqarnissamik aalajangersaasoqarsinnaavoq.

Imm. 2. Maleruagassiani inatsit manna tunngavigalugu atulersinneqartuni aktiat anpartilluunniit tunngavigalugit ingerlatseqatigiiffiup, piginneqatigiiffiup, peqatigiiffiup, suliffeqarfiup imminut pigisup, aningaasaateqarfiup taakkuluunniit assigisaasa unioqqutitsinerat pillugu akiliisitaanermi pineqaatissiinissamut malittarisassat aalajangersarneqarsinnaapput. Kalaallit Nunaanni Namminersornerullutik Oqartussat, kommuni kommuniluunniit suleqatigiiffiat unioqqutitsisuuppat Kalaallit Nunaanni Namminersornerullutik Oqartussat, kommuni kommunilluunniit suleqatigiiffiat akiliisitaanermik pineqaatissinneqarsinnaavoq.

§ 110. Politiit akileraaruseriffimmut ikiuuttussaapput maleruagassiat Naalakkersuisut inatsisinillu atortitsinermi ministereqarfiup isumaqatigiinniarnersigut aalajangersarneqarsimasut malillugit.

§ 111. § 82, § 88, § 92 aamma §§-it 102-imiit 109-imut najoqqutaralugit akiliutissanngortitat landskarsip pisassarai.

Kapitali 11

Aalajangersakkat assigiinngitsut

§ 112. Inuit, selskabit, peqatigiiffillu il.il. akileraartussaataitaasut allattorneqarnissaannik maleruagassiat Naalakkersuisut aalajangersassavaat.

§ 113. Naalakkersuisut maleruagassanik nammineerluni nalunaarsuut erseqqinnerusumik taasanik patsisissaqartillugu oqaaseqaammik, akileraartussaataasup isertitaasa pisuussutsinillu pigisaasa ilaannaannut tunngassuteqartumik taarserneqarsinnaasoq aalajangersaaasinnaapput.

§ 114. Naalakkersuisut piumasaqaqatigiinnikkut Danmarkimik, Savalimmiunik imaluunniit naalagaaffinnik takornartanik isumaqatigiissusiortoqarsimanersoq najoqqutaralugu pisortanut akileraartussaataaneq sakkukillilersinnaavaat taamaalilluni marloriaamik akileraarnissaaga-luaq tamakkiisumik ilaannakortumilluunniit pinngitsoortinniarlugu.

Imm. 2. Danmarkimik, Savalimmiunik naalagaaffinnilluunniit allanik isumaqatigiissuteqartoqartillugu Naalakkersuisut aalajangersakkanik makkunannga aalajangersaasassapput,

1) qallunaat, savalimmiormiut imaluunniit naalagaaffiup allap pineqartup akileraarusiineranni, akitsuusiineranni akiligassiinerannilu atugassanik Kalaallit Nunaanni oqartussaasut paasissutissanik piniarlutillu paasissutissiisarnissaannik,

2) akileraarutit, akitsuutit akiligassallu, Danmarkimi, Savalimmiuni naalagaaffimmiluunniit allami pineqartumi piniarneqartut, tassalu akilersinniarneqarsinnaasut Kalaallit Nunaanni akilersinniarneqarnissaannik, Kalaallit Nunaanni akileraarutininik, akitsuutinik akiligassanillu akiliisitsiniartarnermi maleruagassat naapertorlugit,

3) inummit, selskabimit il.il. imaluunniit taakkua piginnaatitaannit Kalaallit Nunaanni najugaqartumit aningaasarsiani akilernerqartuni Danmarkimi, Savalimmiuni imaluunniit nunami takornartami pineqartumi pisortanut akileraarutininik ilanngartuineqassasoq, tak. aamma § 78.

Imm. 3. Naalakkersuisut Danmarki, Savalimmiut imaluunniit nuna takornartaq pineqartoq isumaqatigiissuteqarfigisinnaavaat marloriaammik akileraaruteqarnissaq pinngitsoorniarlugu Danmarkimik aamma Savalimmiunik imaluunniit nunamik takornartamik pineqartumik isumaqatigiissutaasoq kiisalu akileraarutitigut suliasatigut ikioqatigiinnissamut isumaqatigiissut tamakkerluni allannguuteqarluniluunniit Kalaallit Nunaanni atulersillugu annertusineqassasoq.

Kapitali 12

Atortuulersitsinermi ikaarsaariarnermilu aalajangersakkat

§ 115. Inatsisartut inatsisaat 1. januar 2007-imiit atuutilissaaq ukiorlu aningaasarsiorfik 2007 aallarnerfigalugu sunniuteqarlerluni atuutilissalluni.

Imm. 2. Inatsisartut inatsisaat nr. 5, 19. maj 1979-imeersoq, kingusinnerpaamillu Inatsisartut inatsisaatigut nr. 2, 27. marts 2006-imeersutigut allanngortinneqartoq atorunnaarsinneqassanngilaq, taamaattumillu inatsit ukioq aningaasarsiorfik 1980-imiit ukioq aningaasarsiorfik 2006 ilanngullugu atuutiinnassalluniik.

Imm. 3. Imm. 2-mi aalajangersagaq apeqqutaatinnagu Inatsisartut inatsisaanni nr. 5, 19. maj 1979-imeersumi, kingusinnerpaamillu Inatsisartut inatsisaatigut nr. 2, 27. marts 2006-imi allanngortinneqartumi §§ 47, 48, 49, 50, 51, 51a, 51b, 51c, 52, 53, 54, 54 a, 55, 56, 57, 59, 59a, 60, 61, 62, 63, 64, 65, 66, 67, 68, 69, 86, 88, 89, 90, 91, 92, 93, 94, 94a, 94b, 95, 96, 97, 98, 99, 100, 103, 104, 115, 116 aamma 120 atorunnaassapput ukioq aningaasarsiorfik 2007 aallarnerfigalugu.

Imm. 4. Maleruagassiat inatsisip matuma naammassineqarnissaanut pisariaqartut allat Naa-lakkersuisut aalajangersassavaat.

Namminersornerullutik Oqartussat, ulloq 2. november 2006

Hans Enoksen

/

Josef Motzfeldt

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut